

Exercitationes anatomicae duae de structura et usu renum ut et de gustus organo novissime deprehenso ... Accedunt quaedam renum monstrosorum exempla ex medicorum celebrium scriptis collecta per Gerardum Blasium / [Lorenzo Bellini].

Contributors

Bellini, Lorenzo, 1643-1704.

Blasius, Gerardus Leonardus, 1626?-1692.

Houbraken, Jacobus, 1698-1780

Publication/Creation

Lugduni Batavorum : Apud Joannem à Kerkhem, 1726.

Persistent URL

<https://wellcomecollection.org/works/sg74tzkx>


License and attribution


This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>





46035 (1)

LAURENTII BELLINI
FLORENTINI
EXERCITATIONES
ANATOMICAE DUAE
DE
STRUCTURA ET USU RENUM
UT ET DE
GUSTUS ORGANO
NOVISSIME DEPREHENSO;
Praemissis ad faciliorem intelligentiam quibusdam
DE SAPORIBUS.

ACCEDUNT
Quaedam Renum monstrosorum exempla, ex
Medicorum Celebrium Scriptis collecta
PER
GERARDUM BLASIUM
Med. Doct. & Profess. Publ.
Editio novissima praecedenti longe emendatior.



LUGDUNI BATAVORUM,
Apud JOANNEM à KERKHEM, 1726.



1000

V I R I S
CLARISSIMIS ET EXCELLENTISSIMIS
VARIA DOCTRINA ET EXIMIA
ERUDITIONE INSIGNIBUS
PER ORBEM TERRARUM CELEBERRIMIS
ARTIS MEDICAE PRINCIPIBUS

D. BERN. SIEGFRIEDO ALBINO
MEDICINAE DOCTORI
ANATOMES ET CHIRURGIAE
IN ACADEMIA LUGDUNO BATAVA
PROFESSORI
H. T. RECTORI MAGNIFICO.

D. HERMANNO BOERHAAVE
A. L. M. PHIL. ET MED. DOCTORI
MEDICINAE BOTANICES CHEMIAE
ET COLLEGII PRACTICI
IN ACADEMIA LUGDUNO BATAVA
PROFESSORI
COLLEGII CHIRURGICI PRAESIDI.

D. H. OOSTERDYK SCHACHT
A. L. M. PHIL. ET MED. DOCTORI
MEDICINAE THEORETICAE ET PRACTICAE
PROFESSORI
NEC NON
COLLEGII ILLUSTR. ET PRAEPOT.
D. D. ORDINUM HOLLANDIAE ET WESTFRISIAE
QUOD LEIDAE EST MEDICO ORDINARIO
COLLEGII PHARMACEUTICI PRAESIDI.

HANC NOVISSIMAM
LAURENTII BELLINI
FLORENTINI
EXERCITATIONUM
ANATOMICARUM DUARUM
DE
STRUCTURA ET USU RENUM
UT ET DE
GUSTUS ORGANO
EDITIONEM.

IN OBSERVANTIAE EORUMQUE NOMINUM
EXISTIMATIONIS TESSERAM OMNI QUA
PAR EST ANIMI REVERENTIA
HUMILLIME OFFERT
ET DEVOVET

JOANNES à KERKHEM.

S E.

SERENISSIMO
COSMO TERTIO
ETRURIAE PRINCIPI
LAURENTIUS BELLINI

F.

DIFFICILIS novarum verum inven-
tio me saepius absterruit, quo min-
us exiguam hanc exercitationem
publici juris facerem Serenissime
Princeps. Accedebat ingenii mei
imbecillitas, simile quid aggredi impotentis; &
cum attentius meditarer cuius quantique Prin-
cipis nomine deberet insigniri, id omittendum
potius, quam evulgandum constitueram. Et
profecto omissum fuisset, nisi maturiori consi-
lio cognovissem deinde nullius esse roboris, quae
primo adspectu magni moliminis mihi obstere
videbantur impedimenta. Et arduum quidem
est novam inventis addere observationem, quid
enim adhuc superest in corporibus, quod accura-
tae Anatomicorum curiositati non patuerit? Red-
ditus jam circularis ille Sanguini motus, quem
ipsi Antiquitas parum fortunata rapuerat. Suo
jam

E P I S T O L A

jam deturbatum imperio Epar , cui unanimi Medicorum omnium consensu Vetustas illud praefeccerat. Quid in Pulmonum fabrica , quid in Lieinis textura , quid in Cibi concoctione , quid in Chyli progressu , quid in partium alimento desiderandum ? Effoeta jam Natura est , nec laudabile aliquid habet , quod parere possit imposterum. At quid tamen isthaec argumenta ? Evidentiâ magistrâ condiscimus nova semper in dies assurgere , & inventis inventa non obstat. Quid ni ergo liceat Seneca praeëunte concludere , Multum adhuc restat operis , multumque restabit , nec ulli nato post mille secula praeccludetur occasio aliquid adhuc adjiciendi ? Sola proinde hanc exercitationem evulgare cogitanti mihi reclamabat propriae mentis inscitia , florentior aetas , & Anatomicarum rerum imperitia. Quibus enim rationum momentis grandioris Sapientiae virum , antiquitatis amantissimum , impuber ipse , nondum vigenarius , nullis praeceptis nullisque Anatomicis artibus instructus , obstringere possem ? Satius tacuisse ducebam , ne , quod tam mirabili arte Natura composuit , aut irrisionebus exciperetur , aut diris impeteretur , aut laceraretur ut falsum , ab iis , qui nihil supra antiquorum inventa reperiri posse arbitrantur. Fluctuabat magis animus , cùm se-

DEDICATORIA.

secum ipse tacitus reputabat, eam, si prodiret, elucubrationem, illius Principis pedibus advolvendam, qui Patronus non minus, quam castigator & judex esse poterat. Tuas, Serenissime Princeps, meditabatur praerogativas, tuarumque virtutum praestantiam pensitabat. Mirabatur grandes illos, & tantae doctrinae Majores Tuos, qui uberrimo Scientiarum fonte affuentes liberali Sapientiae patrimonio Te condecorant. Quale jam virtutum genus haereditario jure non obtines? Philosophiae Studium, rerum naturalium Amor, veritatis desiderium quam in Serenissimis Atavis Tuis effulserint quis ignorat? Testes appello Sapientes illos, qui à Constantinopolitani Imperii miseriis profugi in magni illius Cosmi sinum, quasi in Asylum, convolârunt. Quis Platonicam Philosophiam, Ficini operâ illustratam, traduxit ad Posteros, nisi Laurentius Medices, Cosmi Neppos? Quis Vaticanam Bibliothecam ditavit? Quis Romae construxit Athenaeum, nisi Laurentii Filius Leo Pont. Max.? Quis Pisanum Lyceum reparavit? Quis Florentinam Academiam erexit, nisi semper infra dignitatem laudandus Cosmus ille Primus Magnus Etruriae Dux? Quis satis pro merito Ferdinandum Primum eloquatur? Dicant illum Bibliothecae, tot tantisque

E P I S T O T A

que Manuscriptis Codicibus u[er]o uaque collectis
illustratae : dicant tot eruditissimi Viri effusa li-
beralitate cumulati ; dicunt tot Illustrium Aucto-
rum volumina sub tanti Principis nomine evulga-
ta. Dies desiceret , si vel minimum Cosmum II.
attenderem ipsius laudum summa dixisse sit , tan-
ti hujus Principis nomen ab erudito Galilaeo inscul-
ptum Caelo cum ipsis syderibus duraturum. Fer-
dinandum II. quem veneraris Patrem , depraedi-
cat terrarum orbis universus ; ipse enim , tanto-
rum dignissimus Atavorum Nepos , quid intenta-
tum relinquit , ut veritas quot jam seculis inqui-
sita ? Nunquam inventa eruatur ? Quid igitur in
Te Serenissime Cosme desiderandum ? Habes in-
natam Scientiam , & quasi per traducem propa-
gatam Sapientiam. Quantò majorem spem Tua
isthaec excelsa indoles excitat , qua assiduo Scien-
tiarum studio , & inseparabili virtutum amore
bonas omnes artes amplecteris ! Quid hic proinde
memorem Pietatem , Religionem , Majorum cul-
tum , morum Politiam , amabilitatem , facilita-
tem ? Dotes istae sunt , quae bonum , & quales
debent esse Principes , decent. Ea verò quae Te
decorant ornamenta virtutum , ubi reperias ? Ille
Matheos amor , Philosophiae Studium , Rerum
naturalium curiositas , Sapientium congressus , &
nt

DEDICATORIA.

ut verbo com' ar omnia, Veritatis ardentissimum
desiderium uno Te, Cosme Princeps, gloriatur;
Quale enim magis accommodatum indagandae ve-
ritatis instrumentum est, quam Anatomicis arti-
bus delectari? Eas verò quam excolis! quam iis
caperis! mirabile prorsus dictu! Principem juve-
nem iis oblectari, quae adspectu horrida, odoratu
gravia, sensibus omnibus injucunda, arcenda po-
tius, quam aulis excipienda, putaret aliquis. Sed
optimè quidem animadvertisi perspicacioris in-
genii Princeps, limoso Oceani in alveo jacere
Margaritas, nec nisi obscuris abrupti montis an-
tris Aurum includi. Haec mecum ipse cogitans,
mei tenuitatem ingenii pensitabam, nullisque me
virtutum, nullis Scientiarum honestamentis instru-
ctum deplorans, anceps haerebam, & pavidus Tu-
isque Dignissime Princeps, pedibus advolvi hanc
exercitationem dicaturus verebar. Tunc verò
venit in mentem probatissimus ille ritus apud Ma-
gnates, quo pretiosarum rerum obscuros licet,
nulliusque nominis inventores, non aspernari,
sed humana, benigna, amica fronte solent susci-
pere. Sic nunquam à principe mensa rustica ma-
nus ejicitur, quae fructum defert hyberno tempo-
re maturatum: nunquam Principis alloquo pro-
hibetur Fosfor, cui vel Toreuma aliquod, vel

**

man-

EPISTOLA DEDICATORIA.

mancum Jovis Simulacrum ligonem intercepit.
His ego excitatus exemplis tuo Serenissimo No-
mine lucubrationem hanc insignire sum ausus; li-
cet enim illa rudi ab auctore proveniat, quid
tamen pretiosius unquam afferri poterat, quam
Naturae opus omnibus hactenus invisum, & mihi
obscuro licet & imperito exinopinatò compertum?
Excipe igitur, humiliter obsecro, pacato Prin-
ceps Serenissime vultu, hoc opus exiguum; &
si illud abjectum nimis, nec tauto Principi accom-
modatum est, animum saltem obsequentem non
aspernare, qui ea molitur, & optat, quae me
tantae Patriae, uberrimi scilicet scientiarum fon-
tis, & foecundissimae sapientum, Parentis Filium
non degenerem, tantoque Principe Musarum o-
mniū, & Virtutum cultore non indignum sub-
ditum possunt efficere. Tibi, Serenissime Co-
sine, Principum Regnator Deus eam largiatur,
quam Tuarum virtutum series promeretur, feli-
citatem.

LAURENTII BELLINI
 FLORENTINI
 EXERCITATIO ANATOMICA
 DE
 STRUCTURA
 ET USU RENUM.

HAEC, quam de *Renibus* exercitationem habes, *humanissime Lector*, non ut inanem fugitivi nominis auram aucupetur, prodit in lucem, sed ut, quod juveni mihi, & tale nihil cogitanti, fortuna protulit aliquando, maturo sapientum judicio subjiciatur. Illud si verae & naturali Renum fabricae consentaneum reperies, tuum nobis assensum non denegabis opinor, non quod grandior rem animum adolescens ipse, sed veritas una devincat, quam si mihi reperisse contigit, non opus ingenii fuit, sed juvenibus favorabilis fortunae. Sic itaque se res habet.

Cum Serenissimus *Ferdinandus Secundus Princeps* ad exemplum Principum natus, quem ad omnem bonarum artium culturam, & stabilimentum Deus *Hetruriae* praefecit, uberrimam animalium copiam faceret *Clarissimo Eruditissimoque viro, Domino Joanni Alphonso Borello, Pisis Matheos Professori Celeberrimo*, nostroque amantissimo Praeceptorи, ut

Musculorum motus scrutaretur, aderam ipse continuus dissectionum adjutor. Cervam secabamus, cum, exemptis visceribus, genio tantum impulsus, Renibus praeparandis incubui, diversamque ab Anatomicis praeparationem aggrediens, Parenchyma illorum abrasi: quod cum admodum feliciter evenisset, objecta nobis sunt quaedam vasorum capillamenta ad extimam usque Renis superficiem excurrentia.

Hoc cum novum esset, attentius deinde & diligenter Renem inquirens, ipsius fabricam, quam mox audies, offendit. Illam, quoniam eruditis Viris digna luce visa est, tibi, *Studiose Lector*, exponimus: & ne rem omnino contemnas, & ut an illa veritati consonet mediteris attentius, recensemus primo Anatomorum opiniones, easque secundo perpendimus, ut nostra extremo loco posita sententia magis confirmetur.

Ut igitur ad rem proprius accedamus, omissis tum Renum connexionibus, tum membranis, tum omnibus iis, quae ad extimam Renum conformationem pertinent, solum de interna illorum fabrica & usu differemus.

Nullum esse usum Renum *Erasistratus* cum *Asclepiadis* sectatoribus existimarunt: quod quidem quam absurdum sit, quam a veritate remotum, quam a Natura alienum, aperte noscit, quicunque meditatur, quanta industria, quantaque sapientia, res naturales scientissimus Artifex operetur.

Libet proinde nunc (praetermissis hisce parum probatis Viris, qui genio suo Naturam effingentes, iis illam subjacere putant erroribus, quos admittit non raro humanae mentis imbecillitas,) *Aristotelis* sententiam

tiam perscrutari. Longam ille externarum Renis partium descriptionem, *Cap. ix. Lib. III. de partibus animalium*, instituit, cui paucissima quidem, & fere nulla de interna ipsorum conformatio commiscet. Habet enim tantum cavitatem quandam inesse Renibus, quam meatus qui a vena pertendit, non subeat, sed in eorum corpus absumatur. Habet insuper ex dicta cavitate prodire duos insignes exsangues meatus in vesicam desinentes. Usum vero talis visceris esse affirmat, qualis caeterorum omnium est viscerum; nimirum esse venarum per corpus diductarum ancoram, qua illae in posteriori parte contineantur, & affigantur. En, *Capite septimo*, ipsius Aristotelis verba, *Sunt viscerum quaedam supra septum, quaedam infra, sed omnium usus communis venarum gratia est, videlicet quo venae, utpote pensiles, sustineri, & copula viscerum stabiliri ad corpus possint; quasi enim ancorae per partes deductas jaciuntur ad corpus. Verbi gratia, de vena majore ad jecur, & lienem devenitur, etenim viscerum eorum natura quasi clavus corpori eam affigit, scilicet jecur, & lien, in latera corporis venam maiorem affirmant; ad haec enim sola rami ab illa mittuntur. Renes autem in partem posteriorem eandem continent, &c.*

Nec minus obscurus & brevis fuit Galenus in Renum structura explananda, licet usum aliquanto verius expresserit. Ait enim, ut ex *Libro v. de Usu Partium Capite vi. & vii.* deduci potest, *venas, & arterias per Renis corpus diffundi, & a spissa duraque Renum substantia attractum sanguinem, ipsorum vi ab urina segregari, illamque per Ureteres in vesicam demitti.*

Hanc sententiam, utpote admodum obscuram, clarius exponere voluerunt quidam *Galeni* Sectatores, qui *Vesalii* tempore, ut ipse affirmat, *Libro v. Capite x.* cribrum quoddam imaginati, Renum fabricam tallem esse putarunt, qualem non Natura, sed mens propria configeret.

Hinc vulgata omnium erat opinio, secundum *Renis* longitudinem duas cavitates inveniri, superiorem scilicet unam, alteram inferiorem: has transversa quodam membrana distingui, angustissimis foraminulis, & sensim fugientibus perforata. Asserebant deinde, oscula *Emulgentium Vasorum* in superiorem sinum aperiri, sanguinemque ibi effundi, qui ob sui crassitatem membranae porulos non penetrans, a sero, ut subtiliori, & illa foramina pervadente, secerneretur. Ajebant insuper, ab inferiori sinu ductum quandam oriri, in *Vesica desinentem*, & per hunc a superiori sinu serum, per transversam membranam percolatum, in *Vesicam* descendere.

Talia Medicorum somnia ridet *Vesalius*, eaque ut etiam impugnet propriam de *Renibus* sententiam adjungit. Inquit itaque, *ibid.* *Renum substantiam carnem, duram, densam, & solidam esse, eoque solum a substantia cordis discrepare, quod nullis omnino fibris intexitur, cum nempe diffusorum per Renes vasorum fibrae ad attractionem, retentionem, & expulsionem pulchre famulentur.*

Vasorum deinde *Renem* permeantium tractionem suscipiens; *Vena*, inquit, & *Arteria* *Renem* subeuntes in unum degenerant corpus, quod, arteriarum tunicas duritie, crassitieque respondens per *Renis* corpus distributum cernitur. Primum enim paulatim latecens

DE STRUCTURA RENUM.

5

in duos ramos, anteriorem scilicet & posteriorem, dividitur, qui secundum Renis formam per anteriorem, posterioremque partem protensi, modo in sex, modo in plures surculos divisi, versus Renis latera exteriora feruntur, non quidem ad extimam usque superficiem, sed interius multo in Renis corpore permanent.

Haec vero vasa invicem conjunguntur, anteriora nempe cum posterioribus, ac si unum idemque corpus essent & mutuam cavitatem constituunt, elegansque iste ramorum coitus instar semicirculi ad exterioris scilicet Renum lateris formam perficitur.

Et tandem post longam Vasorum, & sinuum descriptionem talia de usu Renum subjungit. Haec mehercule Renum est conformatio, quae in membraneum illud corpus, ipsiusque Ramos serosum sanguinem Renum substantiae vi, & Fibrarum ejus corporis rectarum beneficio attrahi commonstrat, ut sanguis seroso illo humore ita liberetur. Quod etiam paulo ante iis verbis insinuaverat: Renum substantia facultate sibi innata, ac propria ad justitiam temperie, formaque essentiali, ex Venis ac Arteriis per ipsius corpus diductis serosum illud recrementum excusat, ac in sinum, qui urinario meatu excipitur, diffundit.

His subjecere possemus Valverdi opinionem, quia tamen illa nihil discrepat a Vesalii dictis, nisi quod brevius explicatur, pluribus illam prosequi non juvat. Placet id potius attexere, quod habet Falloppius in Renum tractatione. Conjicit ille fibrosum esse Renum corpus, eo quod Meatus quosdam a circumferentia ad sinum medium per omnem Renum carnem protensos se observasse affirmet; quod licet omnibus patere dicat, adeo tamen ab Anatomicorum oculis

remotum fuit, ut rem uni visam *Faloppio* distinguere non potuerint. Sed de hoc fusius inferius, cum ejus Sententiam ad examen revocabimus.

Pergamus nunc ejus opinionem evolvere. Afferit nervulos una cum Arteriis, & Venis per Renum substantiam, ac corpus disseminari usque ad extremum, & hoc cujuscumque oculis subjici. Sinum membraneum, Pelvim nempe, in octo aut decem fistulas, quasi digitos perforatos haberet, dividi defendit, singularumque extremis operculum carneum, verrucae instar, acutum imponi, quod lotii stillicidium constituit. Concludit tandem, a Venis, ac Arteriis transfundи omnem aquosum sanguinem ad Renes, quem similitudine substantiae serum consequatur, quod per dicta opercula effunditur in Fistulas pelvis, unde per Ureteres in Vesicam. Sanguis vero retinetur pro nutritione, qui multus esse debuit, quia parum ob subtilitatem alit. Hanc deinde humani Renis veram esse constitutionem affirmat, caprini autem vel canini non item.

Haec sententia licet adeo subjecta sensibus praedicitur, adeo tamen confusè, obscureque declaratur, ut nullos omnino habeat assertores, nisi quoad pelvis Surculos, qui papillam quandam excipient, per quam serum excoletur.

Et quidem *Andreas Laurentius* (*ut in Capite xxiii. Libro vi. de Organis Naturalibus* in imo ventre contentis, & *Capite i. Libro ii. de Carn. Visc.* videre est) solum convenit cum *Faloppio* pelvim in plures Fistulas dividi, in medio perforatas, singularumque extremitati, quae lata magis est, carunculae capillari canalicula perviae extremo imponi, unde serum excolatum

tum per easdem Fistulas in Vesicam descendat. Cae-
terum nihil differt a *Vesalio* quoad Renis substantiam,
ait enim nullis eam fibris intexi, solidam, duram,
densam esse, similemque cordi. Ab illo tamen discre-
pat in vasorum progressu, neque enim ipsorum Ana-
stomosin, neque semicircularem Figuram quam con-
stituunt, neque Cavitatem, quam formant per *Vesa-*
lium, describit. Insuper ramos Emulgentium in ca-
pillares abire ad gibbum usque contendit, frequentio-
resque ramulos ad papillas excurrere, ut ibi serum de-
ponant.

Laurentii sententiam sequitur ex toto *Veslingius*,
Capite v. Syntagmatis Anatomici, additque *succum in*
renalibus Glandulis contentum, *quem Atram bilem*
appellat, *seri a sanguine separationem instar coagu-*
li promovere, *ipsasque glandulas tractum serosae hu-*
miditatis adjuvare.

Proximus jam accedit Clarissimus *Thomas Bartholi-*
nus, *Capite xvii. Libri i. Anatomiae Reformatae*, qui
à *Laurentio*, & *Veslingio* parum diversus apparet, so-
lum enim fibras aliquas in Renibus videtur admittere,
cum afferat *Renum substantiam compactam*, & *densem*
ferè ut cor esse, *non tamen ita fibrosam*. Inquit etiam
ramos capillares Emulgentium per totam substantiam
diffundi, & *in papillarum capitibus obliterari*.

Etiam manifestum est, nullum ex Illustrioribus A-
natomicis inhaesisse *Faloppio*, quin eruditissimus *Hig-*
morus aliam dissecandi Renis methodum fuscipiens
Faloppianos in primis tubulos, totamque illius de Re-
nibus opinionem impugnat, & veram invisamque o-
mnibus *Renum substantiam* se reperisse laetatur. Du-
plicem ille *Cap. iv. Part. iii. Lib. i. Disq. Anat. in Re-*
num

num corpore substantiam cognoscit, superiorem scilicet unam, seu externam, quam absque fibris, similemque Epatis parenchymati esse contendit, inferiorem alteram, seu internam, fibrosam, cuius fibrae, ad pelvim spectent, & in qua Arteriae, & Venae terminantur, nec ferantur ulterius. De progressu autem, & constitutione Vasorum haec habet. *Venae*, & *Arteriae Emulgentes ad Renis portam dividuntur, alterque illarum Ramus ad anteriores, alter ad posteriores Renis partem fertur, inter Pelvis tunicas, ibique in plures ambo surculos divisi emergunt versus exteriorem Cavitatis partem, gibbum scilicet Renis spectantem, & Tunicam à Pelvis membranis mutuantes, divisi, & patentes, in plures se expandunt surculos, versusque gibbam Renis partem properant, & in plurimas graciliores Propagines distincti per Anastomosin conjunguntur, Arteriae scilicet anteriores cum Venis posterioribus, & posteriores Arteriae cum Venis anterioribus. In progreffu etiam tam varie commiscentur, ut speciem optimè referant, cum à carne denudantur, Apum loculamentorum, foraminulis plurimis perviorum. Hi surculi, versus gibbam Renis partem coëntes, tam exquisitè uniuntur, ac si unum essent corpus, & Cavitatem arcuatam, Renis formam exteriorem exquisitè experimentem, inter se conficiunt.*

Quomodo vero Urina à sanguine separetur, sic exprimit. *Serum per Arterias Emulgentes minutissimas in singulas substantiae Renum partes cum aliqua sanguinis portione diffunditur, quod ab ipsorum parenchymate percolatum, servato sanguine pro nutritione, in Pelvim stillat. Et quia talis sanguinis portio major est, quam nutritio Renum exposcit, sanguis superfluus*

fluus emittitur ab Arteriis in Venas Emulgentes, quibus illae per Anastomosin junguntur.

Haec usque adhuc, quod sciam, de Renum constitutione scripta sunt ab Illustrioribus Anatomicis, videntur jam quomodo illa cum veritate convenient, ut expensis aliorum sententiis novae magis observationis inventum comprobetur.

Et primo quod ad *Aristotelem* attinet, ipsius de Visceribus opinionem pluribus impugnare non placet; magnum enim, & satis apertum ejus ambiguitatis argumentum est, nullos in hac re Viro caeteroqui Clarissimo inhaesisse. Quin immo nec sibimet placuisse videtur *Aristoteles* in usu Renum explicando, alias namque, *Capite VII. Libri III. de Partibus animalium* ab ipsis in posteriori parte venam contineri affirmavit; alias *ibid. Capite IX.* nulla necessitate haberi Renes asseruit; alias ad supervacuum humorem excernendum iis abuti naturam existimavit. Unde ancipitem ipsum haesisse in re ardua, & parum nota deduci potest. Huic proinde Peripateticorum maximo condonandum, nimirum non adhuc eo usque pervenerat Anatomia, ut ea etiam aperiret, quae nec sensibus, nec ipsi intellectui objici unquam potuissent. Illa tunc prodibat in lucem, & adhuc in suae nativitatis exordiis basbutiebat: jam vero ferit sublimi sydera vertice, aetateque, & scientia constens suae juventutis errores insequitur, ut abditam, & propriae adolescentiae malignitate compressam veritatem aperiens, ab omni parte beata traducatur ad posteros. Ne vero ab *Aristotele* digrediamur; internam Renum constitutionem optime quidem, quia breviter, ille descripsit, cum nempe Universales tantum voces tam de Sinubus quam de Vasis adhibuerit.

Transeamus proinde ab hoc Philosophantium Principe ad Medicorum Patrem *Galenum*, qui, quoniam & ipse accuratam magis Renum structuram vel non curavit, vel sui vitio temporis adhuc abditam non agnovit, paucis verbis, & iis etiam obscuris nobilissimum viscus circumscripsit. Ille tamen fuit *Aristotele* fortunatior, cum enim isthaec opinio non satis comprehenderetur, varios invenit interpretes, qui menti propriae Naturam, & *Galenum* accommodantes *Cribrum* illud adinvenerunt, quod *Benedictum* appellant, nunquam in Renibus inveniendum. Et quoniam, ut hoc *Vesalius* evertat, testes solum sensus producit, & autopsiam, quid jam ipse magis veritati consonum pronunciaverit, inquirendum.

Falsum igitur est Renum substantiam fibrosam non esse, ut *Vesalius* afferit; insunt enim Renibus Filamenta quaedam fibris simillima (*Fig. I. EE.* & *Fig. x. AB*) non tamen musculosa, & carnosa, quarum examen accuratius habebis inferius. Nec Vasa Renum subingressa in unum corpus degenerant, quod Arteriis duritie, crassitieque respondeat; sunt namque Tunicae illius corporis à Pelvis membranis mutuatae (*Fig. II. CCC.*) ut optime notavit *Higmorus*, & nos expnemus. Constat etiam ad sensum Emulgentes ramos non interius multo in Renum corpore terminari; divisi enim in capillamenta, ad extimam usque superficiem excurrunt (*Fig. XI. DD.*) Nec placet serofsum sanguinem Renum vi, rectarumque fibrarum beneficio, attrahi, cum ultrò sanguis à corde in Arterias immissus celerrimè irrumpat in Renes: quod etiam in caeteros attractionem defendantes dici potest. Hic interim quaedam *Vesalii* verba praeterire non licet,

quae

quae in eodem capite sibi adversari videntur.

Ait ille, ut usum Renum explicet. *Haec meherculè Renum est conformatio, quae in membraneum illud corpus, ipsiusque ramos serosum sanguinem Renum substantiae vi, & fibrarum ejus corporis rectarum beneficio attrahi commonstrat, ut sanguis seroso illo humore ita liberetur.* Afferuerat ante Renem nullis omnino fibris intexi; nunc verò serosum sanguinem Renum substantiae vi, & fibrarum ejus corporis rectarum beneficio attrahi defendit. Quod si dicat aliquis verba *eius corporis* referri ad membraneum corpus, de quo loquebatur, non video quomodo cum iis ista convenient, quae paulò ante exposuerat, *Renum nempe substantiam facultate sibi innata, ac propria ad justitiam temperie, formaque essentiali ex Venis, ac Arteriis per ipsius corpus diductis serosum illud recrementum excolare in sinum* (qui idem cum corpore membraneo est) *qui urinario meatu excipitur.*

Sed ne his diutius immoremur, licet ad *Faloppium* accedere, qui, quoniam praceptoris sui *Vesalii* plorat errorem, eò quod brutorum Renes ipsi impoſuerint, quid in humano adeò à caeteris discrepante cognoverit, diligentius inquirendum. Et primò quod celeberrimus ille *Vir Renis corpus fibrosum esse deducat ex rectis meatus ibidem observatis admirari satis non possum.* Quid enim? Unquamne eos canales, easque Cavitates in fibris capillo subtilioribus aspicies, quae omnium, ut ipse ait, oculis patent, nec tamen fibras ipsas intueberis? Opus ibi erit rationcio, ubi sensus evidentia rem manifestè confirmat? *Positis, inquit ille, meatibus in Renum corpore, necessariò etiam sequitur ipsum esse fibrosum.* Egregium enim-

enimverò argumentum ! Quod occasionem praebuit Anatomicis & hanc sententiam irridendi, Renesque accuratius perscrutantes nova inveniendi. Falsum nimirum est oculis apertè subjici Canales illos, nec nisi auxiliante perspicillo conspicere solum possunt. Quod si eos inspexit *Faloppius*, cur & modum *Petro* suo non designavit, quo ipsos licet observare, quemadmodum illum admonitum voluit de Methodo, quam ut Pelvim, & Papillas inveniret servare oportebat?

Non secus *Riolanus Baubinum* irridet, nam cum in Pag. LXXXVI. *Sui Theatri Anatomici* asseruerit, conspici in Carunculis Renum secundum longitudinem disseptis Sulcos, & Canaliculos tenuissimis pilis similes insculptos; non videt ille, quomodo ea foramina, & fibrae conspicere possint, quae capillo subtiliores ab ipso *Bauhino* praedicantur; non solum enim illae oculis non subjiciuntur, verum etiam admoto perspicillo non distinguuntur: quod tamen *Riolanus* ignoravit, cum dixerit, id forte potuisse *Bauhino* contingere, si conspicillis usus esset.

Ad *Faloppium* ut redeam; Nervulos per substantiam Renis ad extremum usque deferri cum Arteriis nullus observavit, quin immo Anatomicorum plerique ipsos in Renum tunicis obliterari consentiunt. Fiderem ego *Faloppio*, sed quoniam cujusnam generis fibrae Renum sint, licet appareant, non agnovit, quanto potiori jure dubitandum erit nervulos tanto minus fibris conspicuos nulli visos hactenus inspexisse?

Quod vero addit Venas, & Arterias per totam Renum substantiam disseminari ad extremum usque, & id cujuscumque oculis subjici, equidem non visum,
sed

sed conjecturis tantum quasi subodoratum opinor; esto enim viderit ille majores, & satis conspicuas Vasorum per fibrosam carnem circuitiones, at minores usque ad extimam superficiem propagines quoniam modo conspicere potuit, cum extremitates illae, & capillamenta nunquam in homine (de quo Auctor loquitur) videantur; tanta namque, ait *Faloppius*, illorum est tenuitas, ut aptissima sint ad lacerationem, unde vasa non tam facile sensum feriunt, nec ab Anatomicis animadvertisuntur. Sed hic obiter, quomodo Vasorum ad extremum usque Renis progressum videri posse afferit, cum tamen hic ob sui tenuitatem, & lacerationem non tam facile ferire sensum affirmet? Quomodo ipse tales productiones intuetur; quae lacerantur, & latent? Illas procul dubio non vidit *Faloppius*, cum enim verissimum sit illa vasa in humano Rene nec a fibrofa carne separari posse, nec conspicere, sed lacerari, non nisi artificiose distingui possunt; opus proinde est coloratum aliquem humorem in Emulgentes immittere, ut inferius dicemus.

Quod si istae vasorum productiones apparentes sunt, quomodo, omissis caeteris, potuit oculatissimus *Higmorus* ita hallucinari, ut non modo illas non viderit, verum etiam non reperiri tam in homine, quam in brutis affirmaverit? Quod autem de papillis in humano Rene conspicuis, & Ureteris divisione subjungit, verum quidem est Ureteres in plures distingui tubulos, ex quibus quaedam papillae portio conspicitur, non tamen mamiliae separatae, & distinctae reperiuntur, ut inferius patet.

Ex quibus omnibus clarè colligere possumus, parùm Renum structuram fuisse *Faloppio* compertam, & si

quid vero proprius enunciavit, id vel ex dubia aliqua cognitione, vel conjectura afferuisse; quod etiam adeò obscurè explicavit, ut non modò Sectatores non habuerit, verùm magni nominis Anatomicos impugnatores; *Higmorus* enim postquam suam de Renibus observationem exposuit, *Faloppianam* tantum opinionem infesquitur.

Quia verò *Laurentius*, licet *Vesalio* quoad Renis substantiam assentiatur, convenit in aliquibus cum *Faloppio*, quid adjiciat à veritate alienum pervidendum. Non igitur verus est in Vasorum per Renes progressu describendo; cùm enim afferat frequentiores ramorum fibras capillorum instar ad papillares carunculas excurrere, ipsosque Ramos per Renis substantiam variè di- varicari, & ad gibbam usque pertingere, id cogitasse potius, quām vidisse credendum est; credas enim tu il- lum interfuisse *Romae*, qui percontanti tibi quid in Ur- be viderit, nonnulla quidem veritati confona respon- deret, sed affereret quoque insignem scopulum mari undique circumfusum in *Aventini* vertice reperiri? Cùm ergò per *Laurentium* vas a gibbum usque Renis pro- grediantur, quia tamen addit plurimas eorum propa- gines ad Carunculas excurrere, quod nunquam osten- det, cùm nullae, vel illae solum, quae ad ipsarum nutritionem facere possunt, ibi inveniantur, cur ta- lem Renum fabricam ab ipso non visam, sed tantum in imaginatione fictam affirmare non liceat, cùm non sincera sit, & simplex, sed commentis plurimis miscea- tur?

Laurentii Sententia uno dempto *Higmoro* placuit Anatomicis omnibus; solum enim ab ipsis aliquid ad- jungitur, vel immutatur. Sic Coagulum pro seri se- para-

paratione in Renalibus glandulis asservari addidit *Veslingius*, & *Bartholinus* Emulgentes per totam Renum substantiam spargi, & in papillarum capitibus oblitterari.

Libet hic parumper subsistere ad hujus coaguli contemplationem; licet enim alii id diligentius expenderint, abs re fortasse non erit si aliquid & nos brevissime conabimur. Dari atram bilem in Renalibus glandulis *Veslingius* supponit, per quas tamen illa vias eò perducatur, ipse non monstrat. At esto atrae bilis portio in iis capsulis asservetur, quo nam modo separationem seri à sanguine promovere potest? Vel enim è glandulis effunditur, vel in earum cavitate retinetur. Si è glandulis prodit, vel Renis subit, vel aliò divertit: Si non prodit, vel Renes non permeat, nosse velim virtutem hanc talis humoris, qui in iis capsulis inclusus, vel per corpus dispersus potest tamen in Renum substantia, in qua non est, operari. Si è glandulis effluit in Renes, quomodo hic fiat transitus cognoscere necessum est, quod arduum sanè, & difficillimum existimo. Quod enim? Nonnè per arteriolam ab Emulgente procedentem in Atrabilarias capsulas sanguis inducit? Hic rursus an non per venulam in emulgente desinentem dimittitur? Vena autem emulgens non defert ad Renes, sed refert ab ipsis in Cavam, & Arteria ab Aorta defert in Renes. Unde patet, nullam ab atrabilariis capsulis viam ducere in tale viscus; hinc nullum in ipsis asservari posse coagulum, quod seri à sanguine separationem promoveat, fateri cogimur.

Pluribus opus non est in *Bartholino*, cum quae dicta sunt de *Faloppio*, & *Laurentio*, in hujus erudi-

ditissimi viri Sententiam traduci possint.

Veniamus proinde ad *Higmorum*. Et primò quidem, duplēcēm esse Renum substantiam, falsum omnino esse, conspicitur, quarum externa fibrosa non sit, interna fibras habeat; est enim una Renis substantia, à pelvi usque ad extimam superficiem continua, & undequaque fibrosa (*Fig. x. A B*) Insuper illi assentiri non possumus, cùm vasa in interiori substantia terminari defendit, cùm pateat sensibus, illa ad extremum usque Renis excurrere (*Fig. xi. D.*) Anastomoses quas ille inter venas & arterias admittit, nunquam invenies.

Quomodo Serum ab Arteriis effluat, obscurè expōnit, cum enim *Anastomoses* inter venas & arterias tueatur, quo pacto fiat seri à sanguine separatio, non percipitur. Quin immò nec illam fieri posse credendum est. quoniam *Anastomoses* Natura semper abhorret, ubi similis humorum disgregatio perficitur. Quòd si ulla *Anastomosis* admitti debet, illa non inter venas & arterias, sed inter arterias solūm, vel solūm venas contingit. Sic frequentissimas reperiri in Mesenterio oculatissimus *Malpighius* observavit, & nos in marinae Testudinis intestinis copiosiores aspeximus.

Quid tamen ea de re sentiat *Higmorus*, ab explicatione *Fig. i. Tab. viii. Part. iii. Lib. i.* deduci potest; inquit enim ibi: *Vasa Renum in tenuissimos surculos divisa, & inter se connexa, à carne denudata, praedita membranā ambo inclusa, venae scilicet, & arteriae. Vacua inter illa ostenduntur spatia, quibus serum à vasis per exsudationem exclusum in pelvi per illorum parenchyma, quod spatia illa inania replet, percolatur.* Hoc autem quomodo fieri poterit, cùm evidenter ap-

pareat, humores per arteriam, & venam Emulgentem immisso usque ad superficiem Renis excurrere (*Fig. vi. CCC.*) ut fusius exponemus.

Et ad summum, quòd aliqua seri pars per illa vasa se-paretur concedi potest, non quidem per exsudationem, sed per capillares ramulos, qui inibi reperiuntur. Et haec ad aliorum Sententias spectare videbantur. Super-est modò, ut quid fortè fortuna in proprias manus inciderit, explicemus.

Habent Renes (ut cuique notum est, praeter Lymphae ductus, quorum progressum, & ordinem accuratior manus ostendet aliquando, & de quibus hic agere non est opus,) Arteriam & Venam Emulgentem à truncis Aortae, & Cavae descendantibus, & Ductus, seu canales proprios, à quibus substantia Renum efformatur, quam fibrosam Renum carnem imposterum appellabo.

Arteria, statim ac ad Renis portam devenit, dividitur in plures surculos, qui inter pelvis tunicas disperfi alios graciliores Ramulos (*Fig. i. CC. & D.*) producunt. Hi à pelvis tunicis erumpentes per fibrosam carnem feruntur, & circulariter illius partes amplectentes, rotundam figuram (*Fig. ii. CCC.*) aemulantur. Ab interna, & concava horum circulorum parte producent minores alii surculi (*Fig. i. & ii. ooo.*) qui similem formam exprimentes fibrofæ carni arctè connectuntur.

Vena eodem modo divisa (*Fig. i. BB. & NN.*) semper arteriae adjacet, simulque à pelvi emergentes tunicâ quâdam involvuntur, (*Fig. ii. CCC.*) ab ipsius membranis mutuata, quae in toto vasorum progressu venam, & arteriam in eadem vagina componit. Huc

usque animadvertisit etiam *Higmorus*, ut dictum est, eosque minores ramulos, à concava orbicularium parte erumpentes, apum loculamentis similes appellavit. Nos ulterius progredimur, & vasorum capillamenta disquirimus.

Ab externa igitur, & convexa horum circulorum parte tām Arteriae, quām Venae capillares (*Fig. XI. DDD.*) producuntur, quae ad extimam usquē Renis superficiem excurrentes, undequaque fibrosae carni miscentur. Hoc à nullis inventum esse jam patet, quin à *Vesalio* & *Higmoro* expresse negatur; inquit enim ille. *Vasa non ad extimam usque superficiem ferri, sed interius multò in Renum corpore permanere: Hic verò interiorem substantiam à vasis non superari, transcendique defendit.* Has autem usque ad extremum productiones videre primò poteris, si diligenter & patienter fibrosam carnem amoveris, eo prorsus modo, quo parenchyma jecoris, aliorumque viscerum cultro abraditur; tunc enim in brutis capillares ramuli evidentissimè conspiciuntur.

Quòd si certissimum experimentum velis, immitte humorem aliquem coloratum, tām in venam, quām in arteriam emulgentem, videbis illicò non solùm tumere Renem, quod ait aliquando *Laurentius*, sed per ipsius superficiem ingestum liquorem exsudare (*Fig. vi. CCC.*) si nempè propriam tunicam separaveris. Quin etiam si Renem secueris, filamenta quedam directa, eodem colore tincta, & fibrosae carni intermixta ad superficiem usque pertingere videbis. Et si liberis oculis intueri non placeat, admotum perspicillum rem evidentissimè demonstrabit. Si verò Vasorum alveolos inspicere desideres, poteris eodem

modo fibrosam carnem abradere; tunc tamen res non adeò feliciter succedet; plerique enim illorum propter arctam cum substantia connexionem lacerantur, & dividuntur. Felicius multò hoc assequeris, si, secto à sima parte per longum Rene usque ad Pelvis cavitatem, diligentioribus digitis pendentem fibrosam carnem (*Fig. III. D.*) removeris; tunc enim tām Vasorum majores circuli, quām minores, seu Alveoli (*Fig. II. CCC. & OOO.*) sese offerunt.

Ut verò ad *Renum substantiam*, quam huc usque affusionem vocarunt, veniamus: haec habe. Renes ex substantia dura, solida, carnosa, nullis fibris, vel saltē paucis intexta constare, communis est opinio. Res tamen aliter se habet; nulla enim alia substantia Renum est, quām infinitorum sui generis vasorum aggregatum. Sectō per quamvis partem Rene satis apertè conspicuntur fibrae quaedam, seu filamenta, à superficie externa ad cavum usquè Pelvis producta; quod ut clarius aspicias, aliquam ipsorum tenuem particulam digitis separare poteris (*Fig. x. AB.*) certoque certius apparebit, ab extima superficie usque ad Pelvis cavitatem hasce fibras esse continuas.

Hinc facillimè licet deducere, cur duplicitis esse substantiae Renes asseruerit *Higmorus*; cùm enim Vasa circularia, & Alveoli, ut dictum est, substantiae Renum connectantur, si ipsius partem aliquam nimis copiosam, & crassam separare velis, statim ac ad illa vasa perveneris, ulteriùs progredi non potes: hinc sequitur fibrarum laceratio & disruptio, remanentibus fibris externis, si à Pelvi separationem inchoaveris, internis verò si ab externa superficie.

Hae Renales fibrae, quae versus externam Renis

partem subrubro colore tingebantur, ubi Pelvim subiere, albedinem induunt, & invicem contextae, & implicantae (*Fig. III. D.* & *Fig. IV. CCC.*) desinunt in cavitate Pelvis non in plures papillulas divisae, sed in unum corpus abeuntes (*Fig. III. D.* & *Fig. IV. CCC.*) ne dum in ipsis brutis, verum etiam in homine (*Fig. VIII. BBB.*) quod quidem ab omnibus usque adhuc praetermissum est; admittunt enim tot distinctas papillulas pisí magnitudine, verrucae instar acutas, quot sunt Pelvis fistulae. Hoc tamen diverso modo se habet; ablata enim Pelvi tibi in conspectum veniet fibrosa Renis caro, non unum unitum corpus efformans, ut in aliis pluribus animalibus, neque in plures mamillulas distincta, ut plerique asserunt; sed inordinato, tortuoso, & implicito ductu, (*Fig. VIII. BBB.*) Pelvim undequaque circumdans.

Et quia hujus corporis aliqua portio à Pelvis fistulis aspicitur, hinc putarunt omnes cum *Faloppio*, Renem humanum pluribus hisce Papillulis donari, per quas tantummodo serum transcolaretur in Pelvim, cum tamen per universam mamillarem substantiam (*Fig. VIII. BBB.*) ab innumeris foraminulis (*CCC.*) illud effundatur, ut ejusdem papillaris corporis expressione innotescit.

Haec verò filamenta Musculum non esse, nec quid illi simile, facile demonstratur, cum nullis tendinibus, ligamentisque insigniantur, nullis inhaereant officibus, quod ad constitutionem musculi requirunt aliqui: Musculturum fibrae humiditate, elixationeque turgeant, & augeantur; fibrae autem Renum strigantur, & minuantur: illae firmiter secundùm longitudinem contextae, & tractioni resistentes sint; istae fria-

friables, & molles, & cùm denique sensibus pateat, fibras hasce Musculos non esse, sed meatus, & canaliculos.

Si igitur haec filamenta ab altero illarum extremo, Pelvim scilicet spectante, compresseris, inspexerisque, aquam uberrimè profilientem (*Fig. III. D. & IV. CCC.*) intueberis. Hanc si lingua persentire non reformides, falsedinem quandam, & in paucis urinae saporem invenies. Hoc idem experiri poteris, si Renis corpus per transversum secueris; tunc enim etiam videre licebit à Renalibus ductibus, eo modo divisis, eundem succum prodire, ejusdem planè qualitatis, ejusdemque naturae. Disces hoc multo faciliùs, si oculo perspicillum admovearis; tunc enim compressis tubulis prodiens urina, quasi ex tot siphunculis effusa (*Fig. V. CCC.*) aperi-
tissimè aspicitur.

Ex quibus evidenter inferre possumus, substantiam Renum, quam usque dum parenchyma nuncuparunt, nihil aliud esse, quàm (licet reclamat *Higmorus.*) canaliculorum, & capillarium meatuum, per quos urina in Pelvim effluat, aggeriem; cùm enim manifestè constet, fibras illas à cavitate Pelvis usque ad extimam superficiem produci (*Fig. X. AB.*) atque eas perforatas esse ex effluente lotio evidenter deducamus. Quid nobis certius ipsis sensibus esse potest, quo tales fibrillas veras esse fistulas & canaliculos, serum in Pelvim effundentes, discamus?

Et hinc clarissimè patet quàm sit absonum, & à veritate remotum effatum illud, cui plerique assentiuntur, Renes carnosos esse, similes cordis vel hepatis parenchymati, nullis fibris intextos; neque enim in iis carnem reperias, nullamque habent cum corde,

vel hepate convenientiam, fibrisque & canaliculis conflantur.

Et haec, *Erudite Lector*, de Renibus habebam recensenda ab aliorum scriptis, sed non à veritate discrepantia: quae si nova sunt, absit quod ineruditus juvenis ingenio hoc inventum, ne per somnium quidem imaginantis adscribas; solum hoc est fortunae donum, cuius favore me primum hujus fabricae repertorem esse, laetari possum.

Renum *Usus* adeò verè ex ipsorum constitutione etiam externa deduci potest, ut nemo sit unus (demptis *Erasistrato*, & *Asclepiade*, ut dictum est) qui ipsos serum à sanguine separare non afferat. Solùm, quomodo ista segregatio conficiatur, dissentunt. Propria vi Renum illam fieri dicit *Galenus*: in foraminum angustiam, serique subtilitatem illam refundunt *Benedicti Cribri* repertores, facultate Renibus innata, propria ad justitiam temperie, formaque essentiali illam perfici adstruit *Vesalius*: Sanguinis retentioni, serique expulsioni illam tribuit *Laurentius*: à portione atrae bilis in Renalibus glandulis contenta illam promoveri putat *Veslingius*, aliique alia arbitrantur.

Quòd si propriam de hoc sententiam exposcas, non is ego sum, qui in re tam ardua, & diffīcili quicquam in medium afferre possim; neque enim tanti nostrum est ingeniolum, ut non evidenti, & tantum probabili opinione tot Anatomiae patribus valeat adversari. Solùm hīc referre libet, quid superius laudatus *Borellus* ex hac inventa Renum constitutione ad serum separandum ducat. Certum, inquit, est, sanguinem è sinistro cordis ventriculo tanto cum im-

petu

petu per universi corporis arterias effundi, ut usque ad minima, & tenuissima capillarium arteriolarum oscula perveniat.

Per truncum ergo descendens Arteriae fluens sanguis Emulgentem (*Fig. I. AA.*) irrumpt, ex qua Renes penetrans usque ad ipsorum superficiem per subtilissimas arteriolas (*Fig. XI. D.*) progreditur. Hic verò cum illarum oscula pateant, nec mutua cum venis Anastomosi conjungantur (injecti enim per emulgantia vasa liquores, à capillaribus osculis exsudare in superficie Renis videntur (*Fig. VI. CCC.*) amota propria tunica,) sanguinem extra vasa effluere necessum est in spatiolum, (*Fig. VI. CCC.*) quod licet sensu percipi non possit, reperiri tamen & ratio persuadet, & perspicillum manifestè confirmat. Desinunt ad idem spatium tām capillares Venae Emulgentes (*Fig. XI. DD.*) quām Renales ductus, (*Fig. X. B.*) quos diximus, ambo enim haec vasa ad extimam superficiem terminari, demonstratum est. Cū ergo sanguis extra arterias prodierit, duplicem vasorum ordinem offendit, Venalem scilicet unum, Renalem alterum. Serum itaque Renales ductus ingreditur à sanguine separatum, sanguisque venas subit à seroso humore sejunctus.

Haec verò secretio non per attractionem, non per familiaritatem, non per sympathiam contingit, sed unā, & solā vasorum configuratione hoc expetente perficitur. Quae omnia adeò evidenter confirmari possunt, ut nullus deinde futurus sit dubitationi locus. Quod igitur serum, & sanguis sua sponte sine ipsorum attractione vasa percurrent, quis inficiabitur? habemus enim experimenta, quibus id fieri posse de-

demonstratur. Si namque, ut unum adducam, angustissima fistula vitrea, vel siphunculus, aquae erexit, vel inclinatus insistat, continuo ascendentem aquam, licet ad attractionem confugere non possis, aspicies. Cum ergo ductus illi Renales (*Fig. x. B.*) & Venulae (*Fig. xi. D.*) siphunculis quibuscumque subtiliores hient ad spatiolum (*Fig. vi. CCC.*) in quod sanguis ab arteriis evomitur, cur humores sine attractione sponte sua in canaliculos illos induci non licet?

At, inquies, esto talis in vasa penetratio more siphunculorum sine attractione contingat, quomodo tamen sanguis in Venas, serum in Renales ductus immittitur? Hoc verò facillimo, & brevi negotio absolvi potest, cum ex diversa meatuum configuracione isthaec introductio proveniat. Neque enim sufficit, ut *Erasistratus* asserebat apud *Galenum*, ad diversi humoris separationem, Vasorum ora esse variae capacitatis, ita ut sanguis v. g. in Renibus ideo Renales ductus non subeat, sed Venas, quia ipsius minimae particulae ab angustis eorum meatuum osculis excipi non possint; nam plurimis experimentis comprobari posset, poros angustissimos à rebus subtilioribus non penetrari, licet ipsos crassiora pervadant: rursusque à poris satis patentibus, & laxis subtilia non admitti, quamvis minus tenuia introducantur. Sic quantae sunt angustiae Auri porositates? adeò illae sensum effugiunt, ut prorsus non reperiri aliqui contendent; & tamen Mercurius poros illos penetrat, quos non aqua, non aér, nec ulla Hydrargyro subtiliora possunt pervadere. Rursus quantae sunt amplitudinis pori vesicarum, & pellium? Ab his tamen exsudat aqua, licet exitum aëri

aëri tenuiori nunquam concedant. Unde patet ad sensum, majorem vel minorem oscularum angustiam nihil omnino ad hujus, illiusve humoris penetrationem facere, nisi etiam partium, quae introduci debent, figurae accommodetur.

Cùm ergo Renales ductus, & Venae ad spatiolum illud (*Fig. vi. CCC.*) terminentur, ubi sanguis sero permistus ab arteriis effluit, inveniatque terum siphunculos illos Renales sibi proportionatos; itemque sanguis Venas sibi accommodatas obtineat, mirum non est, si uterque liquor in sua vasa deducitur, nulla attractione, vel familiaritate cogentibus. Quia tamen haec in Renales, Venalesque meatus introductio expressioni ipsius seri in Pelvim, nec reductioni ipsius sanguinis in cavam sufficere poterat, (in Renum enim sectione constat, ex Renalibus ductibus nihil effluere, licet sero impleantur, nisi ipsos digitis constringeris,) natura consultum est, ut quemadmodum in foeminarum papillis contingit, quae licet lacte turgeant ad dolorem usque, non tamen illud effunditur, nisi constrictione, & compressione exprimatur; ita planè in Renibus licet ductus illi urinâ intumescerent, ipsa tamen sine expressione non efflueret. Haec autem vis exprimens respirationis ope facilimè obtinetur, tumefactis enim pulmonibus, & thorace, à distento dia phragmate impellitur abdomen, ex cuius expressione à visceribus omnibus suppositos Renes comprimi necesse est, quorum compressione, & uberrimus sero fluxus in Pelvim, liberque sanguini regressus in Cavam conceditur.

Haec sunt, quae breviter quidem, & obscurè, nec satis pro ipsius inventi merito ex multis aliis, quae

ex mente ejusdem doctissimi capit is re censenda essent,
 & quae in ipsius de *Motu Musculorum* libro demonstrata
 leges, ipso annuente placuit aperire: quae quam apte
 veritati consonent, & naturae respondeant, disce ex
 jam dictis, dicendisque in eodem de *Motu Musculorum*
 libro longè melius addisces.

LAUS DEO.

FIGURARUM
EXPLICATIO.

FIGURA I.

Ren vervecinus à sima parte per longum sectus, &
 Pelvi denudatus, ut vasa videantur.

AA. Arteriae Emulgentis rami majores.

BB. Venae Emulgentis rami majores.

CC. Divisio Arteriae in plures minores surculos.

D. Aliae minores Arteriae à dictis surculis procedentes.

*EE. Extrema fibrosae carnis filamenta ad superficiem
 Renis desinentia.*

NN. Venae Emulgentis ramuli.

*OO. Vasa minora, quae Apum loculamentis Higmoro
 comparantur.*

FIG. II.

Ren Vervecinus à sima parte per longum sectus, à quo
 fibrosa caro ad Pelvum pendens separata est, ut ro-
 tundae vasorum divaricationes appareant.

AA. Ren

AA. Ren per longum sectus.

BB. Pelvis discissa.

*CC. Venae, & Arteriae Emulgentis Ramuli tunica
Pelvis involuti, & orbicularem figuram exprimentes.*

*OO. Vasorum minores circuli, seu alveoli, à majori-
bus procedentes.*

FIG. III.

*Ren vervecinus à sima parte per longum sectus, ut fi-
brose carnis unio ad Pelvim appareat.*

AA. Ren per longum sectus.

BB. Pelvis divisa.

*D. Fibrosae carnis, seu Renalium ductuum unio, &
textura in Pelvi.*

FIG. IV.

*Renalium ductuum extremitas, quae papillare corpus ad
Pelvim constituit.*

A. Papilla Renis vervecini separata.

BB. Pars inferior adhaerens Alveolis.

*CC. Papillae extremitas albicans, in qua omnes Re-
nales ductus terminantur.*

FIG. V.

*Ejusdem papillaris corporis portio conspicillo visa, &
digitis expressa.*

AA. Papillae pars ut microscopio repraesentatur.

*CCC. Guttulae serosae ab illa portione papillae albi-
cantis erumpentes.*

FIG. VI.

*Vervecini Renis superficies conspicillo visa, postquam
in Emulgentes injectus est humor coloratus.*

AA. Renis superficies ut microscopio repraesentatur.

BB. Spatiola inania.

*CCC. Sinuli quidam vermiculares & tortuosi dicta spa-
tiola*

tiola circumambientes, & in quos humor infusus eructari cernitur.

F I G. VII.

Renis humani ab Uretere ad Pelvim usque per longum secti aspectus.

A A A. *Ren dissectus, ut dictum est.*

B. *Ureteris dimidium ad dextram reflexum.*

C. *Alia Ureteris medietas ad sinistram inclinata.*

D. *Venae Emulgentis ramus.*

E. *Arteriae Emulgentis ramus.*

F. *Alter venae Emulgentis ramus.*

G. *Pelvis aperta.*

HH. *Quaedam papillaris corporis portiones à Pelvis tubulis conspicuae.*

I. *Principium Ureteris.*

F I G. VIII.

Humani Renis medietas Pelvi, vaseisque plurimis liberata, ut unio, & coitus tortuosus Renalium ductuum repraesententur.

AA. *Extrema filamenta ad extimam superficiem desinentia.*

BBB. *Renalium ductuum coitus, qui papillare corpus tortuosum efformat.*

CCC. *Guttulae seri à papillari corpore digitis expresso, effluentes.*

F I G. IX.

Ejusdem papillae portio separata.

AA. *Fibrarum extremitates ad superficiem Renis protensae.*

BB. *Albicans ejusdem papillae pars, ex qua*

CC. *Guttulae seri elicuntur.*

FIG.

FIG. X.

Cervinae papillae albicans portio à Rene separata.

A. Cervinae papillae albicans pars, ex qua serum exprimitur.

B. Filamenta ejusdem à Pelvi ad usque Renis superficiem continua.

FIG. XI.

Vasa Cervini Renis à gibba parte per longum secti à fibrosa carne liberata.

AA. Pelvis.

BB. Ejusdem productiones, & processus, quibus emulgentia vasa vestiuntur.

C. Vasa Apum alveolos referentia.

DDD. Vasa capillaria ad extimam Renis superficiem excurrentia.



APPENDIX
AD
TRACTATUM
DE
RENIBUS.



B singularem materiae affinitatem, placuit, Tui in gratiam, *Lector curiose*, erudito magnaenque aestimationis Tractatui de Naturali Renum partiumque ipsis inservientium constitutione à *Viro Excellentissimo Domino Laurentio Bellini, Florentino*, conscripto, publicumque in commodum typis edito, addere exemplum unum atque alterum Renis, ipsique conjunctarum atque in usu famulantium partium male figuratarum, prout ea ab Authoribus fide dignis tradita legimus. Selegimus autem, quae praecipua judicavimus, considerationemque nostram magis aliis mereri visa. Imo Tractatus principioris exiguitas additamenti magnitudini repugnabat, huic itaque me accommodare coactus. Quod etiam nulla alia adjecta videoas, licet magnus satis eorum numerus apud scriptores se exhibeat, quam quae figuris declarantur, Bibliopolae curiositas effecit, praeterquam quod semper accepta maximè dictorum per ocularem inspectionem, aut illâ negatâ, figurarum additionem, explicatio & confirmatio.

Sunt

Sunt autem Authores, ex quibus haec nostra desumimus. *Dominus Casparus Bauhinus Basiliensis, Doctor, ejusque Academiae Anatomiae & Botanices Professor ordinarius.* Dn. Leonhardus Botallus *Astensis, Phil. & Med. Doctor, Christianissimi Regis CAROLI IX. Serenissimae Reginae, & Invictissimi Ducis Brabantiae, Consiliarius & Medicus.* Dominus Thomas Bartholinus *Hafniensis, Med. Doct. & Professor Regius Honorarius Facultatis Medicae in Academia patria Decanus perpetuus.*

**C L A R I S S I M U S
CASPARIUS BAUHINUS,
I N
THEATRO SUO ANATOMICO, HAEC
TRIA NOBIS EXHIBET.**

I. **F**IGURAM Renis pueri, qui quarto post partum die in Nosodochio *Argentinensi* Anno m. DC. II. mente Decembri, obiit, & à Doctore *Joanne Rudolpho Saltzmanno* apertus fuit, qui quidem sugebat, sed nihil per alvum aut vesicam ejiciebat: in quo intestina flatibus distenta, podice non pervio: Renes in octo partes lineis distinguebantur: ureteres sero distenti ad vesicam angustissimi, ita ut non nisi vi stylum parvum admitterent, muco referti seri transitum intercludente, sic in vesica non nisi mucus, non tamen copiosus repertus est.

EXPLICATIO FIGURAE XII.

- A. *Renis corpus octo lobis constans.*
- B. *Ureter sero distentus.*
- C. *Vasa emulgentia.*
- D. *Ureteris pars inferior praeter solitum angusta.*

II. Renum mirandam formam, quam à Clarissimo Philosopho & Medico *D. Leonardo Doldio*, Noribergensis Reipublicae Ordinario, accepit. Talis autem forma Renum & Ureterum reperta fuit in cadavere *Andreae Helm Weissenfelsensis*, qui anno M. DC. II. XVII. Octobris, aetatis suae anno decimo sexto Norbergae mortuus est, posteaquam ex ictu in ventrem supra pubem accepto diurno morbo laborasset: & post mortem apertus, talis Renum forma se exhibuit, & puris copia circa utrumque inguen tanta reperta, ut mensuras duas Noribergenses aequaret. *vide Figuram XIII.*

III. Naturae lutum in Vasis Emulgentibus, & Renis sinistri situ, prout in publica sectione ipsi occurrit.

EXPLICATIO FIGURAE XIV.

- a. *Ren dexter.*
- b. — *Sinister.*
- c. *Substantia glandulosa & adiposa, quae erat loco Renis sinistri.*
- d. *Vena Cava.*
- e. *Arteria magna.*
- f. *Ve-*

f. Vesica urinaria.

gg. Testes.

1. 2. Emulgens vena dextra gemina, quarum prima gemino est exortu.
3. Arteria Emulgens dextra.
4. Vena Emulgens sinistra.
5. Arteria Emulgens sinistra.
6. 6. Emulgentes venae duae ad sinistrum Renem.
7. 8. Arteriae Emulgentes sub bifurcatione ad Renem sinistrum.
9. Emulgens vena sinistra quarta.
10. 10. Spermatica vena dextra.
11. Spermaticae venae exortus.
12. Ejusdem conjunctio cum Vena.
13. Vena spermatica sinistra.
14. Arteria spermatica sinistra.
15. Vena à spermaticâ sinistrâ ad peritonaeum, comite arteriâ.
16. Venae spermaticae cum Emulgente unio.
17. Vasa deferentia.
18. Ureteris dextri insertio.
19. Ureteris sinistri exortus.
20. Ejusdem implantatio.

EXPERIENTISSIMUS
LEONARDUS BOTALLUS
 OBSERVATIONE ANATOMICA PRIMA,
 D E
M O N S T R O S O R E N E
 H O C H A B E T.

FFLAGITANTIBUS ex me nonnullis artis medicae studiosis, ut, dum licet, in cadavere ostenderem, quomodo os capitis perforandum esset, dum res ipsa persuadet: quaque arte puri, vel sanguini, in thorace retentis, exitus detur, ut in empyicis seu suppuratis, vel ea parte vulneratis: qua item industria, in inferiore ventre in hydropicis aqua exhaurienda veniat: ac quomodo varices, vel aliae tum venae, tum arteriae, quarum munus prorsus interdicere ars medica instituit, amputandae essent, de quibus aliquando sermonem feceram; non potui non illis morem gerere hac in re.

Oblatum ob id mihi cadaver fuit, ex quo, praeter id quod in eo, quae supradicta sunt, ostendi: caeteras partes anatomicas invisas prorsus iri; aequum fore minimè putans, universum corpus dissectioni subjeci. Ubi verò ad renes pervenimus, adeò in iis lusisse naturam vidimus, ut admirationem non levem omnibus spectantibus pareret, parietque item omnibus anatomicae dissectionis peritis, eorum speciem intuen-

tuentibus: quam dignam esse judicavimus, ut ante hominum conspectus prodiret. Fortuitum fuit, ut cadaver hoc, in manus meas inciderit, quod ejectum fuisset non reiecta tam monstrofa, atque omnibus anteactis aevis invisa, renum effigie.

Accipe igitur, lector benevole, schema renis non commentitium, neque fictum (ut nonnullis ex famigeratissimis Medicis Parisiensibus sensu constitit, videlicet dominis Gorraeo, Magno, & Baldichio, insuper & scholasticis innumeris, cadaveris sectore *Jacobo Dyoneo*, juvēne sanè docto, artisque medicae studiosissimo) immò ab optimo proboque pictore, fideliter accurateque à naturali delineatum conflatumque, à me subinde characteribus insignitum, atque jacet; quo minore negotio, à quovis artis anatomicae non prorsus imperito, totius compositionis ratio perciperetur. Quatuor enim sunt renes in una mole conjuncti, sinibus tamen atque vasis inter se divisi, ut figura ostendit. Plures adhuc existabant propagines ab emulgentibus, quām sint notatae, verū propter earum exiguitatem, patentes tantum produci volui.

Non est quod hic pluribus verbis agam, in exaranda causa tam deformis alienaeque à recto naturae ordine compositionis, quum aequam natura potestatem habeat, aequamque potentiam supra renes, atque supra alias corporis partes, (*a*) quas quandoque geminat, interdum mutilat, aliquando maiores, minores interdum, nonnunquam à naturali figura prorsus alienas facit: & haec vel ob materiam praenimiam, vel ob hujus defectum vel ob ejus impeditam actionem, quae variis causis intercipi potest, quas enumerare hic supervacaneum esset, cùm eas cuique licet

ceat colligere ex *Aristotelis Physica*, tum è *Lib. de Generatione animalium C. 4.* Quod hīc adhuc nobis dicere conveniet, est, nos posse putare hunc hominem fuisse (b) salacem, ob vasorum seminalium abundantiam: practerea, quòd si diutius vixisset (quod illi fortè natura concessisset, cùm optimo corporis habitu in caeteris constituisse, sed sicarium trucemque factum jus laqueo de medio abstulit) censendum est crure sinistro fuisse tumoribus (c) oedematosis subditum, propter E-mulgentem, quae supra Renem ferebatur, in femorali statim insertam: nam interea dum naturalibus adhuc viribus pollebat (non enim supra quadragesimum annum vixisse facies ostendebat) sugebat ren validè serosum humorem: interea & si aliquid labebatur, facilè exercitio, & nativo calore robusto, in halitus absumebatur, quod non aequè praestitisset, si aetatem virilem egisset. Ventriculo etiam praegrandi, toto corporis habitu carnosus ac firmus. Tibias, seu majora focilia crassā habebat ultra modum, & teretem figuram habentia; fibulas verò minores, quam corporis habitudini conveniret: & lien, praeter vasa, quae in ore superiore ventriculi (d) communiter inseruntur, alia duo habebat satis manifesta ad fundum infixa.

CHARACTERUM

FIGURAE XV.

EXPLICATIO.

A. Vena cava.

B. Arteria magna, sive aorta.

CCCC.

CCCC. Vena emulgens sinistra, quae in' renem non fertur, sed multas in eo propagines inserit, ipsa vero deorsum procedit, cuti renis adhaerens, tandem in femorariam infigitur juxta Q.

DD. Vena emulgens dextra, quae & ipsa supra renem fertur usque ad literam X. ubi in inferiorem dextrum sinum dispergitur.

E. Vena adiposa.

F. Arteria seminalis dextra.

g. Arteria seminalis sinistra.

Ggg. Venae seminales sinistrale quae invicem junguntur & una fiunt in f.

f. Locus ubi junguntur simul aliquot venae seminales, & una tantum fiunt, exortae ab emulgente sinistra.

HHHH. Propagines variae ab emulgente dextra & sinistra productae, quae disperguntur in superiorem sinum.

IIII. Seminales dextrae, quarum duae à vena Chili, & duae ab Emulgente in unum coëuntes in d.

d. Locus unionis seminalium ex dextra parte insurgentium.

KK. Arteriae geminae insertae, altera in summitate Renis dextri, & altera in summitate sinistri.

LL. Propagines multiplices ureterum, quarum pars à supremo sinu prodit, pars vero ab inferiore, coëuntes juxta p.

p. Locus ubi uniuntur varii ureterum processus, exsurgentes ab utroque sinu dextro.

MMMM. Exortus sinistrorum ureterum superiorum nempe & inferiorum, qui in (a) copulantur.

a. Locus conjunctionis ureterum sinistrorum.

N. Altera emulgens sinistra quae in superiore sinu infigitur.

O. Arteria quae implantatur inferiori sinistro sinui.

PP. Productiones venarum, insurgentes ab emulgente sinistra, sinistro infimoque ventriculo, seu sinui instatae.

QQ. Femorales venaे nimirum dextra & sinistra.

RR. Femorales arteriae, dextra scilicet & sinistra.

T. Locus ubi infigitur arteria una, notabilis magnitudinis, à magna arteria producta, in parte tamen supposita quae superjacet arteriae & venaē magnis: arteria autem magna incipit intra O & N. ex surgere supra venam cavam ut in schemate patet.

V. Locus superioris ventriculi seu sinus dextri renis.

X. Inferioris dextri sinus locus.

Y. Inferioris sinistri sinus regio.

Z. Regio superioris sinus sinistri.

Ad haec quas edidit annotationes Vir Celeberrimus, Anatomicus summus D. Joannes van Horne, Medicinae Professor in Acad. Lugduno-Batavā, cùm quàm maximè ea illustrare deprehendam, utiliter hīc adjici censeo: sunt ea sequentia.

* *

(a) Quanquam Anatomicorum diligentia, rari & admirabiles Naturae lusus in partibus nostri corporis fuerint detecti, cuius fidem facit Cl. Riolani discursus de omnimoda transpositione partium naturalium & vitalium, in cadavere sicarii, anno 1650. Parisiis dissecti, reperta: nusquam tamen feracior solet esse & frequentior, quàm in variandis renibus, vaseisque ab iisdem prodeuntibus. In his namque saepenumero peccat in excessu, saepe etiam in defectu, sive quod ista variatio non multū possit obesse corporis oeco-

no-

nomiae, sive quod in formandis iis partibus spiritus formator modò plus modò minus materiae reperiatur, quàm pro natura partis; eam namque causam auctarum aut deficientium partium tradit Aristot. 4. de Gener. anim. C. 4. Exemplum numeri aucti exhibet nobis praesenti observatione *Botallus*: similiter *Barthol. Eustachius L. de Renibus Cap. 10.* tres se vidisse renes testatur; & *Gemma L. 2. Cyclognom C. 6.* tales depingit *Bauhinus Tab. 1v. Fig. 1. Appendicis.* Idemque *Gemma Lib. 1. Cosmocrit. C. 6.* ait, quatuor aliquando reperiri. Contrà, unicum à se repertum fuisse renem memoriae prodiderunt *Carpus in Isag. Anatom. Stephanus de Differ. part. corp. hum. L. 2. C. 15.* *Fernel. de part. corp. hum. Descript. C. 6. Eustachius, C. 10. § 41.* *Panarolus L. 1. obs. 3.* & ego, anno 1656. dextrum tantum in cane offendì. Mirum est, quod *Vesalius Lib. 5. C. 10.* scribit se observasse in habentibus ventrem impensè prominulum, & vitiatum costarum ductum, unicum interdum renem in medio positum, reperiri. Propius accedit ad *Botalli observationem*, ea quae exstat *Hist. 77. Cent. 2. observ. Anatom. Bartholini.*

In Ureteribus diversitas non raro occurrit, ut testis est *Cl. Riolanus Anthropog. L. 2. C. 27. Panarolus L. 1. obs. 4.* & mihi anno 1656. in cadavere decollati dexter Ren dupli uretere praeditus, conspectus est, qui tam ambo propè vesicae ingressum conjungebantur. De multiplicitate venarum & arteriarum Emulgentium nihil addo, quia res est vulgarissima. Icones habet *Bauhinus in Append. figurarum Tab. 1. 2. § 3.*

(b) Ratio salacitatis insufficiens videtur, desumpta à numero venarum seminalium, siquidem, ut ordinariè solet, unica tantum hic adfuerit arteria sperma-

matica: in hunc errorem similiter lapsus est *Salomon Albertus* in schemate Renum & Venarum Emulgentium, historiae partium corporis humani, editioni ultimae anni 1602. subjuncto. Veriorem dabat olim Celeberrimus *Pavius*, hujus Lycae Anatonicus meritissimus, nimirum foecunditatis causam referebat, ad arteriae spermatica magnitudinem decuplo majorem vulgaribus duabus, in cadavere suspensi à se inventam, referente *Hoffmanno Comm. de us. part. n.* 1013. Alia Salacitatis causa in cordis calore quaerenda est, à quo peccatum, etiam in mulieribus, pilis hispidum redditur non nunquam, teste *Panarolo P. 5. obs. 37.* praeferunt si in corpore adfuerint humores falsi & mordaces, ut egregie censem *Lemnus de occ. nat. mir. L. 2. C. 36. § 37.*

(c) Conjectura admodum infirma est, quam de tumoribus oedematosis sinistri cruris adfert *Botallus*, praeterquam enim quod tales à sero non proveniant, sed à pituita, etiam per arterias debebat humor in crus effluere, juxta doctrinam de sanguinis circulatione. Nunc verò sanguinis portio per cruralem sinistram refluxi, factâ aliquali digressione per emulgentem sinistram, iterum supra renes venae cavae descendenti infundebatur.

(d) Nulla ejusmodi vasa dantur, quae à Liene profiscuntur, & in superius ventriculi orificium inferuntur. Intelligit enim vasa vulgo dicta brevia, quae & plura sunt, à vasis splenicis versus ventriculum reflexa, & fundo inferuntur è regione Lienis collocato. Vide *Barthol. anat. Reform. L. I. C. 9.*

CLARISSIMUS
THOMAS BARTHOLINUS

Hist. anatomi. Cent. 2. Hist. LXXVII.

*De Rarâ Renum, & capsularum atrabiliarium
structura hoc proponit.*

NOLIM in numero monstrorum foeminam habere, *Aristoteles* naturae aberrationem vocavit. Alii homines esse pernagarunt. Omnes in sexum cognati generis injurii. Valde tamen in mulieribus ludit natura, illarumque partibus generationi dicatis. In cadavere muliebri *Patavii* 1643. dissecto, raram omnino renum & capsularum atrabiliarium structuram observavimus. Renes utroque latere more solito siti, in unum concreverant supra divisionem vasorum in ramos iliacos. Pelvis ureterum extra renes conspicua, triplici ramo ex renibus egrediebatur. Capsulae atrabiliariae quatuor numerabantur. Superior dextra, triangularis; sinistra, quadrata. Inferiores duae rotundae, globosae & inaequales, quae arterias à trunco, venas ab emulgentibus accepere. Emulgentium venarum numerus insolitus. Vena dextra emulgens triplex sed exilis, sinistra simplex, crassior, sed ante ingressum trifida. Arteria emulgens dextra duplex, sinistra solitaria, sed pari modo ante ingressum divisa. Vena spermatica dextra ex trunco orta, in medio divisa, iterumque deinde unita. Vena sinistra dupli exortu insignis ex emulgente sinistrâ. Arteriae spermaticae nullae. Singularis quidam ramus ex inferiore concursu renum ad iliacum ramum protendebatur. Quae ut clarius demonstrentur, figurâ adnexâ singula ante oculos ponere constitui.

E X P L I C A T I O
F I G U R A E X V I .

- A Arteria magna descendens.
- B Vena cava descendens.
- C Capsula atrabiliaria dextra.
- D Capsula sinistra.
- a Vena ex cava ad capsulam dextram.
- bb Venae ab emulgente ad capsulam sinistram.
- c Ramulus qui jungitur cum ramulo venae $\alpha\zeta\upsilon\gamma\circ$.
- dd Arteriae duae ab emulgente arteria dextra.
- e Arteriae ramus ab emulgente sinistrâ.
- E Arteria emulgens dextra superior.
- F Arteria emulgens sinistra.
- G Emulgens vena dextra prima.
- f Emulgens secunda.
- g Emulgens tertia.
- H Vena emulgens sinistra.
- I Ren dexter.
- K Ren sinister.
- L Renis utriusque concensus p. n.
- M Capsula atrabiliaria prima.
- N Capsula altera minor.
- hhhh Arteriae ex aortâ capsulis insertae.
- i Arteria emulgens dextra inferior.
- k Vena spermatica dextra.
- OO Pelvis ureterum.
- PP Ureteres.
- Q Arteriae in ramos iliacos divisio.
- l Ramus singularis ex rene ad venam iliacam.
- m Vena spermatica sinistra.

F I N I S.

LAURENTII BELLINI
FLORENTINI
GUSTUS ORGANUM
NOVISSIME DEPREHENSUM;
PRAEMISSIS AD FACILIOREM INTEL-
LIGENTIAM QUIBUSDAM DE
SAPORIBUS.

1711
MICHAELE
MICHAELE
MICHAELE
MICHAELE

LAURENTIUS BELLINUS

LECTORIS.

BN, amice Lector, quid luserint Musae meae, quod oculis tuis subjicitur, non ut abs te commendationem, & plausum extorqueat, sed ne tua vota frustrentur, dum quidquid in alienas manus incidit, ad rem anatomicam spectans, novisse desideras. Id, qualecunque sit, aequi bonique consulas velim, sicut aequi, bonique te consulturum spero; cum etiam nugas meas de Renibus non humaniter solùm exceptas videam, sed & amplissimis Amstelodami, Argentoratiq[ue] typis illustratas, & per virum Clarissimum, doctissimumque Gerardum Blasium (quem hic honoris, & grati animi titulo commoratum volo) appendice monstrorum Renum exornatas; quo mihi perhonorifico facto summopere meum ipse gratularer, nisi cognoscerem, id ab eruditorum candissimis nimis potius: quam à rei promeritis provenire: in qua, ut alia mittam plurima vel illud maximam imperfectionem, quod cum Anatomicorum opiniones recensere mihi proposuerim, Bartholomeum Eustachium sicco pede praeterierim, quasi de Renibus libellum non scripserit. Quid faciam, tamen, si rarissimum illud opusculum me latuit, & latuisset adhuc, nisi Serenissimus Ferdinandus Magnus Dux Hetruriae (quem majoris obsequii gratia ita memoro, cùm titulum non inveniam ipsius amplitudini parem) dono acceptum mihi legere permisisset pluribus post editionem mensibus, cùm

non dabatur ejus accuratissimi & eruditissimi Viri sententiam tractatui meo inserere, & quod mecum conveniret, aut dissentire videretur, exponere, quod viris ingenuis gratiosum accidisset, & mihi occasionem praebuisset apertius, & fusiis opinionem meam explicandi, quaedam pro re nata adjiciendi, & eadem argumentis aliis confirmandi. Hinc factum est, ut statim ac tractatiunculam illam tam honorifice acceptam sensi, stimulos, animosque adjici mihi sim arbitratus ad haec, quae p[re]e minibus versabantur evulganda, non dubius, quin parem gratiam, & humanitatem apud viros eruditiores sortiri debeant, quibus & alia nostra non omnino sorduerunt. Haec igitur excipe, ut soles, & si pauca reperias, scias hunc unum constitisse animalium, ut plura non scriberem, cum mihi satis fuerit in priori quidem hujus opusculi parte concludere; saporem in compositis ab uno quidem sale praecipue, sed caeteris eorundem compositorum particulis immisto, proficisci: in posteriori vero Gustatus instrumentum educere, quod semper antea latuerat, ultrò permittens tibi plurimo conclusiones, quae deduci possunt non inelegantes. Si quae reprehendenda detegas, ut deteges fortasse non pauca ne statim ad contemptum, & diras venias, sed in memoriam revoca ejus esse conditionis libros penè omnes, ut in iis.

Sint bona, sint quaedam mediocria, sint mala plura: Unius veritatis pretio caeterarum rerum levitatem compensari; obstat enim scribentibus genium concitatiorem & impetum vividioris animi, qui in me fratri adhuc impatiens tractari se se non finit: impedimentum rectae meditandi rationi adeo meherculè validum, ut nemo fuerit unus, qui postquam aetas deferbuit, &

accuratam magis contemplationem admiserunt positi spiritus, aut non doluerit juvenilibus annis scripsisse, aut non mutaverit pleraque, aut saltem tentaverit num cum annis nova accesserit sapientia: Sic Tullius meo quidem judicio philosopho quolibet sapientissimo non minor Rhetoricos suos, exemplar scilicet bene dicendi, sibi elapsos queritur. Quintilianus sublimis animi vir, admirabilis doctrinae aliqua tantummodo in Institutionibus; quas habemus à se relictā testatur ex iis, quae in duobus artis Rhetoricae libris sub ipsius nomine ediderant boni quidem juvenes, ut ipse loquitur, sed nimium amantes auditores sui: caeterum multa mutata, plurima adjecta, omnia compositiora, & elaborata. Seneca eximus ille moralis disciplinae, inter omnes videlicet praecipue magister, cùm de motu terrarum volumen, juvenis memoriae prodidisset, tentare voluit, & experiri jam senior, an aetas aliquid sibi aut ad scientiam, aut certè ad diligentiam adjecerit. Adeò verum est Demeae illud apud Terentium.

Nunquam ita quicquam bene subducta ratione ad vitam fuit,

Quin res, aetas, usus, semper aliquid apportet novi,
Aliquid moneat, ut illa, quae te scire credas, nescias:
Et quae tibi putaris prima, in experiundo repudies.

Hinc factum est, ut in rebus hisce dubiis nunquam tantum mihi tribuerim, ut quicquam titulo veritatis insigniverim, sed semper intra verosimilitudinis, ac probabilitatis limites me continuerim, cùm ultra exempla doctissimorum hominum idem modò affirmantium, modò negantium, modò respicientium, quòd antè arriserat, doceat me Rex, quem tamen nos sapientissimum dicimus, se plurimum à sapientia semper abfuisse cum

di-

dicto : Dixi sapiens efficiar & ipsa longius recessit à me multò magis quam erat, & alta profunditas, quis inventiet eam? quare si inter tot ignorantiae tenebras aliquod hic veritatis lumen effulget, fruere, ut libet; caetera condona humaniter, & eorum in sensu habe, quae per aetatem & usum in experiundo repudiem. Denique si quid minus emendatè, minus exactè impressum offenderis, cogita, quale sit typorum negotium, & quam facile subrepant errores in compositione verborum tantò magis, quod me Florentiae commorante, Bononiae, ut vides, impressio peracta est per epistolas, per internuncios, per amicos (quorum accuratissimae equidem diligentiae maximum me debere lubens fateor, cùm difficile sit, quanta opus fuerit patientia ad ritè percipiendum M. S. illud meum informis adeo, & confusi characteris) & si Linguae figuræ quæ & plures, & non inelegantes adjici debuissent, non evulgamus, id tempori, & occasioni tribuendum, quæ ne pingerentur, evicit. Haec tantum habui quæ mone-rem.



LAURENTII BELLINI
FLORENTINI
GUSTUS ORGANUM.

C A P . I.

Cur quaedam, quae hic necessario agitanda videbantur praetermittamus.

ANTEQUAM manum operi admoverem arbitrabar, nullius esse negotii cognoscere, quid gustus, seu gustandi potentia sit, cum enim observarem esse in nobis maximè familiare, quotidie non semel à nobis in judicio saporum exerceri, & sensus inter, quos externos, & quinque faciunt, recenseri, in eam abieram sententiam, res hujusmodi obvias, parabiles, & quae vel nihil tale cogitantibus nobis operantur, esse adeo perceptu faciles, ut quoties vel minimum animus adverteret, earum haberemus absolutissimam scientiam. Data autem occasione negotium hujusmodi attentius contemplandi; adeò arduum, adeo obscurum, adeo ab humana cogitatione remotum inveni, ut id assequi penitus desperaverim non sine admiratione reputans, qui tandem fiat, ut velocius, ac citius, quae à nobis maximè distant, & quae fortasse nihil ad nos attinent, explicemus, ut Coeli, syderumque naturam, motum, ordinem, magnitudinem, distantiam & hujusmodi alia sexcenta philosophis, astronomisque ita

G

com-

comperta, ut vel *Deorum consiliis interfuisse*, vel modo ex *Epicuri intermundiis descendisse videantur*, si cum Cicerone loqui fas est; de nobis autem, & de eis, quae non circa nos tantum, verum & quae in nobis aguntur adeo parce sciamus, ut hic ego non dixerim cum Venusino nec *scire fas est omnia*, sed rectius cum sapiente, *Unum scio, quod nihil scio*; unde parum abfuit, quin ne una quidem ducta linea, manum amoverim de tabula, quandoquidem si scribendi recte sapere est, & principium & fons, quomodo de sensibus recte scribere poteram, si nihil in iis est, quod me non fugiat? Cum autem animadverterem, ne alios quidem esse in hujusmodi cognitionibus supra conditionem meam, licet ingeniole meo multò majores, facile exinde sum arbitratus sensuum naturam obvolutam adeò, & tam altè consepultam latere, ut vel ipsam explicare, aut ex altissimis eruere sit tantum non impossibile. Quapropter irritos omnes conatus meos existimans, quo scumque demum exererem, satius duxi hujusmodi contemplationem praetermittere, & inscitiam meam cum candidioribus philosophis libere fateri, quam mei periculo nominis exsibilandam proponere instabilem, mentitamque doctrinam, dum immerito vellem iisdem videri sapientior. Nimirum equidem nos fortunatos, si daretur, quod tantopere habemus in votis, absoluta sensuum notitia; per ipsos enim sensim traduceremur in cognitionem animae sentientis, & hinc ad rationalem hominis, & immortalem, quarum cum adeo admirabiles quotidie operationes experiamur, quam nos beatret earundem optatissimus aspectus! Quoniam vero misera equidem isthaec nostri animi conditio est, ut se ipsum

ipsum assiduè quaerat, nec detur unquam per viam progredi, quae ad sui cognitionem dicit per scientiam videlicet de sensuum natura, quaerere hic consequenter erat animus, ubinam sentiendi facultas, & quod proprius ad rem nostram accedit, gustandi vis insideat, num scilicet in determinata aliqua corporis parte principe, unde actionem sensuum, quibus velut instrumentis utatur, tanquam è specula prospiciat; an vero ipsis instrumentis inhaereat, & si intimè praefens illis, ita ut sine aliis internunciis res sensibiles ex se ipsa discernat ab iisdem excita ad sensationem. Sed istud pariter tot tantisque difficultatibus obnoxium, adeò explicatu arduum fese obtulit, ut spe dejectus, coactus fuerim mutare consilium, & hujusmodi translationem integrum omittere, cum praecipue res ipsa videretur expetere, ut aliorum opiniones agitarentur de sentientis facultatis sede, quam determinare provincia non est meis viribus demandanda, tanto magis, quod lis agitur inter principes duos, Philosopherum scilicet, & Medicorum, Aristotelem, & Galenum, quorum ille in corde, hic autem in cerebro sentientem facultatem collocabat: iis autem non solum assidere non possum judex, sed summo mihi esset in honore positum, si, quod maximè aveò, daretur longe ipsis sequi & adorare semper vestigia; & tamen utrisque insistere impossibile, & ab utrovis discedere periculosest. Practereo, quot opiniones à non minoris notae philosophiae propugnatae ad examen essent revocandae de sede hujusmodi facultatis, quorum alii in ipso instrumento positam, alii in nervis, alii in spiritibus, alii in nulla peculiari parte, sed undequaque diffusam, & ex compositione corpo-

ris resultantem asserunt, existimantes cum sene illo Phtiota apud Tullium, & Aristoxeno apud Laetantium nihil omnino esse facultatem, & nihil in animantibus reperiri, praeter corpus ordinatum, vel dicentes cum Simmia ex compage viscerum oriri vim sentiendi, sicut ex pulsatis fidibus oritur sonus. Nec deerit insuper Epicurus, qui in anima ex tenuissimis quibusdam particulis conflata portionem quandam inveniet sensus artificialis nobis tamen incomptam, & nullo nomine designatam per totum corpus diffusam, si spectat ad irrationalem, si vero ad rationalem, in pectore tantummodo collocatam. Quibus omnibus opinionibus, exactissime licet expensis, videant caeteri, quid tandem, quod aliquius momenti sit, deduci possit, per me potissimum, cui non datum est.

— *Verum gemina suspendere lance
Anticipitis librae, & rectum discernere, ubi inter
Curva subit, vel cum fallit pede regula varo.*

Quapropter si ad tractationis hujus qualemcumque dispositionem necessarium erat, ut res vel ab orco, ut dicitur evolveretur, indulgeant quotquot ista vident perfectionis amatores, si & quid Gustatrix Potentia, & quonam demum in loco sit non determinatur modo, sed ne quaeritur quidem; aperte enim fateor, me non habere, cui fidam, nec quicquam suppetere, quod proferam verosimile. Liceat igitur mihi isthaec praemisisse, ut tantummodo palam fiat, quid requireretur ad hujusmodi Philosophiae partem absunto ordine explicandam, & cur id praetermissum. Qualiscunque igitur natura, & essentia facultatis gustatrixis, quacunque in animati corporis parte sita sit, & quomodo cunque operetur, devenimus tandem ad per-

perceptu faciliorem disputationem, quae nimirum illa sint, quae Gustatum à proprio munere feriantem excitant, moveantque, ita ut actus eliciat suos; quod cùm nemini non sit maximè compertum; esse munus rerum sapidarum, quaeritur hic, quae tandem hujusmodi sint, quid per saporem sit accipiendum. Qua in re cùm non unam inveniam sapientissimorum hominum sententiam, parcant ipsorum eruditissimi manes (quorum acerba semper mihi est, & honorata pariter recordatio) si quid pro re nata contra ipsorum placita adstruimus, neque enim id unquam praestabimus contradicendi genio, id siquidem, ita me Deus amet, semper sum maximum adversatus; neque inanis gloriolae studio, docuit quippe me pluries non unius hominis infelix exitus, quām fallax bonum sit fama mortalibus, & quām gravis illi incubet mors, qui notus nimis omnibus, ignotus moritur sibi. Novi pariter argumentum pessimi tubam esse, & placere pluribus, displicere sapientibus; sapientes enim non hic prope nos sturnorum instar (quidni videlicet mei Civis Galilaei elegantissima similitudine utar?) volitant catervatim, sed altissima contemplatione sese tollunt in coelum solitarii volantes, ut Aquilae. Quicquid itaque producimus, veritatis amore producimus, qua praestantius nihil, nihil antiquius, venerabile magis nihil agnoscimus, quid proinde periculi imminet, si hac duce progredimur? Sed ad rem venio.

C A P. II.

Proponuntur opiniones de saporibus, & Aristotelicae speciatim.

DE Saporum natura, quamvis occurrant Philosophorum plurimae opiniones, quotquot tamen illae sunt, facili negotio reduci posse videntur ad duas tantummodo classes, & unam quidem afferentium saporem nihil aliud esse, quam Qualitatem quandam in determinatis compositis ex elementorum mistione resultantem, ac proinde ab iis solùm compositis posse gustatricem facultatem moveri, quae hujusmodi accidente insigniuntur: alteram vero affirmantium ad excitandum gustum nihil aliud requiri: quam determinata corpora certae magnitudinis, & figure, & frustra in scenam advocari qualitates, quas non in saporibus modò, sed ne in aliis quidem vocatis accidentibus unquam inveniet Philosophorum industria, cum Natura nihil tale in hac rerum universitate produxit; & hujusmodi corpora Gustatum efficientia nobis esse non incompta, nec esse quaelibet, sed certa quaedam dumtaxat. Stabit pro prima sententia Aristoteles longo sapientum ordine comitatus. Secundam verò propugnabit Moschus antiquissimus ex Phoenicia Philosophus, vel ante bellum Trojanum adhuc superstes, aut quisquis demum ille fuerit, qui minima corpora statuit esse principia rerum omnium, cui non obscuri nominis viri insistent Pythagoras, Empedocles, Heraclides, Plato, Xenocrates, Asclepiades, Bithynius, Diodorus Cronus, Mnesitheus Medicus, Artemidorus, Leucippus, Democritus,

Hip-

Hippocrates, aliique. His adjicere possumus & Anaxagoram; hic etenim quamvis ὄμοιομέγετος illam suam posuerit (quam vocem à Graecanicis mutuor, quoniam vel teste Lucretio non habent Latini quomodo rem explicent, inquit enim

Nunc & Anaxagorae scrutemur ὄμοιομέγετος

Quam Graeci memorant, nec nostra dicere lingua

Concedit nobis patrii sermonis egestas.

Caeterum quippe arrisit mihi nunquam verborum ista perversio, quasi nimirum eruditus quis esse non possit; nisi de Thusco Graeculus fiat

Cum sit turpe magis nostris nescire latine)

tamen similarium partium illa congeries corporea est, & nihil ipsi superaddebat in rerum productione, quam varium ordinem, & contexturam. Adjicere & insuper possumus Anaximandrum, quoniam in universo illo suo dissimilari corpora solum habebat, quorum minimae particulae quamvis ab ipso ponerentur, velut semina certarum rerum, ipsis nihil adjungebat quod accidens, aut qualitas vocari posset, nisi horum nomine intelligere placeat figuram, & motum, quod aliquibus ex recentioribus Philosophis arridere compario. Insuper & Epicurum; quamvis enim in epistola ad Heròdotum quiddam recenseat innominatum, quod sit sensuum omnium opifex, loquitur de ipsorum sensuum natura & essentia, non de iis, quae ipsos excitant, de his siquidem agit in eadem epistola speciatim, & tenuissima corpora recenset sensuum organis accommodata, ut in ipsius vita fusius apud antiquae rei scriptores. Inhaerent eorum vestigiis nostris hisce temporibus Chemicae artis industrii cultores, qui non solum asserunt determinata corpo-

ra saporibus procreandis sufficere, sed insuper ostendunt, quae tandem isthaec sint suis edocti experimentis, à quorum placitis abhorrere non videntur Galilaeus, Gassendus, Cartesius, & quotquot alios aliquujus notae Philosophos habuit aetas nostra ferax Sapientum. Cum itaque opiniones omnes statuentium corpora rerum principia ad unam reducantur, eo quod in natura saporum explicanda convenient, & cùm insuper dictum sit ad Aristotelicam caeteras revocari, exponendum hic jam videtur, quid ipse Peripateticus senserit, tum, ut ipsius opinione cognita, num alii, quos cum ipso sentire diximus, verè ipsi subscribant, palam fiat, tum etiam praecipue, ut inter se collatis utrisque sententiis in eam animus duci sinat, quae veritati magis accedere, & experimentis respondere cognoscet. Haec igitur Aristotelici ratiocinii summa. Quoniam illa aquae natura est, ut cujuslibet saporis sit expers, & experiamur tamen eandem cujuscunque saporis esse capacem, oportet, ut id ipsi accedat, & quod aliquid patiatur, & transmutetur: veritati siquidem non consentit, aquam ipsam esse saporum omnium seminarium (ut Democritus, & Anaxagoras arbitrabantur) ex una enim resicut ex eodem cibo videmus factos sapores alios; nec pariter contineri quidem in ipsa aqua omnia saporum genera, ut Empedocles, adeo tamen tenuia, & dispersa per ipsam, ut propter sui parvitatem nullo modo sub sensum cadere, eumque movere possint; videmus enim fructus variè concoctos subire quascunque, pene, dixerim, saporum mutationes, & è dulcibus austeros amaros aliarum specierum fieri pro temporum varietate transpirante diluta portione, & ad

ad solem , & ad ignem varias saporum formas induere, adeo ut apertissimè liceat deducere, non ab aqua fieri tales , sed alterari & variari in hujusmodi qualitate solummodo , quia ea, quae circa fructum, transmutantur. Quae cùm ita se habeant , oportet jam inquiramus, à quonam hujusmodi passionem & transmutationem recipiat aqua. Ejus igitur opifex ignis esse non potest , & sola calidi virtus ; est enim aqua humorum omnium subtilissimus , & vel ipso oleo subtilior , nam quod hoc extendatur , & quodammodo ducatur, facit suarum partium tenacitas, quae glutinis instar , aut visci mutuò ipsas cohibet , ne diffluant, aqua autem fragilis est , hinc ille facilior fluxus , & difficultas major aquam in manu continendi, quàm oleum. Evidenter insuper patet , aquam sapidam crassiorem esse , quod à sola virtute caloris obtineri non potest , cùm aqua igni exposita ex se sola crassitudinem nullam indipiscatur : His igitur experimentis edocti qualitatem hanc aquae communicari ab igne solo non posse, videamus num considerantes , ubi sapores reperiantur , aliquid deprehendere possimus, quod nobis ad veritatem sternat viam. Patet experientia sapores omnes , quos circa fructus sentimus, in terra pariter reperiiri , cuius rei vel illud esse potest certissimum argumentum plurimos esse fontes, quorum alii dulces, amaras alii , alii alias ducunt aquas eo sapore non aliunde traducto , quàm à variis terrae partibus , & cuniculis , quos in fluxu percurrunt , rationabiliter proinde licet statuere maximè in terra nascentibus fieri saporum genera , quippe cùm dictum superius sit , sapores in aqua recipi aliqua transmutatione operante, aqua autem sit humida , ab

alio pati humiditas nequit, quām à contraria siccitate, quae cum in remisso tantummodo igni concessa sit, non multum hic inferet violentiae in aqueam humiditatem; plurimum autem à terrea siccitate patietur, cum isthaec in terra reperiatur in summo. Itaque quemadmodum aqua coloribus; saporibusque iis inficitur, qui in eadem lavantur, ita pariter & natura vel per siccum terreum humiditatem coloris vel per humiditatem siccum & calore incoquens quale quid humidum facit; *Kai concludit ἐπὶ τῷ χυμῷ τῷ γεγόνευν ταῦτα ἐπηγένετο ξηρός πᾶθος εἰ τῷ υγρῷ γεύσεως τῆς κατὰ διωρίου ἀλλοιωτικὸν εἰς τρεπεῖται.* Et hoc est sapor, passio videlicet facta à dicto sicco in humido gustus eundem de potentia ad actum deducens. Haec Aristoteles, cuius dictis quot, quantique Philosophorum, ac Medicorum praestant fidem suam: Ecce Galenus (si tamen libellus de oculis ipsi adscriptus suppositus non est) saporem dicit aquam alicujus corporis siccitati operante calore permistam: causam omnis salsuginis in partes terreas adustas complexionum siccaram & saporis amari aqueae humiditati pauci saporis, aut nullius admistas refundit Avicenna: nullum saporem absque humore dari posse affirmat Guinterus, Gustatum absque liquido corpore perfici non posse docet Herunius, qualitatem appellat Lidellius ortam ex sicco terreo per humiditatem diluto, qua gustus in actum producitur; ponit saporis materiam Casserius humiditatem, in terrestri siccitate prae-dominantem, calorem verò efficientem; rem altius aliquanto repetit Weccherus, & universalius saporem describit per secundam qualitatem ex elementorum con-cursu, & actione natam gustum de potentia ad actum

mo-

moventem : explicat Bucchananus per qualitatem patibilem à temperie humidi per siccum vi caloris percolati oriundam ; pariter Keckermannus per qualitatem ex terrestri siccitate cum humido per calorem probè temperato provenientem , & super omnes breviter Alstedius , qui saporem nominat humidi aquei cum sicco terreo contemperationem. Quid nos ? Utramque partem ad trutinam expendimus , ut examine quantum vires nostrae ferunt diligenti veritas utut licet appareat , cuius tamen judices alios esse volumus majoris auctoritatis & famae.

Qui possint vitio nigrum praefigere thaeta.

C A P. III.

Dubia quaedam circa recensitam doctrinam.

PRIMO itaque , quod ab Aristotele supponitur , aquam nimirum insipidam esse , experientia adeò manifestè videtur ostendere , ut ne minimum quidem de hujusmodi propositionis veritate dubitare liceat ; sicuti pariter lubens in ejus sententiam descendō , cum asserit , eandem , omni saporum genere imbui posse ; an vero hoc aquae accidat , eo quod ipsa aliquid patiatur & transmutetur , adhuc affirmare non audeo haesitans , debeamne hic Philosopho praestare assensum meum , & de hoc inferius . Quid in Democriti redargutione afferat , quod contra ipsum alicujus roboris & momenti existimandum sit , ut candidè fatear id quod res est usque adhuc non assequor . Quae contra Empedoclem afferuntur vera crediderim ; non ta-

men ideo prostratum ex toto dixerim Empedoclem, nec ita confectum, ut quid mutare non possit; quid enim ille subjicere nequeat ejusmodi experimenta non negari, sed insuper inquire unde saporum illa mutatio proveniat, quomodocumque tandem illa contingat, & id accidere posse, eo quod à varia eorum corporum concoctione, transpiratione multae aquae particulae transponuntur, conjunguntur, avolant etiam vi caloris vel insiti, vel adventitii resolutae, qua mediante diversa aquearum particularum dispositione & quantitate dispersa saporum insensibilia ceteroquin propter parvitatem semina diversimode implicentur, unianturque, & varia saporum genera exprimant. Quod vero latere possit in humido aqueo tale saporum seminarium ob exiguitatem suarum partium gustatum fugiens, evidenter confirmari posse, per id, quod aliis in sensibus accidit, qui non nisi determinatae quantitatis, & certae virtutis objecti alterari & excitari ad cognitionem possunt; sic in tenuissimis gravium quantumvis corporum ramentis nullam deprehendimus gravitatem, tardiorum motum non animadvertisimus reputantes ea ratione mota corpora quiescere, & hujusmodi alia plurima propter minimam, & insensibilem virtutem, tanquam non essent, omittimus: cur vero id, quod in his accidit, credendum non est eodem modo & in saporibus contingere, ita ut non vis quaelibet possit movere gustatum, sed requirantur determinati gradus virtutis, nec pauciores tanti sint ipsum movendo? Sed nonne & apud Aristotelem ipsum habemus ingustabile esse, quod *aut parvum, aut parvum habet saporem το μικρὸν, οὐδὲ Φαῦλον ἔχον χυμὸν, Εἰ contingere, ut album nigrum secus invicem posita, invisi-*

sibilia sint propter pravitatem συδέκεται μὲν γὰρ καὶ ὡρίζα-
ληλα πιθέμενα τὸ λόγιον καὶ τὸ μέλαν ὥσε σκάπερον μὲν ἀσεπτον
εἴναι Δῆλος σμικρότητα? Si igitur ipse Philosophus fatetur
per tenuitatem res, ceteroqui sensibles sensibilitate pri-
vari, cur hic Empedocles redarguitur? Plurima ad haec
subjungi possent, non hic tamen Empedocli dies dici-
tur, ut causam agere suam debeamus, ad rem proinde
nostram. Ab igne solo sapidam aquam evadere, & i-
pse quoque negaverim cum Aristotele; nullum tamen
nexum invenio inter rationem, quam subjicit, & id,
quod confirmare contendit: quid enim negotii interest
inter aquae subtilitatem, & fragilitatem, & ignis apti-
tudinem ad communicandum, vel non communican-
dum saporem? Nisi fortasse libeat aliquatenus textum
exponere, ita ut subtilitas, & fragilitas aquae igni pa-
riter subtilissimo adeo facilem exitum permittat, ut
levissimam ab ipso patiatur impressionem, & sic nul-
lam exinde sapidam qualitatem possit contrahere. Sed
ne ista quidem extorta interpretatio satisfacit, ignis
quippe quantumvis tenuissimus in maxime friabilem
aquam ita operari potest, ut, vel eodem Aristotele
teste, non qualitates modò, sed aqueam ipsam for-
mam in sui naturam convertat, ac proinde cum nec
alterutrius, nec utriusque vel tenuitas, vel fragilitas
mutuum impetum impedire possit, doceat me qui
novit hujusmodi ratiocinii ordinem, ac connexio-
nem, adeo siquidem caput suum abscondit nodus iste
Gordius, ut nullus alias explicare possit, quam Ale-
xander. Rem evincit apertius, quod consequenter
habet de aquis igni expositis non crassifcentibus, &
de spissitudine sapidarum, & hoc, quamvis hic non
confirmet, supposuit alibi confirmatum in Meteoro-

logicis exemplo earum navium , quarum Gubernatores ignorantes differentiam inter crassitatem aquae fluviatilis insipidae , & marinae , damnum in fluviis passi sunt , & nos multo verosimilius argumenta possemus deducere à minori difficultate natandi per aquas sapidas ; quām insipidas ; à majori conatu , quem Urinatores exercere coguntur in illarum , quām in harum profunditatem descendentes , & è contra se se ad superficiem reducentes , minorem in his , majorem in illis facilitatem experiuntur ; ab aequilibrio , quod mutatur in corpore ad eandem in specie gravitatem aquae proximè accedente , si ipsi aquae tantillum licet salis immisceatur , & ab illis experimentis plurimis excessum gravitatum à majori minorive spissitudine provenientium demonstrantibus . Aristotelici rationciniī , quod superest cum experimentis , & rationibus rem ipsam proprius attingere videatur , adeo ut veritatis speciem aliquam praeferat , diligentiorum exceptit inquisitionem , & non qualem hactenus habuimus raptim , & per transfennam . Ut saporis naturam detegat Philosophus experimenta primū , indē verò elementorum triadem vocat in scenam , terram videlicet , aquam , & ignem , quae non quatenus talia sunt , sed ratione contrariae virtutis , quae ipsis inest , operantur invicem , ita ut alia agant , alia patiantur non sine mutua reactione , ut ajunt , & repassione ; & quia observat , sapores fructuum in terra pariter reperiri exemplo aquarum dulcium , amararum , ac è terrae visceribus scaturientium , & sapor non nisi in humido sit , rationi consentaneum dicit , saporem esse opus terreae siccitatis agentis in humidum , simul etiam operante calore ignis , ac demum saporem definit passionem à dicto sic-

siccō factam in humido gustus. Si rem hanc ab origine usque repetere daretur otium, & locus, innumerae fermè difficultates afferri possent in medium, quia tamen illae non modò ad hanc doctrinam speciatim, sed & ad alias spectare possunt, aliquot eorum proponimus, quae faciunt ad rem nostram. Credideram ego semper praceptor Aristotele praeēunte mutuis viribus elementa sese destruere facilis, quae in altera qualitatum convenient, & ut dicuntur symbola, difficilius quae in neutra & asymbola, ita ut alterum in alterius naturam faceſſens à suis operationibus desisteret; & ita operaretur, ut nova forma, quam subiit, expeteret, nec unquam audiveram, alterum alteri succumbere, non transmutari, tamen, sed remanere, quod prius eodem permanente principio suarum operationum, quod formam substantialem appellant, vel hoc ne minimum quidem transmutato diversas tamen actiones produci. Debeat pluvia generari ex aquis hisce nostris, non feret ignis in sublime minimas harum particulas, sed propter contrarietatem corrumpetur aqua ab igne, & sub vaporum specie ad aëris frigidi stationem evecta deducetur ad formam nubis, ex qua deinde non aqua solum habebitur, sed ob admistas exhalationes & fulmina, & fulgura (tanta vis est collisionis) & tonitrua, & secundum diversas aëris regiones, tempestates, ventos, aliaque diversimode alterantia orientur & nives, & grandines, & rores, & pruinae, & nebulae, & ab exhalationibus producentur & venti, & terrae motus clandestini, & Cometae, & vel ipse Circulus lacteus. Idem esto judicium de glacie, de maris salfedine, & ut isthaec leviora praeteream, quaecumque habemus com.

composita contrarietati elementorum debemus, quorum unum si alterius viribus impar est, formam, & qualitates, & actiones admittit suas, praepotentis elementi induens naturam. In saporum solummodo generatione elementa praeliantur succumbit aqua, & aqua tamen remanet, & quod majus est substantia, & forma aquae ne alterata quidem producit qualitatem novam terrea siccitate in propriam humiditatem agente. Sed cum terrea siccitas ex se virtutem nullam agendi habeat, quo tandem modo hujusmodi impressionem in humidum facit? Virtute terrae? Terra verò quatenus talis est nihil agere, aut pati potest, ac proinde agendi vim, qua ipsa destituitur siccitati communicare non poterit. Nec refert, si dicas, elementa activa esse, quatenus ipsis contrarietas inest, contrarietas enim isthaec quid tandem est? unde provenit? non sunt elementa, ut elementa, inertia quippe supponuntur; non ut unita qualitatibus, quandoquidem, ne memorem qualitates non esse quid superadditum ipsis, & ab extrinseco adveniens, sed quid elementi formam immediate consequens, nonne istae pariter inertes sunt? & si inertes, quid agere poterunt cum inertibus elementis? Quod si velis inesse vim operandi quomodounque hoc tandem se habeat in terra, agat igitur: sed agerene poterit altera tantummodo qualitatum? quis frigiditatem cohibet, ne & ipsa vires exerat suas? Sed terrea frigiditas cum aqua convenit, ac proinde nihil agere mutuo possunt. Isthaec autem cum vera sint, cur terra aquam ipsam in sui substantiam non convertit, quando jam alteram aquae virtutem sibi adjunxit, alteram verò facillimo negotio vincere potest, cum aqua humiditas sit remissi-

gra-

gradus sua verò siccitas intensi? Cur contenta levissimae tantum impressionis permittit aquae naturam suam conservare contra Naturae leges, quae cum necessitate semper ducatur, prohibere non potest aquae transmutationem in terream formam, postquam mutuis viribus symbolabisthaec elementa concurrerunt. Sed demus & hoc arridere quandoque naturae, isthaec à sicco terreo in humiditate facto passio quid tandem est? recipine potest ab humido, & si recipi, num conservari? Quid ista siccitas? Certè si nihil aliud illa est, quām difficilis terminatio, seu potius alienis terminis difficilis adaptatio, quid tandem intercedit negotii inter hujusmodi repugnantiam, quae à partium arcta colligatione solùm provenire videtur, & generationem saporis? Taceo interim valdè dubium videri posse, num summa illa siccitas, quae terrae communiter adscribitur, verè reperiatur in nostris hisce partibus extima superficies non multo profundioribus, quae non ad sapores modo, verùm ad pleraque constituenda concurrunt; si enim ad ulnas aliquot effodiamus, semper in corpus quoddam incidimus facilè in pulverem dissolubile, quo nihil aptius, & nil facilius alieno termino coercetur. Sed quidquid de siccitate sit, ecqualis nam isthaec humiditas est, quae recipere possit, & conservare contrariae qualitatis impressionem? Si esset aliquid non assimile molli cerae, siccitas autem sigilli adinstar, res saltem praeter propter percipi posset, quis autem capiat fluidissimum corpus, & fragile, ut aqua est, retinere posse saporum imaginem à terrea siccitate impressam, idem est, ac si quis liquatam ceram intenderet obsignare sub sigillo continue disfluentem. Sed,

inquis, eadem non est ratio, neque enim quicquam imprimis siccitas, sed mutat humiditatem. Mutat inquam? Huc verò revocari possunt allata superius argumenta omnia, quibus adjungere liceat, nunquam observari humorem ex insipido in sapidum convertsum siccitatem contrahere, & dubitari è contra fortasse possit, num majorem acquirat humiditatem, nullam autem mutationem in contrarium subire posse crediderim humidum, quām in siccum, quod in saporibus non contingit. Dicent fortasse, aquae aliquid commisceri saporibus progignendis aptum. Sed non est id, quod hic concludit Aristoteles, munus illud universum terreae siccitati demandans, quamvis antea ex aquae sapidae crassitie mistionem aliquam deduxerit: id autem quamvis concedere non repugnemus, urgent adhuc eadem omnia, cùm de productione sapidae qualitatis nihil inde fiat magis compertum. Maxime interim gratulor siccitati, quod ex non actuo-
sa, & patibili, ut appellant qualitate plurium animalium bona in saporum generatione facta sit a-gens. Sed esto: Sapor est opus siccitatis, cur terreae non autem igneae: Quia inquam ea terrae so-
lū propria est, & in excessu; ignis verò debilior calore dominante. At quanta debet esse virtus siccitatis, ut in humido saporem generet? cur summa? unde id deprehenditur? Num quod igni exposita sincerissima aqua saporem non contrahit? at idem omnido accidet, si eadem aqua per purissimam terram percoletur, & tamen hic & summa aderit siccitas, & aderit aqueus humor, nec tamen ullus sapor procreabitur. Quod si requirant siccitatem determinatae, & non omnis terrae, erit id Aristoteli parum

con-

consentaneum, qui hic hujusmodi conditionem non habet, & licet haberet, peteremus inde quale sit illud determinatum corpus siccum, & unde tandem proveniat talis in ipso vis. Et quia fortè rationibus coacti ipsius sectatores respondeant, tale corpus esse sal, videant ipsi, quām benē Philosopho insistant, siquidem cùm in saporum generatione concausam tantummodo appelle ignem, Sal verò, vel per ipsum adusta terra sit, nonne necessarium erit, naturam igneam retineat, & consequenter ut ignis non concausa, sed causa, & principalis etiam existimari debeat? Adde, quòd cùm plurimi sapidorum fontium è terrae visceribus erumpentium ducant aquas, non calidas modò, verùm etiam ferventissimas, cur ex hoc ego inferre non possim, ejusmodi saporem ab igne, vi vel calida, vel sicca provenire, quemadmodum ipse ex eo, quòd aquae per terrae abdita fluentes inde sapidae effluunt, deduxit, à terreo sicco saporem generari? Missum hic pariter facio, concedi ab Aristotele, agere quidem ignem sua siccitate aliquantulum in humiditatem, de calore autem esse parum sollicitum; quasi videlicet caliditas ad praesentiam aquae otiali debeat, nec ab adversario cavere sibi, ne superata faceat in frigus, & hoc pacto ignis ipse nimia socordia miserabiliter pereat. Omitto insuper duo elementa ignem, ac terram tunc temporis conjurare in humiditatem; mutuum verò foedus adeò religiosè interim conservare, ut ne minimam quidem noxam alterum alteri inferat, licet id maximè deberet contingere, cùm sint ex elementis symbolis, & facilè transmutabilibus. Sicut etiam omitto, alibi affirmaturum Aristotelem, saporem dulcem à Solis ca-

lore dilutum auferente, & reliquum decoquente pro-
venire; alibi calidum falsum, & calidius falsius; alibi
falsum humorem dulcem reddi cum movetur; alibi sal-
fos omnes humores non ut dulces frigidos esse, &
quod alibi apertissimè ingenitae ignis virtuti sapores
acceptos refert hisce verbis: εἰσ δὲ πολλαχοῦ καὶ κρῆνας καὶ
ρέυματα ποταμῶν, πανιδαπτὸς ἔχοντα χυμάτ. ὃν πάντων αἰπα-
τέον τέλος οὐδεῖς οὐ γνωμένων δύναμιν πυρός. καομένη γαρ
ηγῆ τῷ μᾶλλον Καὶ ηττὸν, πανιδαπτὸς λαμβάνει μορφὰς, Καὶ χρόας
χυμῶν. συπίησες γαρ κανίδες Καὶ τῶν ἄλλων τῶν τοιότων γίνεται
πλήρης διαμάμεων, δι' αὐτὴν τὰ ιθύμενα ὕδατα, ὄντα γλυκέα, με-
ταβάλλει, καὶ τὰ μὲν οὖτα γίνεται. *Sunt autem pluribus in locis* & fontes, & fluxiones amnium multiplicibus sa-
poribus praeditae, quorum omnium causa refundenda
est in insitam, aut ingenitam virtutem ignis; terra
enim magis, & minus incensa omnifarias subit spe-
cies, & calores saporum, aluminis enim, & calcis,
& aliorum hujusmodi evadit plena virtutibus, per quae
transcolata aqua, cum esset dulcis transmutatur, &
alia quidem fit acida, &c. Plurimae supersunt diffi-
cultates, quas vel ipsa Aristotelica principia contra
ipsius de saporibus assertum contemplanti suppedita-
bunt; ne res tamen evadat aequo longior, & scrupu-
losa nimiùm, videatur inquisitio, pauca haec enumera-
sse sit satis, quae maximè gratiosum accideret mihi,
si quis resolveret, ut imposterum tutior, & ipse Peri-
patetico suffragari possem.

C A P. IV.

Alia proponitur & admittitur sententia.

QUAM verò facilius rem omnem absolvemus ; si cum Chemicorum non paucis, iisque sapientioribus, & supra laudatis Philosophis nos etiam assera-
mus (posito , quòd Aristotelica ratiocinatio ex toto
non satisfaceret ; quòd adhuc haeret) nihil aliud esse
saporem , quàm ipsum sal determinatis linguae parti-
bus applicatum , in quibus & ratione figurarum ipsius,
& ratione conformatioonis partium linguae illa passio
excitetur , ex qua dolor , aut delectatio determinata
proveniens dicatur jucunda , vel injucunda Gustatio,
suavis, aut insuavis, talis , ac talis sapor ! Certè hu-
jusmodi positio , & experimentis non repugnat , &
paucis , imò nullis difficultatibus obnoxia est , & fa-
cili , brevique sapientissimae Naturae operandi modo
congruere videtur , quae omnia si in rebus dubiis &
geometricè indemonstrabilibus reperiuntur , nemini du-
biū est , sapientum animos debere in eam devenire
sententiam , ut credant probabiliter , & quantum no-
bis cognoscere datum est , si ita non se res habet ,
saltem ita se habere posse non repugnare. Ne verò
hujusmodi partem sequi videamus genio quodam im-
pulsi , non autem ratione coacti , aliquot in medium
afferemus argumenta , quibus factum est , ut magis
in hanc , quàm in illam opinionem propendeamus.
Et quoniam usque adhuc difficultates congesimus in
Aristotelem ex suismet principiis deductas , hic uno ,
eodemque tempore , & positionem hanc magis vero-

similem confirmabimus, & in Aristotelicam insurge-
mus, contra ipsam pronunciantes quidquid pro alte-
ra subjiciemus. Cùm igitur tot, tantisque dubiorum
nexibus implicatam Peripateticam opinionem obser-
varem, arbitratus sum, non aliunde id provenire
posse, quàm quod, falsa hypothesi, & firmo parum
fundamento tota machina de saporum doctrina ful-
ciatur; illud autem cùm esse deprehenderem, quòd
sapor sit in humido, tentare non destiti, num expe-
rimentis id confirmare possem, vel quid contrarium
animadvertere. Sumptis igitur portionibus pluribus
variarum rerum, quas inter & salium aliquot numera-
bantur, iisque omnibus nulla humiditate scendentibus,
& inde lingua, quod fieri potuit, exactissimè abstera-
fa, coepi sic aridam linguam aridis pariter iis fru-
stulis undequaque contingere, nec id in alienis mo-
do, sed in propria etiam lingua praestitum. Obser-
vari autem visum est, quantumvis, sale, & instru-
mento gustus exsucco, saporem salis, quamvis ali-
quanto imperfectius, si ipsis particulis gustui perfi-
ciendo aptis applicabatur; quibus iisdem partibus, si
caetera corpora extrinsecus salis expertia admoveban-
tur, nullus exercebatur sensus, praeterquam tactus;
quae experientia, sicut evidenter demonstrat, non
esse saporem humiditatis proprium, sed à salibus pro-
venire, ita etiam alios in usus transferri potest, sic
uti iis inferius à nobis accommodabitur. Non absi-
mille indicare videntur cineres, qui linguae, licet per-
humidae, & cuilibet ipsius parti superimpositae nul-
lum saporis vestigium imprimunt, si ab ipsis extractus
antea sal fuerit! imprimunt autem, si sal ipsis resti-
tuatur. Idem suadet vulgatus ille mos, res insipidas ad
fa-

sapiditatem traducendi per immisionem salis, & iterum redigendi ad naturalem insipientiam sale per artem separato. Idem pariter, quod Chemistae communiter, & facillimè absolvunt salium diversitas ex diversis compositis eductorum, quorum singulae species saporum pariter singulas species pariunt, adeo ut qui sapor est dulcis in aliquo composito sale proprio non separato, sit deprehendendus in ipso post separationem sale, quamvis negandum non videatur, misionem illam salium cum massa, cui naturaliter insiti sunt, producere aliquam diversitatem, ita ut idem omnino aliquando non deprehendatur sapor in separatis salibus, ac ille qui in toto composito deprehendebatur. Suos verò satores iis concretis nunquam restitues, quantumvis incendas, quantumvis per humiditatem (dummodo isthaec pura sit, nec salium praegnans; fieri enim tum fortasse posset, ut illi eis corporibus adjungerentur; quod tamen difficilius etiam crediderim, cùm experientia pateat, aquam salibus semel imbutam iis non aliter exui, quām per resolutionem in vapores) percoles quantumvis, conteras, alteresque, ut libet, nisi sales suos ipsis admisceas rursus; & ne videar te traducere in Chemicorum officinas (quod tamen verum non est, isthaec siquidem rudia sunt, & parabilia, & habent illi multò meliora, ac nisi insolenti enimvero confidentia promitterent, ut dicitur, montes aureos, ut productionem humanae durationis in aeternum, homunciones è va sculis oriundos, & alia hujusmodi rationem & natu ram aequo plus excedentia, eruditus eorum est fumus, nec animis offundit caliginem, sed illuminat) quod ipsi praestant in rebus omnibus sapidis, praestet Aristoteles

teles in aquis, quas omnifarios inducere sapores affirmat iisque, per evaporationem assumptis inveniet in fundo vasis salem ejus saporis, quem aqua ipsa, antequam evanuisse, repreäsentabat. Ex quibus omnibus, aliisque plurimis, quae passim reperire est apud non ultimae notae candidos Philosophos, quid probabiliter deduci possit, videant alii, quos vivere fas est occipiti caeco; quandoquidem ipse, si unquam pro re nata audeo aliquid pronunciare, & monstror digito praeteréuntium ad contemptum, & à tergo, quae non manus auriculas imitatur mobilis albas? Usque adeo corrupti moris nostra isthaec aetas est,

*Ut nemo in se se tentet descendere, nemo,
Sed praecedenti spectetur mantica tergo.*

Istane verò, inquis, adeo decantata evidens opinio est, ut ne minimum quidem de ipsa dubitare liceat? quasi nimirum per ipsam explicari possit, quid sit sapor insipidus, & quomodo ejus sensum habeamus; quasi, si ita se res habet, verum non sit humiditatem ad Gustationem non requiri, quam tamen necessariam esse hujusmodi tensioni est tantum non evidens; quasi non beat excitari quaestio, per quid ipsi sales sint sapidi; quasi una, eademque substantia, ex qualium omne genus constat tot saporum species producere possit; quasi non sit assignandus modus, quo linguam afficiunt, & movent ad eliciendam gustationem; quasi denique non sit ipsis superadjungenda qualitas, quae sapida nuncupetur, aut sapor. Hae autem nonne difficultates sunt, quas isthaec opinio patitur objectis in Aristotelem multò validiores? Sint qualescumque per me licet; at qualescumque sint conabimur resolvere; & quia ipsarum pleraque aliqua in-

indigent praeparatione ad absoluviorem salium notitiam conducente, ideo hic primam tantummodo de sapore insipido tollemus è medio. Non hic autem immorabimur, ut ulterius urgeamus eadem difficultate Peripateticos pariter impeti posse, & ipsos quoque ad hujus saporis explicationem teneri, & quomodo ejus sensionem habeamus, nec ab iis id explanari posse per humiditatem, & siccitatem suam, quando cum hisce qualitatibus nihil familiare habet insipientia, & indiscriminatim tam humida, quam sicca corpora absque sapore animadvertis; sed innuimus tantummodo insipientiam, quae gustu percipitur in compositis nihil esse aliud, quam salis, aut saporis privationem; sentiri autem à nobis talem privationem per privationem ejus passionis, quam Gustatrix facultas experiri assuevit in suo organo ab impositis cibis. Quod ut exactius intelligatur, observandum est assueuisse nos, cum escam ingerimus quandam in lingua, palatoque passionem à tactione admodum discrepantem distinguere, ex qua deducimus, illi corpori, quod mandimus, inesse aliquid ultra tangibles, ut appellant, qualitates, cui id nomen sapor impositum est iis tantummodo instrumentis, non aliis corporis partibus dijudicandum: cum autem in alterius speciei materia dentibus comminuta quicquam non dijudicat lingua, praeter simplicia tactui alterando destinata accidentia, tum judicatrix potentia statuit ejusmodi cibum non ejusdem esse naturae cum ante gustato, eo quod non eodem modo ab ipso afficitur, nec quicquam praeter tangibilia discernit, & quemadmodum eo quod ciborum primus certo modo potentiam afficiens dictus est sapidus, & ejus sensio Gu-

statio, ita pariter alter è quòd linguae impositus non Gustatricem Tactricem facultatem simul, sed Tactricem solummodo movet, insipidi nomen obtinuit, & actus, quo se facultas non excitari cognoscit, appellatus est insipidi sensio, aut ejusdem Gustatio. Novum autem non est, & Naturae inusitatum, animalium Potentias judicare de iis rebus, quibus nullo modo affici possunt, seu potius eum increuisse morem, ut dicamus, audiri silentium, cum nullus pulsat aures rumor, videri tenebras, cum nulla lux perstringit oculos, gustari insipidum, cum nullus sapor obfertur. Novit hoc & Aristoteles, & apertissimè docuit, aliqua per negationem percipi, ut quietem privatione motus, numerum negatione continui, & alia hujusmodi. Sed notior res ipsa est, quam ulteriori indigeat explicatione, ac proinde cum ex dictis satis liqueat, & quid insipidus sapor, & quomodo ejus gustatio perficiatur, descendamus jam, ut & caetera diluantur, ad

C A P. V.

De Salibus quaedam.

CUM hic de salibus agimus, texere non est animus absolutam ipsorum historiam, sed tantummodo aliqua explicare, quibus perceptis facilius in cognitionem veniamus & saporum; & gustationis. Omittimus itaque & quaestionem de origine salium, num scilicet ipso universitatis exordio ipsi pariter à summo opifice creati fuerint in fodinis suis, num temporis intervallo concreverint materiae particulis variè inter se

se concurrentibus ad salium generationem : omittimus ipsorum naturam & proprietates , & quale in mistis eorundem sit munus ; num totam compositi massam clandestinis motionibus continenter agitare ;rum ejusdem particulas cohibere , ne diffluant ; an alter in alterius naturam facefcere possit , an potius adeò mutuae transmutationi adversentur , ut prius liquari , quām commutari patientur ; an ipsis debeant quaecumque composita originem suam ; quasi ipsi haberí debeant prima omnium materies , & forma , fixis ob inertiam suam subjecti ad instar , & patientis se habentibus , volatilibus autem motu suo , & vi maximè actuosa agentis instar ; an adeò arctè sese contineant invicem duo , aut plures , ut ne quidem ignis intensa vi , nec in vasis sublimatoriis , nec igne aperto separare quis valeat ; quae sit illa facultas , per quam sales variis certis admisti liquoribus fervorem excitant , in aliis autem intensissimum frigus , ut ebullit acidus Buxi spiritus sali Tartari affusus , & liquor ille ampulae spagiricae ex albo , & frigido rubicundus , & ita calidus ab admistione cujusdam salis evadit , ut tractari non possit , cùm è contra aquam glacie non minus frigidam faciat Hali nitri spiritus , & Ammoniaci : qua virtute liquidorum , quibus admisceruntur colores alterent , & novum inducant nec in salibus , nec in humore separatim inveniendum , ut cum vitriolata aciditas bilioso sali adjuncta nigredinem contrahit , cum crudum Antimonium in praetenuem pulvverem redactum solo Terebinthinae oleo in sanguinei coloris Balsamum dissolvitur , cum sal à spiritu miscellae ex Antimonio , Nitro , & Tartaro constantis eductus cyaneum syrupum violaceum in viridem con-

vertit, & sublimati solutionem in luteam albedinem: unde fiat, ut aquae salibus diversarum stirpium asper-
sae gelidium, folia, & plantas inspicienti objiciat,
quarum salibus aspersum fuit ante congelationem, de-
coloratas tamen, & confusas, quod equidem admira-
tione non indignum esset & meditatione pariter, si
à veritate non recederet, ut à plerisque accipio, cui
non absimile illud est, quod ferunt, Oleum Myristi-
cae nucis in vase hermeticè clausò à Ferdinando Gon-
zaga Serenissimo Mantuae Duce diligenter asservatum,
ex se ipso transisse in Oleae arborem non sine ra-
mis, & foliis, quae si animos sapientum impellerent
ad stuporem, si cum re ipsa convenirent, quid si
figmenta essent, & fallaces imagines? sed quidquid
isthaec sint, seu vera, seu falsa narrentur, quoniam
certo certius est latere in salibus non unum Naturae-
arcانum, & ipsorum contemplationi fusius & aptius
immorandum esse, ut melius aliquanto instituatur,
omittimus isthaec, & alia plurima, tum quia haben-
tur eruditissimè apud experimentissimos viros, Para-
celsum Helmontium, Libavium, Sennertum, Berigard-
ium, & sparsum, elegantissimè tamen, & quod ma-
jus est, candide enarrata ab accuratissimo optimae men-
tis viro Roberto Boyle, tum etiam quia hic locus non
est talia de salibus disceptandi, tum denique quoniam
isthaec, ut certi quid proferri possit, & sensuum te-
stimonio confirmari chemici potissimum laboris pa-
tientem exposcunt, qui irritus ex toto est, nisi quis
habeat gravis aeris appositum lucro multum, quod in-
summas enimverò chemicas impensas elargiter effun-
dere possit ad instrumenta, ad furnos, ad officinas,
ad res innumerā comparandas. Cùm verò me mea

pau-

paupertas vitae traducat inertis, de salium solutione, eorundemque figuris absque tot machinis facilè comprehendendis hic agam brevissimè, quòd ea tantummodo huc spectare videantur. Ea igitur aquae natura est, experientia repetita saepius id evidentissimè demonstrante, ut salita corpora permeare non possit, quin imbibat determinatam salis portionem, quam secum defert, si effluit, & quod semper admiratione dignum mihi visum est, non unius salis speciem tantum, sed plurimum eadem aqua certam quantitatem assumit, ultra quam, si vel minimum superaddas, subsidet, nec dissolvitur. Sic si aquae sesquilibra communis salis unciam dissolvat, superadde tantillum, hoc fundum petet: eadem haec aquae portio locum concedit & sacchari statutae portioni, quam si excedas, non absorbetur; idem esto de Ammoniaco, de Nitro; de plurimis aliis judicium. His autem observatis, quod naturae familiare esse animadverterunt artifices; ad rem suam traducere feliciter sunt aggressi, & operatione naturae maximè consentanea, nec multum absimili sales è compositis eduxerunt non sine praeparatione aliqua; nam quoniam sales, & cætera rerum componentia arctè admodum conjunguntur, & invicem implicantur, & corpus insuper, ex quo debet educi sal, est densum, non raro atque compactum, adeo ut aquae nullum permittat aditum, vel si aliquem, non eum tamen; per quem ad universi salis solutionem sufficiens aquae copia penetrare possit, ut haec facilius per compositi abdita discurrat, & secum, quod inibi salis latet, abripiat, necessarium est; hanc penetrationem promovere. Id autem tripli ratione praestare possumus, quae omnes eò spe-

stant, ut corpus ex invio, compactoque permeabile undequaque fiat. Vel igitur id in cineres per ignem resolvitur, vel in pulverem conteritur, vel ad macerationem usque, & putrefactionem continetur in aquis; quippe quomodo cunque res peragatur sales habentur. Si igitur in cinerem, aut pulverem lignum ex. gr. redactum fuerit, & per eos aqua percoletur, secum, quantum poterit, salium ducet, cum ita comparatum sit, ut salibus adjungat sese, naturis aliis posthabitatis; & id sicuti gustu deprehendetur, ita & oculis, manibusque rem apertissimè dignoscere poterimus, si percolatam aquam igni exponentes in vapores resolvi patiamur, in fundo siquidem vasis salem superstitem inveniemus per solutionem è ligni cineribus separatum. Idem observabitur, postquam aqua evaporaverit, in qua computruerit lignum, pari enim modo salem inveniemus, hoc tamen discrimine, quod putrefactum lignum minorem dabit salis quantitatem, quam in cineres reductum dedisset; siquidem ut maxime putrescat, non adeo tamen laxantur pori, nec ita minimae particulae disjunguntur, ut aqua vis possit omnia perrumpere, & combibere salem universum, sed cogitur portionem quandam relinquerre, quam habeas, si idem lignum absumas igne, & lixivium in vapores resolvas; quod insuper aliter comprobatum est, scilicet acceptis duobus pondere aequalibus ejusdem trunci frustis majorem salis copiam exhibuit collatura per cineres alterius, quam alterius putrefacti solutio; argumentum evidens in maceratione salis aliquid ab humore separari, & aliquid insuper superesse infixum, & unitum tenacius, nec nisi per ignem dissolubile. Et haec de salium dissolutione

tione per aquam , submonens tantùm , quae de cineribus ligni dicta sunt , eadem proportionaliter intelligenda esse de pulveribus quoque , quamvis & in his etiam non ita exacta separatio , & solutio accidat macerationi similior . Longus hic consequenter institui sermo posset de Figuris salium , ut compertissimum cuique fieret singulis salis speciebus suam inesse determinatam , & invariabilem configurationem , certos angulos , acies , & superficies , quod pluribus ratiociniis evincere conaremur , quando experientia , & oculari observatione destitutis confugere esset opus ad mentem ; si autem illa non destituimur , absurdum foret à sensibus omnium rerum indubiis observatoribus ad rationes plerumque parum firmas , ni à sensibus proficiscantur , deficere . Si igitur observationi fidere non detrectamus , patet , unumquemque salem certo quodam modo conformatum esse , & talem hanc extimam habitudinem adeo sibi esse propriam , & con naturalem , ut nunquam eandem possit exuere , & sua sponte , dum insensiles particulae coagmentantur invicem in ejus figurae crassiusculam massam conflue re . Et quoniam id liberis oculis observare in minimis moleculis non datur , adhibe exquisitum engy scopium , & singulorum salium rimare lapillos singulos ; deprehendes in unaquaque specie extimam formam suam lapillulis singulis ex aequo communicatam , plus minus perfectius (quod mirum videri non debbit , cùm & in Crystallis etiam sex quidem semper facies deprehendantur , raro tamen undequaque perfectae , & ita ut altera alteri crystallo omnino respondeat) Aspectum equidem jucundissimum deprehendere in quibuslibet salibus dulcibus , amaris , acribus , fal-

falsis, acidis, caeterisque determinatam asperitatem, aut laevorem, obtusulos angulos, acutulosve, plures, paucioresque cuspidulas, easque breviores, aut longiores, & hoc observari semper, sive sint fossiles, sive educti ex aquis, seu è stirpibus, arboribus, fructibus, foliis, floribus, seminibus, faxis, animantibus. Historiam hīc ego texere possem satis prolixam, & salium genera plurima recensere, & ipsorum figuras adjungere; horum enim largissimam fecit copiam mihi Serenissimus Ferdinandus Magnus Etruriae Dux, qui jam eminentius multò supra Magni titulum assurrexit, & supra omnium virtutum apicem evectus videt laudationes omnes se ipso minores; fecit inquam ille copiam mihi, sed quia nec locus exceptit, nec necessitas cogit, ut singulorum figuras percurram, habe paucas aliquot, ex iisque superioris propositionis indubiam veritatem agnosce. Illud autem universaliter dictum sit, ut cuicumque salis speciei commune, singulas figuras horum corporum angulosas exhiberi, in eo autem discrepare inter se, quod illae plures, aliae pauciores, hae acutiores, obtusiores aliquae, hoc illove modo aptatos inter se angulos habeant, unde operationes variae oriri possunt, titillationes, & punctiones in iis partibus, quibus applicantur. Determinata verò salis ex Laurinis foliis deducti configuratio ita se habet: Prisma est hexagonum, cuius alteri basi insistit perpendiculariter Pyramis etiam hexagona verticem habens obtususculum; alteri verò frustum ejusdem prope verticem abscissae: ex floribus mali Medicae repraesentat duo hexagonalium Pyramidum frusta, quorum bases aequales simul convenient, cui non absimile videtur Liquiritiae sal,

En-

Endiviac, Curcubitae, aliorumque similium, nisi quod extractus ex liquiritia aptat quandoque sese in parallelepipedum, quod cubo proprius accedit; quod in zingibere quoque deprehenditur; differunt autem hujusmodi sales non in superficieularum numero, & angulorum, sed in eorundem acutie: emitit cubicum salem Capillus Veneris: octahedricum Acetosa, & octahedro proximum Melissa; Rhombo similem Colocynthis, & similem pariter Elleborum album: duo hexagonarum Pyramidum frusta ad verticem abscissarum utrinque basibus recti, & hexagoni prismatis insistentium sal Esulae representat; plurimeque sunt salium species, quae aut Pyramides, aut Pyramidum frusta interceptis prismatis aemulantur sex ut plurimum laterum, aliaeque insuper observantur, quarum figuram constituunt aut duae Pyramides, aut earundem in aequalibus basibus convenientium frusta absque intercepto Prismate, ejusque generis habemus salem à nigro pipere, à corticibus mali punici, elleboro nigro, aliis; hujus autem superius jam aliquot memoravimus, quae sunt exiguae admodum altitudinis; altiora verò sunt frusta Pyramidum Cichoriaceum salem constituentium, ita ut vertex tantummodo ablatus videatur, quemadmodum est & Parietariae sal, & Absynthii: comprehenditur autem inter utramque pyramidum basim hexagonam totidem faciem prisma in Brassicae, Cucumeris, Eufragiae, Scoparum, florum Roris Marini salibus, & ne longius abeam, alia sunt salium discrimina à differentia multitudinis angulorum, & aptitudine ad penetrationem, pertenda, unde hic sal hebetiorem, ille verò exquisitiorem sensum in nobis excitat. Mirum autem videri non debet, si unicuique salium speciei propriam, & statu-

tam formam indidit Natura, quandoquidem nec id novum, nec ipsi inusitatum: habent suam determinatam faciem res prope dixerim omnes, lapides plurimi, arbores, frondes, flores, semina, animantia, cur pariter & sales non habeant? & isthaec ad faciliorem expofitarum superius objectionum resolutionem necessaria vifa sunt.

C A P. VI.

Quomodo sal è cibis educatur, & liquetur in ore.

Non tamen isthaec pauca, quae de salium solutione, & figuris praemisimus, sufficiunt omnibus diluendis difficultatibus, quae contra hujusmodi de saporibus opinionem ab adversariis offeruntur, nisi etiam modus à nobis explicetur, quo ejusmodi tenuia corpora per ciborum substantiam undequaque dispersa, & exquisitè permista separentur, & Gustatricem Potentiam moveant. Nullum verò hic dubitaturum arbitror, in cibisne sal revera insit, quod videmur supponere; id siquidem à nobis supponitur tanquam maximè compertum, & experientiâ confirmatum, sive praeexistat actu, sive potentia, ut distinguunt in scholis. Quòd si quis sit aliquanto pervicacior, nec hypothesi experimentis suffultae stare velit, consultat chemicas corporum resolutiones, & inveniet ferme ex omnibus educi salem, herbis, pomis, leguminibus, arboribus, animalibus, & paucissima nosse poterit, quae salem non exhibeant, qualia sunt Aurum, Argentum, Talcum Venetum, Osteocolla selenitis pura, fusilis arena, & alia hujusmodi ad ignem inten-

tensissimum licet ne minimum quidem falsediniis contrahentia. Quoniam igitur statui verosimiliter potest, per sales Gustum haberi, videtur ipsorum solutio omnino necessaria ad hoc, ut organum afficiant, nec alius eandem absolvendi modus suppetit, quam per aquam ratione non absimili à superius exposita, quamvis enim & alii apud Chemicos reperiantur, eorum tamen plerique reducuntur vel ad ignem, vel ad aquam, & hanc vel simplicem, vel variis, ut appellant, menstruis admistam; illum verò temperatum ad certos caloris gradus, & certis instrumentis applicatum, siquidem non quilibet in quocumque vase calor separandis compositorum substantiis sufficit, sed unus gradus unam, aliis aliam ex hoc, illove corpore variis instrumentis imposito deducit; sic quod Guajacum resolvitur in cineres, fuligineisque igni aperto expositum, Oleum, spiritum, acetum, aquam & carbones suppeditat in retorta destillatum: sic sulphur in vasis sublimatoriis vi ignis non admodum valida in insipidos, & siccis flores dispeccitur; ab igne verò aperto in corrodentis multum, & falsi liquoris: sic à sanguine non fermentato segregat lene balneum caput mortuum, & phlegma tantummodo, eundem in retorta intensus ignis dividit in Oleum, salem volatilem, & caput mortuum. Cùm verò nec varietatem hanc graduum caloris, nec instrumentorum diversitatem habeant animantia, quibus ad separationem substantiarum in cibis latentium uti possint, & è contra iis non destituantur organis, quae per aquam praestanda salium solutio videtur expetere, cur affirmare non liceat re vera ejusmodi separationem ita contingere? Superius

itaque explicatum est; separari sales è concretis posse, si isthaec in cineres, aut pulverem detrita percolentur per aquam, vel in eadem macerentur; os autem animalium non aestuat, ut cibos incendere & cinefacere possit, nec tamdiu asservat, ut macerationem subire valeant, quae salibus solvendis apta sit, superest proinde, ut id obtineatur per divisionem solummodo in minimas partes; neque enim est, cur hic haesitet aliquis, diuque laboret in inquisitione instrumentorum, quae & cibos conterere, & combibere sales possint; siquidem cuicunque vel non advertenti patet dentibus, & salivâ os nostrum, & aliorum plurium animalium donatum esse, quae huic operi perfectissimè absolvendo sufficiunt. Neque id, arbitror, ulteriori indiget explicatione; res ex se ipsa loquitur, ostenditque evidentissimè ab incisoribus, & caninis diffringi cibos, & crassiores bolos in minutiores partes, non tamen minimas subdividi, quae Molaribus commissae, & hinc inde Linguae motu jactatae, velut sub mola, in ipsorum mensis ita conteruntur, ut nisi saliva continenter influeret, pulveris crassioris speciem repraesentarent: sed quia nunquam non eretur in os aqueus ille humor è vasis propriis, & praecipue cum mandimus, ex contritis cibis, & salivali humoris massa illa resultat mox in ventriculum detrudenda, quae nemini non patet, quanta etiam in meditullio saliva scateat; quare cum & detritionem partium habeamus, & humoris insuper undequaque penetrantem, dubitandum non videtur, separationem salium tunc temporis contingere. Novi quid mussites, ignotum videlicet adhuc esse, num ejus naturae saliva sit, qualis est aqua, ac proinde quamvis adsit

&

& elaborata materies, & humor, hic tamen aqueus non est, sed salivalis. Esto, salivalis est, sed nonne & aqueus in hoc, quod sales combibat & salivalis esse potest? Salivalis dicitur, non ut natura ipsius designetur ab aqua discrepans, sed ut & quibus insit hic humor, & unde proveniat, & ubi erumpat, & his similia indigitentur; caeterum si & consistentiae, & savori, & colori, & aliis hujusmodi, ex quibus rerum naturam deprehendimus, fidem habere volumus, salivam cum aqua ipsa convenientem affirmabimus, cum & fluat, ut aqua, & fragilis sit, ut aqua, & perspicua, nulliusque coloris, ut aqua, & frigida, & insipida, ut aqua, &, ut uno verbo rem expediam (quid enim multum haereo huic levissimae difficultati?) quod maximè ad rem nostram facit, sales dissolvat, & combibat, ut aqua, quod cuique experiri facilè erit purum putum salem ingerenti. Admittamus igitur cum Stenone, vim in humore salivali aliquam contineri concoquendis, aut dissolvendis cibis idoneam, & vel ex hoc ipsum ab aqua humilitate differre, id tamen nihil urget contra id, quod probare contendimus, cum & dispare in aliquibus, & in aliquibus convenire possit cum aqua, ut in saluum solutione, quòd nobis satis est. Sed quid de dentibus statuendum? Tenendumne ipsorum munus esse comminuere cibos, ut sapores dignoscantur, & ad hanc fortè non necessariam operationem fabrefactos à natura adeo eleganter, adeò industriè, adeo anxiè, nec aliò spectare debeat, & ipsorum ordo pulcherrimus per superiorem, inferioremque maxillam, & extima habitudo sapientissimè conformata hic in concavum, alibi in convexum, in his in cuspidem, aliis

planum, aliis in aciem desinens; & ossea durissimaque compages exterius omnibus nudata membranis, & altius plures, paucioreſque maxillis infixae radices, & his intertextae nervorum propagines, & eorundem ramusculi cum venuſis, arteriolisve altius aliquanto ad excavatum usque ipsorum meditullium ascen-
tes, & hoc idem tenuissimā, mollissimāque tunica succinetum, & illa naturae sollicitudo in ipsorum pro-
ductione, dum vel in utero talem aggreditur fabri-
cam in membraneis intra maxillas folliculis substan-
tiam quandam mucosam colligens, quae processu tem-
poris concrescit in os, & ē gingivis erumpit exuta
membranam, & illa ejusdem praecautione, ut uno evul-
ſo, succresceret alter, & illud molle, cedensque of-
ſeum ſepimentum inferiorem à superiori folliculo di-
rimens, nec inquam iſthaec omnia, & alia plurima,
quae diligentissimi Fallopius, & Eustachius accura-
tissimē obſervarunt, & elegantissimē litteris tradide-
runt in alium finem à natura comparata ſunt, quām
ut Gustationem promoveant? Certè in hac adeo di-
ligenti dentium cura aliquid latere videtur, quod non
ad animalium delectationem ſolummodo faciat, ſed
aliquid majus naturae neceſſarium. Et ipſe pariter
affirmaverim idem ex toto, crediderimque, ſumnum
Artificem adeo fuiffe ſollicitum de dentibus in qui-
busdam animalibus, ut per ipſos cibi comminueren-
tur; ex hac autem comminutione non unus, & alter
ſolum, ſed plurimi effectus haberi poſſunt, quorum
unus Gustatio eſt: adeo videlicet ſapientiſſimus ille
Opifex induſtrius eſt, ut unum, idemque instrumen-
tum aptet rebus plurimis peragendis; ſic, ne ab ani-
mantium corporibus diſcedam; Mesenterio alligat in-
te-

testina, inserit glandulas, vasa distribuit lactea, sanguinea, lymphatica, nervea, & ut exemplum proferram nobilius, quota pars usuum Nervorum nobis comperta est? habemus & sensum, & motum, & semen ab ipsis derivari, quae tamen eorum provincia in caeteris animati corporis partibus, in quibus nec motus, nec sensus ulla indigentia, nec semen ullum? quid in Liène tam copiosa nervorum admirabilis contextura, cùm interim Jecur Liènem magnitudine multum excedens pauca tantummodo, eaque tenuia obtineat eorundem filamenta? quid pulmonibus inserti? quid in illis plexibus, quos plurimos habemus ultra thoracicos, cervicales, mesentericos antea satis notos novissimè descriptos apud Thomam Willis? nisi placeat sentire cum eruditissimis viris DD. Entio, Glissonio, Charleton, Cornelio per nervos nutrimentum distribui, ad quod magis elaborandum plures pauciores huc illuc ramusculi nervei producantur. Quapropter cùm extra naturae ordinem non sit eandem partem non uni usui accommodare, mirari quis desinat, si id etiam dentibus accidit, & Gustationi opitulantur, caeterum ipsorum praecipuum munus dixerim, Communionem ciborum in digestionis gratiam quasi scil. contritio illa sit perficienda in ventriculo concoctionis quoddam veluti rudimentum; quod adeo necessarium in quibusdam animalibus deprehenditur, ut quibus laeve os, & edentulas gingivas natura construxit, posuerit asperitates quasdam mobiles in palato dentibus proportionales, & aliquibus dentes in ventriculo. Cur autem sic se rem habere voluerit, aut quibus animalibus dentes dati sint, difficillimum arbitror determinare, quandoquidem cùm

cùm ejusmodi elaboratio per dentes, videatur ventriculi operationi admodum similis, crediderim aliquando edentulis ventriculum dentium vices gerere, cibosque conterere; sed observatâ plurium ventriculorum structurâ, & duplicis tantummodo esse naturae comperi, carnosos videlicet, & membranos, & indiscriminatim hos, illosve tam dentatis, quàm non dentatis animalibus datos: Sic mandentes, ac ruminantes ventriculo membra neo utuntur, sed & membraneo conficiunt ossa, crudasque carnes Aquilae ossifragae, avesque aliae rapaces; mirum profectò, talem inesse vim iis Ventriculis vel durissima ita molliendi, ut liquidum excernant excrementum: carneum autem ventriculum in Mugile pisce me observasse memini, qui memoratis asperitatibus in palato non caret, & hunc eundem in Pipionibus, & Palumbis, pullis gallinaceis, aliisque hujusmodi rostratis solùm invenio. Sed haec nimis multa de separatione salium in ore per salivam in detritos cibos penetrantem. Non negaverim tamen, eosdem educi posse per macerationem, quod tum contingeret, quando materies ad certum tempus in ore detineretur, ut sensim saliva pveraderet; quod interdum fortuito factum experimur, dum nobis non advertentibus ciborum aliquae reliquiae inter utrumque dentem haerent per aliquod spatum temporis, quae deinde illinc ex inopinato vel linguae motu, vel copiosiori saliva affluxu deductae, & tactui molliiem, atque friabilitatem, & gustui saporem repräsentant; id verò naturae institutum non est, & praeter intentionem evenit, & praeter necessitatem.

C A P. VII.

Quomodo Gustum excitent ad Gustationem.

TANDEM liquatos in ore sales ad Gustatrices facultatis organum deducimus, meditantes interim, quomodo illa in perceptione saporum afficiatur, & unde talis vis in salibus emergat. In hoc autem opificio, sicut ab instituto suo Naruram non recedere arbitramur, sed brevissime, ut solet, facililimeque rem totam absolvere, ita admirabile magis futurum speramus, postquam explicaverimus, non aliud inditum salibus, quo Gustatum movere possint, quam figurarum diversitatem & motum, quarum cum una in hac, altera in illa salis specie observetur apertissimum est, nec eodem modo, nec eandem ab omnibus imprimi passionem posse, sed determinatam à singulis provenire, cum sint & certi laevoris, & certae asperitatis non sine statutis aculeis, aciebusque, ut superius expositum, à quibus in eodem organo eadem actio frustra expectaretur. Salium itaque natura quantum satis est in cute solummodo cognita, cum nihil excitando Gustui aptum detegatur, praeter memoriam formarum varietatem nisi aliter se res haberet, exinde necessariò colligi videbatur, saporem non esse quid ipsis salibus superadditum, ab iisdemque diversum, quod accidens, aut qualitas sapida nuncupetur, sed determinatam passionem ab asperitatibus salium in instrumento Gustus impressam, saporum vero dijunctionem, passionis ejusdem perceptionem. Meditationi non parum auctoritatis conciliabat Plato hoc

M

ipsum

ipsum in Timaeo apertè satis nec ineleganter exponens, hoc idem Archigenes apud Galenum sapores explicans nomine doloris: quia tamen novi ex Peripato plurimos ad haec, aliaque hujusmodi uncis naribus nimiùm indulgentes ridere solitos, ut aliquatenus ab his caverem, mihi consulere statui Peripateticum ipsum, certus, si quid non absimile ex ipso producerem, fore, ut digito labra compescerent, nec eam sententiam adeo absconam reputarent, quidquid enim ipse dixerit

*— — — credent à fonte relatum
Ammonis, quoniam Delphis oracula cessant,
Et genus humanum damnat caligo futuri.*

Consului igitur, nec me fefellit spes, obtinui siquidem ab Aristotele (quid enim rerum omnium ditissimum illud seminarium suppeditare non potest?) quod maximè expetebam: reperi scilicet & ipsum in sensionibus affectioni organorum plurimum tribuere, imo actionem totam ipsis tantummodo demandare, adeò ut cùm judicium ferimus de sensibili aliquo, id accidat non raro, non eò quòd determinata qualitas in ipso sita est sensibus movendis apta, sed quoniam aut sensus ipsi super illam, aut eadem super sensus mota, vel determinatam passionem percipiunt ab eadem sic applicata provenientem, vel eò quòd eam non percipient, qualem alias circa non absimile corpus experiri assueverunt, judicant tale corpus esse ab alio diversum. Haec potissimum explicat Aristoteles de sensilibus communibus, ut appellant; quandoquidem iis recensitis, motu scilicet, & quiete, magnitudine, numero, & figura, addita aliàs unitate explici-

plicat, quo tandem modo illa à nobis discernantur, aitque, haec omnia motu sentiri, nisi quòd quiescens dijudicamus, eò quod non movetur, & numerum privatione continui. Idem esto judicium de aliis ab Aristotele memoratis, quorum sensionem explanare, quia longius aliquantò, quàm locus expedit fortasse evaderet, manum continebimus, id solùm innuisse contenti, dictam de saporibus opinionem vel ab ipso Aristotele non ex toto damnari posse, cùm aliquid ab his parum discrepans ipse fateatur. Sed inquis, quae recenset Aristoteles sensibilia communia sunt, quando verò apud ipsum ostendes aliquid simile de propriis? Hic verò ut missum faciam, adhuc me non assequi, quid tandem referat, sintne sensibilia propria, an communia; quando, inquam, ostendam? Ecce tibi, ut ex pluribus exemplis unum feligam in Meteorologicorum tertio tractationem de Iride: quid in arcu illo aspectu jucundissimi colores? vocat ipse Philosophus & absolutè Refractionem, & Refractionem visus ad Solem Iridem, hinc diversitatem illam colorum à visu per refractionem plus minus debilitate provenire docet, & consequenter nihil in nube reperiri, quod coloratum dici possit; & tamen excitatur sensus, & circa suum sensibile, proprium, verum, & reale sese versari existimat, quia eodem modo afficitur, ac in perceptione colorum permanentium, & quos veros communiter appellant. Quid ad haec? Nonne color ad oculos tantummodo attinet? nonne colores Iridis fictitii sunt? nonne hoc est purum putum dogma Aristotelicum? Fateor, inquam, sed uti fictis imaginibus quales colores Iridis ad hoc evincendum non videtur ex toto satisfacere,

cur aliquid non depromis, quod verè existat, quod semper accidat, quod sit secundum constitutas Naturae leges? Fictis ais? at ego non minus veros crediderim colores Iridis, quam sint alii quarumcumque rerum visibilium, & si fictitii sunt, nonne eò magis urget argumentum? si enim & spectra, & fallaces imagines movere possunt nostras facultates, quantò magis eaedem excitabuntur ad sensationem à corporibus, rebusque realibus. Sed & promamus aliquid ex Aristotele, quod realem habeat existentiam, quod ab instituto naturae non recedat, quid sono magis usitatum, & familiare Naturae? quid tu putas hunc existimat Aristoteles, & ubi ponit? Sonum in aëre produci negare non potest, credis tamen illi qualitatem aliquam injungit, per quam auditio absolvatur, dicaturque sonus? Tantum abest, ut hoc ponat, quod apertissimè testatur αὐτὸ μὲν δὴ ἀφοπούο ἀηρό Διὸ τὸ ἐνθευπθον
aër vero auribus inaedificatus immobilis perseverans in externi aëris à sua fragilitate cohibiti motionibus sonorum differentias omnes exquisitè discernit.
σταυ ᾧ καλυθῆ θρύποις η τάται κίνεσις ψόφος ο δὲ τοῖς οἰστίν
εγκαλωκοδόμηται περι τῷ ακίνητον εἶναι, οπως αἰελῶς αἰδανί^{ται}
πάσις τὰς διαφορὰς τὸ κινήσεως. Quid clarius? Insonorum appellat aërem, qui tamen idem si moveatur, ingenitumque aërem impellat, sonorum omnium species repraesentat. Hic verò ullanc qualitas, praeter motum & secundum variam motionem soni varietas? Quid si motioni in aliis vocatis qualitatibus adjungas figurarum multiplicem ordinem? nonne verosimiliter affirmari posset, sine aliis superadditis accidentibus rem breviter absolvi? Sed quidquid demum tenuerit Aristoteles, quemadmodum allata su-

pe-

perius exempla confirmant, opinionem hanc de saporibus, ita nolim, reputet quispiam, sterilem adeo naturam esse, ut non ex aliis, quam ex dictis, deduci possint argumenta hoc idem satis probabiliter evincentia; quot enim occurunt passim experimenta, in quibus nihil observare licet, quod operando sit praeter determinata corpora, & ipsorum certas duntaxat formas, non sine statuta pariter subjecti stratura, & configuratione? Sic quid in menstruis Chemicorum, quid in spiritibus, in aquis regiis, quid denique vel in ipso igne deprehendas, quod & ad maximè actuosas particulas, & aptissimas penetratio- ni habitudines revocari non debeat, qui huic, illive corpori occurrentes per hujus poros aditum inveniant, per ejus verò non item, adeo ut hanc alterum, alteram verò illud subeat vicem? quae illa qualitas in menstruo quodam, & aqua forti, cum aurum solidissimum metallorum sua spoliat duricie, ita ut speciem liquoris induat, & per chartas extillet? quae illi in nitri spiritu, cum nexum inter, aurum, argentumque simul conjuncta dissolvit vi nulla ignis exsolubilem? quid illa in halitibus vini, quod in cucurbita distillatur, cum ebur, Cornu-cervi, aliaque plurima dura corpora sibi exposita redigit in friabilem substantiam, quam à diuturno prunarum ardore vix habeas; quid illa in Oleo Vitrioli ignem extinguens, linguam autem, carnemque gustantium adurens? quid cum admisti invicem liquores vel aliquibus pulveribus affusi fervent, ut ebullit cum sibilo acidus Buxi Spiritus Sali Tartari admistus, ut cum sibilo pariter ferventes confusi simul spiritus nitri & Cornu cervi sese invicem pellunt sursum, ut fetvorem exci-

tat cum strepitu coniunctum admistus Corallis acidus Limonum succus, fervore autem cessante dulcescit, quid inquam id rei est, & unde isthaec proveniunt tam in fermentis hisce chemistarum, quam in vulgatis aliis vel ad vitae conservationem, vel nostro malo ad ejusdem corruptionem tendentibus, quorum violentia non raro

— — — *grex totus in agris*
Unius scabie cadit, & porrigine porci,
Uvaeque livorem conspecta dicit ab uva.

Si motum demas particulis, & superficies? Cur levissimum manus, vel alterius alicujus corporis contactum non horret frons, licet eundem adeo reformident & Globulus, & Pinnae Nasi, & Mystax, & Alae, & plantae pedum, & quibusdam hypochondria, aliaeque corporis partes ut vociferentur, & quam longissime fugere tentent, nisi quod instrumentum illud tale est, ut in iis determinatis partibus sola sua figura, & motu talem passionem imprimat, quam in aliis, seu quod magis durae, vel molles, laxae magis, vel compactae, laeves, aut asperae, aut alias non absimiles conditiones habeant, producere non possit? Vides, quam diversas operaciones, seu passiones varia impellendi vis in partibus nostris producat: non ita commodo situ crura nostra teneantur modò stupescunt, quandoque dolore quodam adurente corripiuntur, percutiamus violentius terram, restituimur ex toto: impingat ad durum aliquod corpus humeri cum radio, & cubito articulus, adeo aliquando totam manum invadet dolor, ut tantum non deficias: viventem adhuc torpedinem digitos inter attrectes, ita ipsius motus impellet manum, ut ossium facta quadam

re-

resultantia cruciatus superveniant per aliquod spatum temporis fortasse duraturi; vides haec, & alia plurima ex te ipso cognoscere poteris, & ex singulis inferre, quantum non unus agitandi modus afficere sensus possit sine ulla qualitate superaddita, sine ullo accidente à mistione elementorum deducendo. Non memoro, quod vulgatissimum est in cibis, quorum alii mihi nutrimento sunt, illi exitio, hominibus interitum, brutis vitam pariunt: neque pariter quod observatur in vocatis venenis non omnibus aequè infestis, quin & idem animali discriminis nihil adducentibus, si certae parti applicentur, si verò alteri lethaliibus, ut elegantissimè in Observationibus suis circa Viperas notat accuratissimus, & eruditissimus Franciscus Redi; neque quod in aliis sensibus accidit, ut quidam odores, colores, sonitus arrideant aliis, aliis iidem sint graves, quoniam cum occurrant undique innumera penè dixerim exempla similia, quibus explicandis simplex partium motus, & figura sufficiunt, non videtur id ulterius urgendum, sed concludendum potius, verisimilitudine non carere, si conemur universum etiam saporum negotium tali ratione explicare, talemque affectionem refundere in figuræ salium per organum Gustiatricis facultatis repentium, & cuspidulis suis ita titillantium, & si acutiores fint, & nimis penetrantes ita continuum dividentium, ut grata, vel molesta resultet sensatio. Hinc explicatur optimè, cur impositis Gustatus organo solutis salibus tam citò feramus de sapore judicium, cur una eorum substantia tot saporibus generandis apta sit, quemadmodum unus Chalybs innumeræ edere operationes potest, prout diversimode aptatus, & conformatus est,

est, & cur iis Gustus afficiatur, & per quid ipsi sapidi nuncupentur, & nullam injungendam esse novam qualitatem, & observari naturae ordinem, & inalterabile institutum per faciliora, & breviora procedendi. Quàm insuper hujusmodi positio cum ipsorum salium figuris consentiat, & ex iis, quae descripsimus, & ex oculari observatione, & Gustatione demum ratum facere quicumque potest, adeo ut si & caetera desint, vel hoc unum sufficere posset ad statuendum id, de quo dubitatur, quare si me mutare nefas non est, ausim affirmare, ita se rem habere probabiliter: Itane vero? Nonne id est, & elementa rejicere, & eorum virtutes eludere, & mistorum generationem pervertere, & qualitatum vim nihili reputare, & quod majus est philosophiam confundere, & naturam ipsam sus deque miscere? Caveat universitas sibi, quò enim aliò tendunt specie quadam veritatis leviter obducta hujusmodi ratiocinia, quàm ut evincant, nullam dari posse qualitatem, neque secundam, neque primam, nulla elementa, nullam substantialem formam, quae si concedantur, evanescit illico hujus aspe&tabilis Machinae pulcherrimus ordo, & nihil certi habes, quod à mundi centro ad concavam usque Lunaris orbitae superficiem protendatur, unde generationes omnes, corruptionesque deducere possis, sed vagum quiddam tantummodo, & inordinatum, ex quo fortuitae concretiones, dissolutionesque habeantur sine certo substantiarum numero, sine determinata agendi facultate, sine statuta operandi ratione, quibus quid inconsultum magis, quid rudius, quid Philosopho indignius, quid à veritate remotius excogitari potest? Hui! bona verba, inquam ego;

ex

ex his, quae diximus, quisque ratiocinetur, ut libet, & conclusiones pro genio sibi fingat; mihi equidem adhuc non constat, tot, ac tantaene ex dictis deduci possint; neque enim is ego sum, cui vel ad unum, primumque obtutum tota, quanta est universitas, detegatur, sed postquam diu, multumque, & circum, & introspxi saepius, id unum intelligo, quod omnium operum Dei nullam possit homo invenire rationem, & quantò plus laboraverit ad quaerendum, tantò minus inveniat, ac etiamsi sapiens dixerit, se nosse, non possit tamen reperire; quare cùm me docente Aristotele, satis sit, ad hypothesin possibilem rem deducere, & rationis simulacrum aliquod adornare, meas adimplevisse partes arbitrabar, si ex plurimis naturae cognitionis operationibus sapores etiam ad eorum similitudinem explicari posse proponebam, ex quo adhuc non video, quid immineat periculi & qualitatibus aliis, & mistis, & elementis, & philosophiae, & naturae; quemadmodum enim horum dignitatem, & potentiam sartam tectam servavit Aristoteles, licet in supra memoratis passionibus nullus elementis, & qualitatibus, sit locus, quid eadem timant sibi, si illis accidentibus adjungatur sapor? Demum cùm Machina illa elementorum, mistorum, qualitatum, aliunde sit admodum stabilis, sollicitus quis esse non debet de ipsius ruina; utcumque verò sit stabilis, ut ingeniosa, ut naturalis, machina tamen est; at cùm quid absque machinis praestare possumus, cur ad ipsas frustra configimus: Quàm verò simplex sit, & parabilis illa saporum exposita generatio, & perceptio, reliquis permitto judicandum. Non tamen èò quòd à salium figura sapor emanet, objicere

meritò quis posset, nullum fore humiditatis usum in perceptione saporum, quam tamen necessariam experimur, hoc enim ut aliquatenus verum, si tamen requiritur ad communicandam fluxilitatem, & promovendam penetrationem per angusta Gustatorii instrumenti oscilla, quod ad dignoscendos satores non ita parum confert: Sicut etiam quis non ita proficiat, si urgeat, eundem saporem à separatis salibus producendum, quem in compositis, à quibus ipsos eduximus, experiebamur, quod tamen ita se habere non constat; quandoquidem quae huc usque de sale protulimus non eo sensu dicta sunt, ut saporum artifex ipse tantummodo sit habendus, sed ut intelligatur in eorum generatione maximum posse virtutem salis, cum hie, quamvis respectu caeterorum sapidum aliquod componentium mole minimus inveniatur, insipidum linquat compositum, à quo discernitur, nec inficiatur à caeteris componentibus ita rotundi, alterarique salis potentiam, ut alium à quibusdam concretis, alium ab eorundem separatis salibus saporem habeamus; quare cum neque postrema isthaec objectio, nec aliae ullaee propositam sententiam evertant, ad ea tandem deveniamus, quorum in gratiam superiora praemisimus.

C A P. VIII.

Linguae vulgata descriptio.

HAEC itaque de saporibus satis. Ut autem res absolvatur postquam de eorum natura, & operandi modo constitutum est, oportet, ut partem illam

pe-

peculiarem designemus, quam Natura consultò fabrificavit ad sapores dignoscendos. Et quoniam Gustatio in lingua maximè deprehenditur, acquum est, ut videamus, quae tandem substantia ipsam componat, quibusque partibus coagmentetur, ut iis expositis expendamus, quaenam ipsarum huic provinciae possit sufficere. Primo autem quid alii in linguae contextura observaverint, descripserintque hic proponemus, & consequenter quoniam non in eandem omnes de Gustus organo sententiam veniunt, sigillatim inferius ostendemus, nullam ex descriptis hactenus linguae particulis Gustatui inservire posse, tandemque & descriptionem propriam, & partem huic sensui destinatam afferemus in medium. Omnes igitur in linguae explicatione consentire videntur, partem hanc esse ad instar corporis humiditatem facile combibentis foraminibus undequaque perviam, undequaque permeabilem: sic raram, fungosam, spongiosam, & inanem appellat Aristoteles, quibus titulis cum omnia comprehendisse videretur, elegerunt alii ex iis unum, qui rem attingeret proprius, & vel fungosam, vel spongiosam, vel his non absimilem dixerunt; sic spongiae instar Lingua est apud fermè omnes Constantium Africanum, Casserium, Columbum, Laurentium, Vigierium, Liddellium, Glacatum, Fernelium, Plempium, Sennertum, alias spongiosae cuiusdam qualitatis apud Meletium; fungosam legimus apud Carpum, Valverdam, Casulanum, Riolanum; porosam afferit Titelmannus; in hoc inquam convenient Anatomici, Medicique non pauci, iisque melioris notae; Si vero ad introspectionem veniamus adeo sibi adversantur, ut adhuc certum quid

proferre non liceat, quod exactè constitutionem Linguae repreäsentet. Ecce siquidem Aristoteles omni linguam pinguedine spoliat, quoniam unum quodque pingue densum est, ipsam verò constituit raram; Aristoteli adstipulantem video Casserium: contra Melletius Linguam pinguescere pronunciat. Si de ipsius Natura Anatomicae rei studiosos, & Principes consulimus, num glandulosae substantiae sit, num musculosam participet, num peculiari constitutione gaudeat, Glandulosam habebimus ex Galeno; glandulosam, & muscosam à Casserio; Muscosam tantummodo à Carpo, carnosam à Veslingio, Cordi similem à Vesalio, ejusque pedissequo Platero; variis contextam fibris à Fallopio, Lingualibus ex musculis fortasse conflatam à Spigelio, quid ex plurimis confartum substantiis ab Arculano, & propriae spongiosae carnis contextum à non paucis; iisque vulgarissimis medicis. Si admirabilibus, celerrimisque linguae motibus observatis scisciteris, unde tanta proveniat velocitas, & diversitas motionum, non deērit Casserius, qui respondeat, tantam multiplicitatem, & celeritatem à musculis haberri non posse, nec voluntariam existimandam, cui subscribens Riolanus nihil esse cum lingua, & locutione, nec ejus agitacionem per musculos haberri, sed ipsam ad masticationem solum, & deglutionem spectare: quin & Curtium haesitantem videmus, quoniam si motus omnis voluntarius per musculos habetur, sese contrahentes, nullum habemus musculum, qui linguam possit exercere, ideoque motum, alium oportebit admittere; post quae fatetur tamen utrobique angustias reperiri. Si verò de numero muscularum interroges, sexdecim

recensabit in lingua bubula Pelops apud Galenum; quinque paria in Simia Galenus ipse; novem in homine Musculos Vesalius, quinque ad utrumque latus Valverda; utrinque tres, aut quatuor ad summum Fallopius; tres tantummodo hinc inde Casserius; in universum Spigelius duodecim, decem Laurentius, & cum eo jam communiter totidem numerabunt Veslingius, Caspar Bartholinus Pater, & Thomas Filius, Styloglossos videlicet, utrinque unum ab externa Styloïdis superficie in linguae latera; Myloglossos ad Molarium dentium radices è maxilla inferiori in linguae basim sub ligamento; Geneoglossos ab interna medii menti superficie in medium linguam; ex superiori Hyoidis parte media Basioglossos altius in linguae latera; ex Hyoidis cornubus ad latera pariter, sed ad radicem Ceratoglossos. Nec una, si advertamus, erit de hujusmodi partis involucris opinio; concedit enim duas Linguae tunicas Vesalius, alteram interiorem musculis communem; exteriorem alteram Buccis, Palato, Asperae arteriae, Oesophagoque superextensam; non unam Constantinus Africanus, quot autem non exponit; unam Mundinus, Carpus, Valverda, Fallopius, Platerus, Laurentius, Guintherius, Riolanus filius, quorum hic à Dura Matre, Valverda autem cum Vigierio, Perdulci, pluribusque aliis ab expansis, explicative tertii paris nervulis eandem deducit; iisque omnibus accuratior Whartonius exteriori tunicae quandam substernit Pulpam. Quid de ipsius usu commemorem? Linguam dicet Vidius Vidius de re medica optimè meritus civis meus proprium gustus instrumentum, & naturam ipsâ ad loquelam, & deglutionem abuti, non verò in hujus

gratiam esse fabrefactam , cùm loquela nihil ad bene,
tutoque vivendum faciat , & si è contra omnino ne-
cessaria gustatio. Vidio adversabitur ex toto Riola-
nus afferens , proprium vocis dearticulatae , seu locu-
tionis organum Linguam esse , cùm tamen audenter
affirmet (quis autem id credat?) visos à se homines ,
evulsis miserabiliter linguis , adhuc loqui , & puerum
speciatim è Pietonum regione malignis variolis adeò
vexatum , ut linguam totam expuerit absque vel mi-
nimo locutionis detimento , quibuscum convenien-
tes historias (si hujusmodi titulo dignae reputantur)
non ineleganter ad prodigiosas operationes revocat
Paulus Zacchias. Alii me quidem judice sapientius ,
iidemque non pauci pluribus linguam substituunt mu-
neribus , & deglutionem , & masticationem , & vo-
cem , & Gustum ejus ministerio perfici asseverant ita
naturae insistentes , quae pluribus praestandis unicum
non rarò accommodat instrumentum : in eo tantum
illi inter se discrepant , quòd non aequè omnes idem
constituunt Gustatus organum , sed alii cum Guin-
therio , Fernelio , Varandaeo nervos recensent ; alii
cum Casserio , Gregorio Horstio , Mercato , Senner-
to spongiosam carnem tenent ; alii externam tunicam
arbitrantur in magis vulgatam opinionem declinan-
tes , & à Mundino , Valverda , Spigelio , Vale-
sio , & quamplurimis eruditissimis Viris propugnatam ;
& unus quòd sciam semel , iterumque laudatus Whar-
tonus Gustandi munus tribuit primario Tonillis per
omnes , ubi Gustus perficitur , partes extensis . Con-
sultò hic praetermittitur & quod de nervis motoriis ,
& de sanguineis vasis , & de fraenulo , & de lato li-
gamento , & de Amygdalis passim , & unanimiter ha-
bent

bent Anatomici, sicuti pariter & de vasis salivalibus ad fraenulum hiantibus, qui non nostris hisce temporibus prodeunt in lucem, sed vel ipse Carpus, & Achilinus, latius ille, hic autem contractius descripserunt; & de foraminibus Tonsillarum, è quibus saliva, & mucus excernitur Avicennae, Galenique aetatibus plusquam compertis; quae enim de lingua aequo fortasse fusius recensuimus, ideo tantummodo explicata sunt, ut videlicet evidentius constet, quid alii in linguae structura deprehenderint, quod ipsi Gustus instrumentum haberi posse judicaverint. Itaque cùm satis patet, nihil usque adhuc in lingua deprehensum, quod ad Gustationem conducere posse reputatum sit, praeter vel spongiosam carnem, vel superextensam tunicam, vel dispersos nervulos, vel ad basim positas glandulas, & hoc solum cognoscere noster fuerit animus, praeter ordinem, & propositum esset de salivaे canalibus aliisque tractationem aggredi, quae nihil lucis, aut utilitatis afferret, & nullo modo cum iis, quae sunt prae manibus cohaereret. Age itaque, & singulis capitibus singula Gustatus reputata organa consideremus.

C A P. IX.

Gustus Organum non est in parte Linguae carnea.

OPINIONEM hujusmodi meditanti mihi plurima occurrabant, quae ipsam falsitatis arguere videbantur: diu tamen, multumque haesitavi, praecipue quia vel ipse Aristoteles in hanc declinat partem, cùm multis in locis apertissimè pronuntiet, & Gustum esse ta-

tactum quendam, & organum tactus esse vel carnem ipsam, vel quid carni proportionale. Quapropter cum varia & ratiocinia, & experimenta suppeterent mihi, quibus Linguae carnem non esse Gustatus instrumentum confirmarem, nec quo tandem modo eadem diluere possem, agnoscerem, & sensum insuper testimonio confirmatum haberem, aliud quiddam à carne admodum diversum fabrefactum à natura, quo tanquam instrumento ad suas operationes exercendas Gustatrix facultas utitur, non indignaturum Aristotelem satis fidenter in animum induxi, si ejusmodi opinionem non ita veritati consentaneam dicerem palam faciens, quibus motus rationibus ita pronunciare non dubitem. Primò itaque linguae substantiâ diligentius observatâ, ut deprehenderem, num in ipsius carne peculiare quicquam lateret, nihil invenire datum fuit, quod in quibuslibet corporis nostri, caeterorumque animalium musculis non habeatur, seu velis tunicas, sive nervos, sive arterias, sive carneas fibras, quae omnia cum inter se convenire patentibus oculis animadverterem, cur, inquam, si carnea linguae pars sedes est Gustationis, eundem sensum non experimur in reliquis carnosis partibus, sed in his concessum est, dolorem tantummodo ab impositis solutis salibus pati, non autem sapores dignoscere? Certè cum eodem modo omnes hae substantiae conformatae sint, cum idem sit corpus sapidum, quod applicatur, percipi posse non videtur, cur in lingua unam, alteram autem multò diversam in aliis musculosis partibus experiri debeamus. Sed ejusdem, inquis, naturae linguae caro non est, ac caeterarum partium; illa siquidem spongiosa est, & penetrationem facillimè concedit

su-

superimpositis substantiis; alii autem musculi applicata corpora sua densitate constanter excludunt. Esto, lingua porosa est; suisque foraminibus excipit sapidam humiditatem, quid inde? ex hocne inferas Gustationem in Linguae carne perfici solummodo, quia pervia est? Id equidem nunquam ipse crediderim, quid enim laxius, & magis spongiam referens, quam animantium pulmones? ergone gustabunt quamvis spongiosi? Nonne autem id est sensum opinionis pervertere, quae nulla foraminum commemoratione facta ponit Gustandi vim in carne, adeoque ad summum pori necessarii existimari debebunt, ut sales pervenire possint ad musculos, sed hoc nonne & in aliis partibus haberi potest? & de facto habetur quotidie, cum sudor effluit e corporis nostri poris, qui, quamvis sapidus, nullam in carne, per quam fluit, imprimit sapiditatem. Deinde ubinam quae tam decantata isthaec linguae substantia spongiosa, sive fungosa, sive quomodocunque ad laxitatem indigitandam appellitetur? Maximè oculorum non minus, quam mei animi hebetudinem doleo; quamvis enim utrumque obtutum defixerim attentissimum, nihil unquam inspicere aliud licuit, quam fibrarum quandam telam nullo modo dissolubilem alias musculos exceedentem potius, quam cedentem densitate, ubi proinde isti pori, isthaec foramina, ista caro spongiosa? sed non de carne ipsa intelligendum subjicis, verum tantummodo de involventibus membranis, ita scilicet ut hae propter laxitatem suam expeditissimè transmittant ad substratam carneam massam superexcurrentem humorem saporum nuncium. Quod si ita respondes, nonne adhuc urget superius expositum ratiocinium? Si-

O

qui,

quidem vel te ipso testante nihil aliud confert laxitas membranarum, quām ut pervadat humor ad carnem, ac proinde ad quamcunque carnosam partem ipse derivetur, eundem sensum procreabit. Hoc autem ut missum faciam, num dices, requiri peculiares tunicas, quae sint linguae solum, nec aliis partibus superextensa? Ut quidlibet promas, cur ejusmodi placitum hac interpretatione detorques? & hanc quomodo confirmas? Et ut ista praeteream, ecce si tibi sponte concederem, determinatas membranas expeti, nonne eadem est, quae involvit linguae corpus, & quae Buccas, & Labra succingit, & universam oris cavitatem? His verò partibus nonne haerent undequaque musculi ejusdem omnino naturae, ac linguaes? cur inibi nullum Gustum experimur? quid ad haec? Negabis experientiam, & sentiri affirmabis? Sales admove, & quid id rei sit, certo certius agnoscis? Num instabis, humiditatem ab oris internis lateribus statim effluere, non autem inhaerere, ita ut imprimere saporum speciem nequaquam possit; linguae verò leniter superaffluere, adeo ut etiam non mediocriter influat? Verissimum equidem effatum, nam saliva utpotè gravis, nec ad buccas, nec ad palatum diu suspensa manere potest, nisi cohibeatur, si tamen id, quod exinde deducatur, bene procederet, nonne abstergo linguae humore nullus saporum sensus produceretur? & tamen, ut dictum superius est, si à lingua humiditatem, quantum licet, elicias, falemque aliquem (Ammoniacum adhibere mihi mos est) eidem admoveas, saporem, quamvis non exquisitissimum, observabis. Insuper unde fit, ut in superiori Palati parte citra Gargareonem satis distinctè

gustemus, licet inibi tenuissimum humiditatis velum immorari possit, & nulli carneae substantiae ipsius tunica superinsteratur, sed glandulosae potius? Cur si caro Gustatricis facultatis instrumentum est, non in universa lingua hujusmodi sensione gaudet, sed sub apice usque ad fraenulum, ubi tenuissimam tunicam habemus, nullum, in superiori verò pariter nullum, aliquibus, aliis verò mediocrem creat, in apice autem, & ad latera exquisitissimum parit? Nonne ubique ejusdem Naturae caro obvolvitur, nonne eadem membrana, nonne humiditas eadem? Unde in tantula nostri corporis particula tanta effectuum diversitas? An non vel minimum cuique attendenti patet, ad linguae radicem, ubi Amygdalae, saporum sensum excitari, quamvis ibi neque caro reperiatur, & primo aspectu glandulosa illa corpora potius salivae separationi, & excretioni destinata videantur, quam saporibus dijudicandis? Sed quid ego praetereo maximam illam celeritatem, qua momento citius impensa linguae sapida composita sui saporis speciem facultati repraesentant? Tenendumne ita velociter à sailitis corporibus perrumpi non ita tenues linguae membranas, ut ingestō sale tantum non in instanti ipsius sapor discernatur? Et si hoc admittere quis non renuat, cur citius, exactiusque sensus hic excitatur in linguae apice, & lateribus, ut dictum est, ubi membranae multò sunt crassiores, & compactiores, quam aliis in locis, ubi crassae minus, & minus densae? Non hic commemoro, quae subjicere possem, innumerā penè ratiocinia, quae cuicunque meditanti res ipsa suppeditat; placet enim potius insistere sensibus, & ea paucula, indubia tamen, excerpere, quae accurrior

experientia demonstrat, & hanc oculatissimam ducem sequi, quām illam si oculatam, non raro equidem caecutientem. Miror interim maximopere, quomodo factum sit, ut magnae auctoritatis, & doctrinae viri aliás mordicus defendantes omnium externorum sensuum operationes ad internos nervorum ope derivari, Gustus tamen judicium Carni concedant nihil communionis habenti cum cerebro, sed cum ossibus tantummodo, & membranis, quibus alligatur: miror inquam, nam quamvis instent, id exinde per nervos exigi; nisi impressionem aliquam recipient, non poterunt communi sensui, & aliis repraesentare id, quod nunquam agnoverunt: si vero quid patiantur, cur in scenam advocare linguae carnem, ut haec cum nervis operetur, quod ex seipsis praestare possunt? Ex seipsis? Quasi scilicet ad habendam gustationem necessariò non requiratur humiditas, nec hujus expertes omnino sint nervi, nec eandem congenitam habeat caro, ita ut sit ejusce humoris conceptaculum. De humore jam superius locuti sumus, num hic nervis communicetur, an secus, nec confirmatum video, nec urget necessitas, ut quicquam proferatur. Linguae carni ingenitum humorē esse, mihi non constat, sicuti etiam me latet, quomodo id investigare potuerit Casserius, qui is ipse est, qui sic instat, & potius si quid concludi potest ex iis, quae circa linguam consultò notavi, contrarium evincitur: extimam videlicet superficiem quoad licuit abstensi, linguaeque deinde compressā digitis, ne guttulam quidem humoris exprimere potui, & hoc tam in demortuis, quām in viventibus animalibus, unde certior sum factus, non modò nullam humiditatem in lingua

con-

contineri, sed nullos ad ipsius superficiem hiare salivae ductus, de quo antea dubitaveram. Quodsi adhuc dubites, objiciasque, consuetus naturae mos est, quasdam valvulas incertis animalium partibus admirabili artificio fabrefacere aditum quidem permittentibus, exitum autem impedientibus; cur ergo suspicari non liceat, in memorata linguae expressione nihil exsudasse, eò quod ita valvulae in canaliculis illis ita dispositae sint, ut concedant advenienti extrinsecus humori transitum ad intimam linguam, ex hac autem in exteriora non item? Vide quid dicas, & quid exinde consequatur: Siquidem ne nimium in hoc immorer, & moneam dumtaxat esse id purum putum figmentum, & nihil praeter suspicionem, si res ita, ut fingitur, se haberet, diu, multumque nos idem afficeret sapor, & omnia, quae ingeruntur eundem representarent, quandoquidem cùm advenienti extrinsecus sapido liquori valvula regressum prohibeat, nonne id in innata carni humiditatem eandem producet impressionem, & caro consequenter semper eadem affecta qualitate judicabit cibos omnes unius, & ejusdem saporis? Quod si ratio non suadet, oculos, & manus admove, observabisque, non magis nudam esse linguae carnem, quam aliarum sit partium; quod ut ipse clarius deprehenderem ab animalis faucibus statim à pastu suspensi linguam avulsi (maxime enim tunc temporis, quo mox à gustatione cessaverat par erat ut madesceret carnea linguae substantia) separatisque membranis, (quod me stupente facillimè peractum) nudam musculosam partem introspxi attentius, nec humiditate scatentem vidi magis, minusve, ac sit genus omne muscularum; caeterum sufficit humiditas,

quam saliva suppeditat. Quid igitur? Gustatio per linguae membranam habebitur; si ei muneri ineptam reputamus linguae carnem.

C A P. X.

Non in Membranea.

At ne in membraneo quidem ejusce partis integumento Gustatricis facultatis organum reperiri satis probabiliter evincere confidimus. Quoties mecum ipse perpendi summam illam velocitatem, quā sapores apprehendimus, semper arbitratus sum, argumentum inde desumi posse iis maximè favorable, qui in extima linguae tunica sapores discerni afferunt, neque enim aptior videtur locus, quā summa linguae cutis, ut statim ab impositione sapidi corporis de tali qualitate judicemus, unde parum abfuit, quin & ipse pariter in eam sententiam descenderem. Re autem consideratius aliquanto pensitata, visum est, summam illam in percipiendo sapore celeritatem posse quidem concludere, Gustatus instrumentum verosimiliter haberi in superficie linguae, sed huic provinciae membranam perficere tentanti mihi obstabant non invalidae rationes, ita ut coactus fuerim ab instituto recedere, & affirmare solūm, quid in linguae prima facie data opera fabrefactum ad judicandos sapores, at non Membraneam. Primò itaque occurrebat consideratio hujus linguam involventis tunicae, quam si huic operationi destinasset natura, cuiusdam peculiaris substantiae membranis caeteris non communicatae fabrefecisse congruum videbatur, nec ad alias extendisse partes:

tes: utrumque autem non ita se habere animadvertebam, nihil scilicet inter linguae, & involucra aliarum partium discriminis intercedere, & insuper hac non indui linguam solam, sed interiorem oris universam capacitatem, & labra, & oesophagum, & ventriculum, & asperam arteriam succingi, adeo ut una, eademque tunica linguam involvens omnibus etiam hisce partibus superextendatur. Quae cum omnium anatomicorum auctoritate, & experientia confirmata ita se habeant, unde est, quod num corpora sapida sint, an secus, & si sapida, quo sapore praedita Lingua solummodo discernit, non autem aliae partes, quibus eadem tunica communicatur? Admove sales, & salivam sale quantumvis praegnantem labiis, nihil sentis, praeter contactum: madescat eadem Buccarum superficies, idem prorsus accidet, quod in labris; idem de gingivis, aliisque dicendum est. Quin nonne hujus tunicae portio totam Palati concamerationem incrustat? Sed hujus medietas, qua labra respicit nihil sapidum patitur, & ea pars, quae citra uvulam Linguae radici imminet Gustatione gaudet satis bene. Sed quid de Lingua ipsa commemorem, saporem non undequaque dignoscente, ut dictum est? Quid habet peculiare portio illa membranae ad fraenulum usque sub apice, ut Gustationem obire renuat, sicut & in linguae planicie modo nullam, modo obscuram praestat? Cur in apice ejusmodi tensionem habet, & in lateribus, quae si liberis oculis observentur, aut ut clarius, quid id rei sit, detegatur admota crystallina lente tantum abest, ut tunicam repraesentent, quod potius quandam substantiam offerunt a linguae natura, & membrana qualibet admodum diversam, quam

inferius explicabimus? Cur ad Tonsillas etiam accidit sensatio, & quid iis indulxit Natura nobis incomptum, quo mediante ipsarum tunica ea possit cognoscere, quae eadem membranā donatae caeterae partes deprehendere nequeant? Cur, si ita se res habet, gustum & ad Lingulam non experimur, quam superelabi cibos in deglutitione necessarium est eorum ope sic occlusa aspera arteria? Cur idem etiam non sentit cum oesophago ventriculus eadem tunica participantes? Non dicas autem ad ventriculi os talem sensum accidere; accedit enim ibi sensus, at non saporis, sed doloris intensissimus, sic quām misere afficit Cardiagiacus affectus, & quām diu, quantumque cruciamur, cùm nimis avidi cibum plus aequo calentem ingerimus; vel cùm impulsus aliquis eandem partem vio- lenter impetit extrinsecus, quibus vel deficimus, vel etiam aliquando perimus; adeo exquisiti sensus est nerveus ille contextus in oesophagi, ventriculique confinio. Sed nonne ventriculus ingesta quaedam ita averfatur ut ad nauseam excitatus eadem ejiciat per vomitum? Nonne hoc evidens argumentum in eo procreari saltem rudimentum aliquod saporis, qui si injucundus sit, nullo modo amplecti ipse velit ejusmodi cibum, nec concoctione perficere? Nequaquam id ipse crediderim, sed quemadmodum nos quotidie, & saepissime experimur, quaedam tactum nostrum allucere, quaedam verò adeo cruciare, ut ab ipsis omnino abstineamus, id in ventriculo etiam eodem modo contingere affirmaverim, ita scilicet ut determinata corpora, ita ipsius nervos, membranasque titillent, ut ex necessitate eadem sese contrahant irritatae stimulis illis, impulsusque per eām contractionem cibus red-

reddatur per vomitum. Ergo, instas, quemadmodum molestiae sensus ventriculo conceditur, non erit idem jucunditatis sensu destituendus, quem tunc exerceat, cùm ingesta amicabiliter retinet, degeritque, quod etiam innuere videntur insignes illae nervorum propagines, in quem enim alium usum datae, nisi, ut ventriculus suavia ab insuavibus discernat? Molestiae, ut sic & ipse loquar, sensum, qui ventriculo concedi potest, ne rem plus aequo scrupulosius examinare videar illum eundem puta, qui jucunditatis; neque enim in sensus organo solum, sed quandoque etiam in corpore, quod sensui admoveatur, radix est suavitatis, & insuavitatis, ut patet; ex his vero quid aliud inesse ventriculo concludas ultra tangendi vim? Praeterea istam delectationem à nobis, dum cibum continemus, non percipi, sive quòd non attendamus, sive quòd propter assuetudinem insensibilis evaserit, sive quòd verè nulla sit eo prorsus modo, quo nec delectamur, nec tristamur, dum plurima contremamus; tenemusque (nisi gratiosam appelles sensiōnem, quae ingrata non accidit) cibus verò interim concoquitur, eò quòd in ipsum ita cohibitum ille succus digerens operatur, quem fortasse suspicari liceat in ventriculi cavum derivari è nervis, quando ii ad motum peristalticum non faciant, nec sensui inserviant, quorum alterutrum, vel utrumque licet praestarent, adhuc stare posset rationabilis illa suspicio. Ut verò haec missa faciamus, quid ad illam diversitatem partium in ore contentarum, quarum aliae, quamvis omnes eadem tunica circumcingantur, distinguendis saporibus aptae sunt, aliae secus? Nonne satis apertè demonstrant, quod intendimus? Arguant quidem

aliquid; dubitare tamen fortasse quispiam posset, num in iis partibus diversam habeat membrana crassitatem, ita ut hac mediante non omnibus in locis gustus excitari possit, sed in iis tantum quae determinatae crassitieⁱ tunica involvuntur, quales supra recensitae partes habendae erunt, si constat experientia, sapores ab iis dignosci. Dubitare equidem quicumque potest, imò quicumque veritatem amat par est, ut dubitet, ita enim ad ipsam progredivimus aliquando asseditur: haec tamen dubitatio quanti momenti est? Partes illas gustantes hoc determinatae qualitatis involucro tegi, & gratis asseritur, & falsum est, ut cuilibet manum admoventi patere facile potest, & ut ultrò id concedam, ne diutius haeret, credisne, eò quòd in diversis ejus membranae locis diversa crassities reperiatur, ideo hic, non alibi Gustus emergat? Vel tota membranae substantia huic operationi idonea est, vel aliqua solum ipsius particula: si universa, quid refert, num crassior illa sit, an subtilior? siquidem ubicumque sapidum corpus applicaveris, gustabit: Si verò determinata solum portio, quaenam illa? ubi posita? non in superficie, ita enim crassitudo nihil juvaret, nihil impediret: ubi igitur? in profunditate? Sed sint membranae omnes in plurimas tenuissimas membranulas divisibles, & consequenter altitudinem habeant aliquam, quis tamen adeo perspicacis obtutus differentiam advertat inter laminulas propè membranae extimam superficiem separatas, & separatas circa medium, aut finem? Ita diverticula quaerunt sibi quotquot isthaec, aliaque similia, quae nec ratio, nec sensus assequi potest audacter effutiunt, ut interim imminenti periculo sese subducant. Sed non sint ist-

haec

haec diverticula, & numeris omnibus absoluta ratione existimari debeant, nonne per linguae tunicam Gustatio perficitur supervacaneum opus aggressa natura est in salivalis humiditatis productione, & derivatione ad os, per quam sales separantur? quandoquidem si puri soluti sales linguae imponerentur, nullus in hoc usus esset salivae, & nulla ejusdem necessitas, videretur enim secutura Gustatio, quando saluum particulae tangerent, afficerentque Gustatus instrumentum; & tamen, ut jam innuimus, obtusus sensus, & imperfectus producitur exsiccâ linguâ, nonnisi adveniente humiditate ad exquisitum redigendus. Quale hic subterfugium? Fortasse applicare purum, & separatum sal non esse ex instituto, & necessitate naturae, sed cibos ingerere ex pluribus substantiis conflatos, inter quas & salina lateat nonnisi masticatione, & humore separabilis, ac proinde non temere consultum, ut saliva in oris capacitatem è certis canalibus emanet? Partim haec ego concesserim, & ultrò admiserim, & comminutionem cibi, & humorum ad educendos sales exposci: difficultas tamen aliò spectat, videlicet non constare, cur exactis saporis sensus non confurgat ab imposito simplici sale tunicae linguae, si per hanc sentimus, quoniam hic nullum jam est opus aut masticationis; aut solutionis: quid verò refert, sitne id ex naturae consuetudine, an ex hominum placito? Insuper quem in membrana loculum assignabis; quin penetrans sapor per multas horas occupet, imo in aegris ad plures dies? qui aliquando ita haeret tenaciter, ut quamvis diù, multumque linguam universam laves, relavesque, tamen haud possit ablui, & vim suam exercere perget, quo-

usque tandem educitur, & aut deglutitur, aut expi-
tur? Quid in praetenui tunica monstrabis, quod sales
tanto tempore cohibere possit, altè sepelire, arcteque
colligare, ut vel aquae non concedat aditum, ut secum
trahat affixum saporem? nisi fortasse respondeas, diu-
turnum illum ejusdem saporis sensum aliunde provenire
posse, nec esse necessariam salis realem inhaesionem;
quod quia sua verosimilitudine non caret, quid hoc
admisso membranae inest, cujus ope ipsa gustando sit?
Quid tandem inest? quasi videlicet indumento quodam
non vestiatur lingua, quod nihil aliud est, quam ner-
vorum expansio per universam superficiem, & inaudita-
tam sit, & monstruosum nervis inesse vim sentiendi. Et
tu igitur accedis afferentes à nervis exoriri Linguae tu-
nicam? Ego vero id nullo modo veritati consonum ar-
bitror, nec quicquam communionis interesse censeo in-
ter Lingualess nervos, ejusque membranam, & quam-
vis nervea Linguae tunica supponatur, credis igitur,
ipsam proinde gustaturam, & nervos in tunicam, &
quomodocunque dispositos capaces esse Gustationis? I-
pse quidem negaverim, sed videamus.

C A P. XI.

Non in nervea extrinsecus vellicata.

QUONIAM igitur eò jam redacta res est, ut in
praesenti inquiramus, sitne Gustaticis facultatis
organum in nervis constitutum, posset hujusmodi
quaestio in duas dividi, ita ut altera perpendret, sit-
ne illud in reputata nervea Linguae membrana, altera

an in nervis per substantiam repentibus, ut aliorum opinio est. Utramque tamen in unam coaptabimus; eadem enim argumenta utramque impugnare videntur, & ex aequo impetere tam defendantes tali muneri destinatam esse nerveam linguae contexturam extimam, quām propugnantes eam provinciam esse penes nerveos surculos per interiora dispersos: Siquidem sive nervi intus lateant, sive superficiēi insternantur, non possint sapidis corporibus occurrere, nisi propria exterioris tunicae superficie, cūm distributi per linguam sint proni, ut ita loquar, & extensi; quare cūm ubilibet eandem sortiti sint positionem, talemque, ut extrinsecus tantummodo affici à sapore possint, si hoc in capite evicero talem extrinsecam affectionem Gustationi perficiendae ineptam esse, arbitrabor iis omnibus imposuisse silentium, quorum constans haētenus opinio fuit, per eas sic dispositas partes eandem obtineri posse. Hic igitur non contendimus à gustandi munere nervos relegare, sed solūmodo requiri certam ipsorum posituram, qua mediante sapore velint nolint ex necessitate cogantur afficere certam quandam eorundem particulam, & nervorum situm usque adhuc ab Anatomicis animadversum non cum esse, quem necessitas expedit. Hacque certo certius est, quibuslibet membris communem quandam virtutem inditam à natura, per quam & calidum, frigidumque quid esse dicimus, & humidum, & siccum, & durum, & molle, & asperum, & laeve, & si quae sunt alia, quae ex eo tangibilia nuncupentur, quod talis potentia isthaec, dijudicans tactus à nobis appelletur: constat etiam evidenter quasdam ab eadem natura selectas partes, quibus

non solùm tangendi vim inesse voluit, sed hanc ultra facultatem ingenuit aliam, per quam accidentia quae-dam à vocatis tangilibus admodum diversa distin-guimus, colores per oculos, & caetera, quae in compositis qualitatem differentia, cùm jam communi-ter deprehendi dicatur, per diversas sensuum ner-vis factas à sensilibus impressiones, arbitrari quis fortasse posset, hic unam, alibi aliam sensionem elici, vel ob diversam objectorum applicationem nulla supposita discrepantia in instrumentis sensuum, vel ob variam sensuum fabricam eadem applicatione sup-posita, vel & ob differentiam in constitutione sen-suum, & simul in objectorum applicatione, quorum singula, ut uno ex innumeris exemplis illustrem, vi-des, quicumque titillationem horres ab eodem cor-pore, prout diversimode admovetur modò contactum solùm, modò verò affectionem vellicantem in eadem parte produci: vides insuper corpore diversis parti-bus eadem ratione apposito híc titillationem, inibi tactiōnem emergere: vides denique hanc passionum diversitatem tum etiam haberi, cum & diversa ratio-ne, & diversis partibus idem corpus applicatur. Ut autem isthaec omnia ad rem nostram traducantur, compertissimum cuique est, Linguam inter eas partes recenseri, quae non tangendi facultate solùm gaudent, sed obtinent insuper aliam potentiam, qua circa de-terminatas compositorum proprietates versantur, & discernunt, & haec in Lingua Gustus dicitur, id au-tem, circa quod exercetur, saporis nomine venit: hic verò cùm superius ostensus sit à salibus proficisci; illud modò negotium facessit, qui nimirum fiat, ut hujusmodi sensum Lingua solummodo experiri debeat,

si praestat id per nervos secundum vulgatam descriptionem dispositos, quando omnino similis eorundem distributio in quibuscumque partibus reperitur; videatur enim eadem ubilibet affectio secutura, cum ubilibet idem sese offerat instrumentum; quare cum id non accidat, sed a salibus aliud in lingua, aliud in membris caeteris patiamur, & superius dictum sit, sensationum diversitatem aliquibus ex iis tribus conditionibus procedere, si hoc ostendero, quod eo Gustus organo supposita deberet eadem ubicumque sequi sensatio, cum illae determinatae conditiones ubicumque praestari possint, ostensum satis arbitrabor nervorum vulgatas propagines non esse Gustatus instrumentum. Et primò si verum est, sensationum diversitatem in eadem parte oriri ab eodem corpore, prout hoc diversimodè sentienti particulae admovetur, hic diversas passiones producendi modus explicare non potest, cur sola linguae nervea substantia ei affectioni, per quam sapores discernimus, idonea sit, aliae vero nequaquam quarumlibet partium; nam caeterorum membrorum & linguae cutis vel sunt ejusdem, vel diversae naturae: Si diversae naturae sunt, jam meritò dici non poterunt una pars, quemadmodum dici possent, si eandem participarent substantiam, cum nihil referre videatur, sintne uni, an alteri membro circumducta, & sic ad rem nostram id non faciet, qui eandem partem supponimus. Si vero integumenta quaelibet nihil differunt, quoties libuerit, licebit de saporigibus non linguâ solùm, sed reliquis quibusque partibus judicium ferre; quoniam si digitis ex gr. eodem modo salem aptemus, quo linguae, dum gustat, aptatur, non est, cur Gustatio sequi non debeat, cum

eadem nervea membrana eodem modo afficiatur: & tamen quis nescit, Gustationem uni linguae concessam esse, negatam omnibus aliis? Nec quicquam proficias, si velis altius esse penetrandum, ut sapores aliis membris gustemus; quantumvis enim penetres, tale nihil senties, ut cuilibet facile patere potest, & ipse non semei expertus sum meo malo, tum videlicet, cum me non advertente incisis etiam non ita summa cute digitis impactis consultò salibus nihil, praeter maximè cruciantem dolorem deprehendere potui. Deinde nonne id est amittens discriminem aliquod inter hasce membranas? Fateor id quidem, inquis, & libentissimus fateor, proindeque dixerim potius, ideo nervos unius Linguae Gustantes esse, quia determinato quodam modo fabrefacti sunt, vi cuius compositionis in ipsis una, in aliis vero nervulis alia ab iisdem salibus eodem modo contingentibus oriatur affectio, quarum illa Gustatio à nobis nuncupetur. Et ipse pariter aliquam differentiam in nervis non invitus admiserim; quod tamen hac una fieri possit talis, ac tanta sensionum discrepantia non ita facile adduci possum, ut credam, cum non videam, quid per hanc haberi possit eodem objectorum contactu supposito, praeter eundem seusum plus minus exquisitum; discrepet enim nervea linguae natura à nervea manus crassitie exempli gratia, & sit illa crassior: vel ad sensum excitandum sufficit, ut sensibile corpus per superficiem tantummodo moveatur, vel inter utrumque nerveae telae stamen penetrare debet, vel ipsa filamenta quodammodo incipere, ita ut exinde sequatur divisione illa continui, quam dicunt: Si motus in superficie satis est, jam nihil referre videtur, sitne membrana cras-

crassior, an subtilior; Si penetrandum est per poros tunicae, quoniam membrana crassior ex pluribus membraneis lamellis constat, quam tenuior fiet, ut eundem sensum exquisitiorem patiatur repetita in iis singulis vellicatione, haec autem experiatur obtusiores paucioribus conflata: Si incidendi nervei funiculi, nonne id in omnibus exerceri potest? Quod de crassitie dicitur adhibe raritati, aut densitati membranarum, & quibuscumque aliis, quibus differre possunt inter se tunicae, mutatis scilicet, quae mutari extunt. Nec meliorem subeas fortunam, si statuas, erit igitur admittenda & contactus, & compositionis in linguae nervis discrepantia, per quam ipsis tantummodo Gustatio concedatur; quandoquidem cum nihil habeas in membrana, & linguae nervis, quod in aliarum partium pariter non observes, iisque possis accommodare sales, ut libet, non est, cur Gustatio & hic etiam non habeatur. Quae, cum ita se habeant, quid aliud hic concludendum superest, quam reperi peculiarem quandam in linguae nervea substantia constitutionem, qua cogente sal velit nolit determinatam, nec extrinsecam ipsius partem afficiat in expressione saporum, qua statuta compositione destitutae caeterae partes Gustandi facultate non polleant? Sed hoc inferius multo explicatius; hic interim indulgeat mihi quicumque non reperit experimenta, quibus rem totam ad evidentiam traducam, siquidem circa partem res agitur cui experimentalem manum admoveare vel cogitatu barbarum est, nec minus factu saevum, ac impium; nam usum lingualium nervorum, & num extrinseca sui superficie de saporibus judicent ab hominibus tantummodo rescire possumus, illud

autem alio modo exactè deprehendi non potest, quām nervis ipsis denudatis, deinde appositis, motisque extrinsecus salibus; quis verò tam crudele experimentum humanus animus non abhorreat? Ubi igitur tandem concludis peculiaris isthaec habitudo, per quam una Lingua de saporibus judicat, & ab eodem sale semper ejusdem saporis species in ipsa producitur. Mirum id profectò videtur; nam si cuilibet sali & plures acies, & plures aculei, & superficies plures insunt, per quas gustamus, unde ita disponuntur in ordinem, ut semper eadem sui parte officiant organum nec modò una, modò altera compuncti plurimas ab eodem sale saporum differentias habeamus? Totum hoc inferius explicabitur, ubi afferemus in medium, quid accuratior dissectio suppeditaverit rationi, ut utrique problemati verosimiliter satisfaceret; alterum quidem ad gustantis instrumenti structuram, alterum verò ad vellicationem specialis in nervo partis reducentes. In Nervo? inquis: Ergone postquam & carneam, & membraneam linguae substantiam ad Gustatorii organi provincia deturbas nerveam substituis, excludisque Glandulosam.

C A P. XII.

Non in Glandulosa.

NE R V E A M substituo, & glandulosam excludo. Indulgeat hic mihi Whartonus summopere suspiciendus, & semper meritò laudandus, si veritate cogente affirmare non dubito contra ipsius assertum, Tonsillas nihil ad Gustum facere, nec in iis Glandulis

lis praecipuum Gustaticis potentiae organum insidere; quoniam si rationes attendo, quibus vir ille, caeteroqui ingeniosissimus, confirmare nititur sententiam suam, nihil invenio, quo ad ipsum deficere adigar; & insuper si Amygdalarum naturam contemplor, nihil observo, per quod peculiare Gustatus instrumentum appellari mereantur. Haec itaque Clar. Whartonus: *In primis existimo, hanc glandulam esse primum Gustus organum, & hoc munus esse primum ejus usum; etenim omnes oris partes, in quibus Gustus perficiatur, Glandula haec sola sua membrana interveniente subtendit: non est autem naturae mos aliam partem inter illam, cuius muneris est sentire, & organum sentiendi interponere: quare cum pars haec ubicumque gustus exerceatur proxima sit objecto gustili, necesse videtur, ut ipsum gustus instrumentum sit, & si instrumentum fuerit ex concessis evincitur, idem munus primum esse usum ejusdem partis, &c.* Sic ille. Hic loquitur de Parysthmiis, quarum productione quadam omnes gustantes in ore partes obduci affirmat; quid si & non gustantes pariter obducantur? (ut hic interea loci non disputem de Tonsillarum hujusmodi extensione, de qua mox.) Supra jam dictum est, & ad apicem, & ad latera, & ad radicem Linguae, & citra Uvulam in Palato Gustationem dari in Linguae verò planitiae modo nullam, modò obscuram, & ab apice ad fraenulum nullam semper secundum hactenus observata: quid tu putas ingustantes has partes eadem substantia glandulosâ per Whartonom, & Tonsillari non circumtegi? Evidem eadem omnino involuntur ex aequo omnes, ac proinde quare non liceat mihi eodem modo, eademque methodo, qua ad opinionis suae

confirmationem procedit Whartonus, eandem impugnare, & evertere, si in ore Gustandi vi destituta non una pars eo corpore incrustatur? Quinimò Lingua apice maximè gustare unicuique plusquam compertum est, tamen cò loci lamina, de qua nobis sermo, tenuissima reperitur, sensim crassescens, quo vergit ad posteriora: quodsi dicas, tenuitatem esse necessariam ad exquisitam gustationem, cur, inquam ego, ad fauces, ubi praecipue per Whartonus gustandi vis in Amygdalis, tanta est earumdem crassities? Sed quid de palato dicendum erit? Ea quam memoravimus ipsius portione de saporibus judicium ferri indubium est, & aequo notum nullo modo illuc Tonsillas pertingere; patet igitur, illam Parystiarum creditam extensionem & reperiri in partibus ingustantibus, & in aliquibus, quibus gustandi vis, omnino desiderari, ac proinde patet etiam evidenter hujusmodi inconstantia naturae attentius pensitata, glandulam illam nihil ad Gustationem conferre. Nec subjiciat aliquis & Palatum glandulosâ quadam massâ videri circumdate; hoc enim, ut ultrò concedam, eadem tota ipsius concameratio, eadem Buccae, eadem tota, quanta est interna oris superficies, incrustatur, cur sapidis corporibus applicatis hae partes Gustationem non obeunt, si adeit & instrumentum, & objectum? Praetereo nihil observari peculiare in Tonsillarum substantia, quod Gustationi inservire jure merito dici possit; hujusmodi sensum ibi obscuriorum esse, ubi exquisitor haberi deberet; satis utiles, & occupatas existimandas Amygdalas, si inter secretorias glandulas numerentur, & his similia plurima non recenseo, ni affectator videar prolixae disputatio-

tionis. Pergit deinde Whartonus, inter objectum, & hujusmodi glandulosam crustam propriam solummodo tunicam interponi, & consequenter cum glandulosa illa moles gustabili proxima sit, & inter instrumentum sensus, & ipsum sensibile nihil mediare velit natura, jure merito talem glandulam Gustatus instrumentum habendam esse. Sed si verum est, ita naturâ comparatum esse, ut inter organum, & objectum nihil interveniat, nonne Whartonus ipse fatetur circumvestiri glandulam membranâ propriâ? cur non statuendum potius, tunicam esse gustatus instrumentum, cum immediatè corporibus salitis occurrat? unde novit naturae constitutionem hanc, ut nihil intercipiat inter sensibile, & instrumentum sensus? Nonne, si ad sensus caeteros, vel ad eos saltem; in quibus res est apertior, attendamus, suaderi videtur omnino contrarium, cum inter colores, & retinam tot humores, & tot membranae intercipiantur, & inter sonorum corpus, & nervum auditorium mediet Myrinx, & aër ille, quem memorant implantatum, ut nihil hic adjiciam de admirabili cochleae, & labyrinthi fabrica, & positione in petroſi ossis cavitate. Quodsi evadere quispiam studeat cum dicto, negari quidem isthaec non posse, tamen Lucem ad retinam usque pertingere tunicas illas, & permeabiles humores pervadens, & aëris pariter undationem quodammodo ad auditorium usque nervum excurrere, impellendo scilicet eodem ryhtmo Myringem, & hinc aërem ingenitum, quid mihi pariter urgere non liceat, posse gustus organum alicubi in linguae profunditate latere, & hanc esse à sapidis speciebus permeabilem? sanè quemadmodum in Whartoni sententia glandulae

tunica nihil obstare reputatur, quo minus illa sit Gustatus organum, non video, cur & glandula ipsa in aliis opinionibus obstare debeat? Et ne quicquam asseris, ejusmodi membranam pro nihilo reputandam esse, quod ejus glandulae propria sit (sive enim propria, quod maximè controversum, imo negatum inventio à plerisque) sive communis, id quod hic negotium facessit, illud est duntaxat, num penetrabilis sit, an secus, & de hoc maximè dubito, quoniam illud involucrum non ita tenue ad linguae radicem, dum apicem versus progreditur adeo crassescit, ut in apice vel ipsam artuum cutim altitudine exaequet. Monstrumne insuper illud simplex aliquibus non videri, sed in unum, & alterum divisum? Eset jam nonnihil immorandum, ut palam fieret, reperiaturne revera hujusmodi glandulosa lamina in quacumque gustatrice parte, quia tamen me non advertente aequo latius expatiata est oratio, brevissimè pauca isthaec attexo, cùm praecipuè & inferius de hoc agendum sit. Sub involucro linguae latet nescio quae crusta nec membranae, nec musculi, nec nervi nomine donanda, sed ne Tonsillaris quidem glandulae, cùm plurimum à Parysthmiis discrepet & colore, & consistentiâ, & structurâ, & substantiâ, ac denique, ausim enim dicere nihil videtur habere similitudinis, non cum Tonsillis modo, sed ne cum caeteris quidem glandulis. Vide autem ejusdem descriptionem accuratiorem in proximè sequenti capite. Sed instas, cujuscumque demum substantiae hujusmodi lamina censenda sit, cùm affirmare cogamur ad Tonsillas gustationem fieri saltem ibi erunt eaedem tali muneri destinatae. Ne ibi quidem, ô bone! mox autem habebis earum particu-

larum

larum historiam, quas ut gustarent consultò natura fabrefecit, non in faucibus modò, sed ubicumque Gustatione nos frui deprehendimus; Haec autem jam nimis multa de Glandulis.

Haec sunt quantum quidem mihi cognoscere datum est praecipua Anatomicorum, & Medicorum placita de Gustatricis facultatis organo. Supersunt tamen adhuc aliae aliorum opiniones, quae licet non adeo, ut supra memoratae, increbuerint in vulgus, non esse praeterēundas aequum duxi, cùm satis auctoritatis, & famae ipsis coniclient auctores sui utpote inter sapientes, qui usque adhuc in litteraria republica rem suam contulerunt maximi nominis, & existimationis. Ecce siquidem habemus Platonem naturae; divinarumque rerum prudentem non minus, quam pium observatorem asserentem Gustus instrumentum venas: habemus Cornelium Gemmam hominem versatissimum in rebus dixerim omnibus ei muneri praeicientem humiditatem quandam aratiformi osse contentam: habemus Eustachium (ne de singulorum asseclis quicquam profaram) in sectionibus accuratissimum & ipsum Anatomiae genium tale munus dentibus demandantem, quorum cùm vel ipsum nomen apud omnes meritò tanti sit, ut vel id unum sufficere reputetur ad conferendam propositionibus verisimilitudinem non libet hic ipsorum opinones ita sicco pede praeterire, ut ne quidem recenseantur. Haec igitur habemus apud Platonem, qui postquam aliqua subinnuit ad hanc rem conducentia, de saporum instrumento haec subjicit: *Tenduntur à lingua venae ad cordis sedem, saporum nunciae, in quas, si quae res ita inciderint, ut humidam carnis mollitiem penetrantes terrestri sua natura*

modicè liquefactae venas ipsas contrahant, arefaciantque, sapores hujusmodi pariunt, videlicet si asperiores sint acerbos, &c. Habemus Gemmam ita loquentem. *Gustus elementum aqueum nequaquam in palati parte inferiore constitutum est, sed peculiarem habet humorum aqueum in substantia rara haētenus ab Anatomicis non animadversa, quae quidem specie dura, oblonga, inaequalis cum foetu piscium optimè comparabilis inclusa longiori epigraphe ossis illius, quod intra narium amplitudinem situm ab osse sphaenoide versus palatum exporrigitur, & vomeris speciem prae se fert.* Huic ego aquam illam gustatilium rerum discretricem ingenitam puto, quae partim circumfas tunicas, partim, à plexu mirabili inter processus clinoides ossis sphaenoidis posito, & hinc per occulta foramina tum in antrum interius, tum in oblongum vomeris sinum tenuissimos ramulos ingerente instar aliarum rerum, quae continuè defluunt, continuè restauratur. Huc usque Cornelius, quae ideo transcripsi, ut quisque ex ipso propria sensa audiendi cupidus laborare non debeat in ejus libri non ita parabilis inventione: Haec denique habemus ex Eustachio. *Nervos ac sensum melioris usus gratia dentes acceperunt, quia sunt propter nuditatem externis injuriis expositi; Sapores autem simul cum lingua discernunt, ut reliquae oris partes.* Quibus omnibus opinionibus sic expositis, video equidem in singularum examine capite non minus insumendum fore, quia tamen harum confutatio ex jam dictis facilis negotio deducitur, & ex dicendis constabit apertissimè non earum solùm, quas modò memoravimus, sed una omnium falsitas, quisque ex seipso poterit quid ad isthaec dicenda sint cognoscere.

C A P. XIII.

Linguae accurata descriptio cum novis observatis.

LINGUAM non meditor, quin obstupescam, cùm enim & animalibus necessariam, & usui multiplici destinatam, & in suis operationibus peragilem deprehendam, & in substantia peculiarem, & in constitutione mirabilem eandem non habere vix possum, & tamen si exploro diligentius in lingua tale nihil invenio, & tam substantiam, quam structuram maximè parabilem observo. Et hinc ego in admirationem trahor; ecce siquidem Lingua nihil aliud est, quam Musculorum invicem coëuntium contextus: quis credit huic tantummodo universa Linguae munia deberi, ita ut possit paucissimis donata musculis innumeris, prope dixerim, obire motiones? Extenditur, contrahitur, dilatatur, exeritur, attollitur, deprimitur, incurvatur, modo in concavum aptat sese, modò in convexum, modò ad usque palati fornicem erigitur, modò ad fraenulum usque reflectitur, quandoque duplicatur, alias extenuatur in cuspidem, modò tremit; Et statuendum erit omnibus hisce motibus, plurimisque aliis quinque duntaxat Musculorum paria sufficere, si in aliis mobilibus partibus opposuit natura singulos musculos ad singulos motus? Et tamen cùm non occurrat aliud quod cum ratione produci possit, ita se rem habere, concludendum erit, nisi quòd plurimum nos debere crediderim in hisce motibus fibrarum illi tegeti (ut sic appellemus musculosam quandam linguae inextricabilem contexturam,

R

quae

quae membranis evolutis, & linguâ divisâ profundius offert sese inspectoribus) cùm enim eorum staminum undequaque protensum, & diversimode sese implicantium sit non una directio, multiplex etiam motus ipsorum contractionem consequatur oportet diversis in diversa trahentibus. Doleo equidem, fibrosum hujusmodi complexum non aliter per me describi posse, quâm telae, aut tegetis comparatione per linguae medullium extensae; quid faciam tamen, cùm explicari ipse nolit, & adeo implicitus sit, & intertextus, ut omnem anatomicam industriam fugiat, omnem curiosam patientiam eludat, enodationem non sustinens? Videant alii fortunatores, num retexi patiatur, num cum caeteris linguae musculis cohaereat, num propriis, an mutuatis fibris donetur, quotuplicem habeat directionem in staminibus suis; mihi nempe suspicari tantummodo plura nihil certo scire hoc in negotio datum est; solumque libet innuere non parvi fortasse commodi in nobis existimandum ejusmodi plexum locutionis siquidem cum in uniuscujusque verbi pronunciatione, non unus linguae motus requiratur (quando vel quaelibet littera absque linguae ministerio non enuntiabilis peculiarem expedit suum) nihil aliud vulgatis musculis auxiliare ad hasce motiones exercendas videtur advocandum, quâm hujusmodi fibrarum complexus. Sed quid extra oleas divagamur? quae de Linguae musculis circumferuntur, habeat Lector meus ex aliis; nos enim in iis immorari in praesens nec datur, nec locus permittit, cùm nihil ad Gustaticis organum cognoscendum conferant, & sint praeter rem nostram; ac proinde omissa interiori hac, & musculosa Linguae substantia, convertamus

tamus ainmum ad exterioris membraneae, ac nerveae contemplationem, ubi opificium fortasse latet non indignum Divinae manus, & ab Anatomicis, quod sciam, non observatum. Sed quidquid id est, habe quid mihi praebuerit ejuscemodi observationis occasionem.

Joh. Alphonsum Borelli virum omni laude superiorem amantissimum praceptor meum conveni quadam die, salutatoque humaniter, quid novi, inquam? at ille, novi quiddam pulcherrimum sanè attulit nobis D. Marcellus noster (virum illum intelligens Malpighi cognomento, cuius in laudes ire longa suarum virtutum series, & locus iste non patitur) vide siquidem, quid ille accuratissimus obseruator in elixata lingua deprehenderit nunquam hactenus animadversum, porrectisque latinè exaratis litteris, vide, pergebat, quid per hasce epistolas renunciaverit, & attentius meditare, quae rei elegantissimae summa sit. Tum ego, qui licet de vultu non cognoverim eruditissimum Malpighi, tamen ex scriptis aliis agnosco genium hominis sapientis, motus existimatione tanti viri, jam grande aliquid praeconceperam opinione, unde oculis, animisque in epistolam conversis excurri celerrimè tractationem totam, ubi cum descriptiōnem haberem, quam ante nunquam inveneram membranarum linguae, nos igitur inquam sedebimus otiosi semper tantummodo auditores? quin manum operi admovemus, & Marcello monstrante viam, Naturam ipsam consulimus, ut quod ipse afferit, ejus oraculo comprobatum habeamus? Adjiciebat interim animos, stimulosque laudatus Borelli, unde tandem non unius animalis linguâ comparata vidimus, quod prius Mal-

pighianae epistolae fideles tantummodo credebamus observantes insuper nescio quid à clarissimo Malpighi praetermissum. Dum haec Florentiae agebantur D. Carolo Fracassati viro mihi amicissimo, & adeò unanimis genii, ut vel fata, si liceat mihi fingere, arbitrio meo unanimem magis conformare non possim, nisi quod hoc unum habet ille, unde differimus, quod omnis eruditionis, omnis doctrinae, & bonae mentis est plenus) Bononiam per praeceptorem meum renunciatum est de invento Malpighiano, nihil tamen speciale memorando quid id esset rei, sed tantummodo quiddam ab ipso in lingua animadversum; quae vix à perspicacissimo viro intellecta sunt, cùm in lingua periculum fecit, num quid novum detegeret, quod suspicari posset esse Malpighi inventionem, & peracto opere quid ipse observaverit, rescripsit; iisque acceptis Bononiae datis epistolis cognovimus idem omnino, quod mihi notandum sese obtulerat, ipsi pariter occurrisse, unde invicem sumus deinde per occasionem gratulati, quod inter genio similes eadem pariter fortuna convenerit. Res jam hucusque traducta erat, cùm ecce tibi rursus à clarissimo Malpighi epistolas Messanae datas accepimus, rem illam exponentes ex toto, quae & mihi Florentiae, & supra memorato Domino Fracassati Bononiae inspiciensibus obvenerat, quare cùm aliunde nossēm hujusmodi litteras promulgandas, jam in eam abieram sententiam, ut de mea hac observatione ne verbum quidem publicè facerem; quid enim ad captandam tantummodo popularem auram scriberem, quam sicut hactenus habui; ita habebo semper imposterum in contemptum? Adegit tamen genius, ut scriberem, adeoque adegit animum

mum obluctantem, ut vel invitus hanc sibi similem effuderit offam, quae si quam formam prae se feret, id totum characteri tribuendum, quem ipsius naturae manu gestat expressum in fronte; reliquum enim ex undique collectis formis ita conflatur, ut valde dubitem, num

Conspectum admissi risum teneatis amici.

En igitur descriptionem.

Linguam rimanti mihi sese obtulit primo consideranda superficies, quam & bovinam quidem non unius coloris animadverti, sed sub apice ad usque fraenulum subrubescensem, & loturae carnis non absimilem, in superiori autem area ab apice per sex plus minus transversorum digitorum longitudinem in aliquibus, in aliis per totam ferè sublividam cujus coloris extremitas non circumscribitur determinati ductus linea, sed irregulari quadam, & flexuosa in concavum, & convexum, & rectum pariter producta. Ad hujuscē coloris confinium aliam sui extimam speciem offert lingua, nimirum inde ad usque Tonsillas, seu glandulosam laminam Tonsillas conjungentem gerere videtur quandam maximē dilutam flavedinem ad album proximē accendentem, qua universa insignitur tunica linguam undequaque circumambiens à memorati palloris termino tam secundum longitudinem, quam latitudinem, nec non latera. His annotatis, quae levioris momenti videbantur, anxiè quaerebam porosam illam membranam, & raram, & laxam adeo decantatam, eamque, licet aequo diligentior fuerim, nunquam deprehendere potui; sed à primo intuitu sese statim consideranda obtulerunt innumera quaedam corpora è substrata tunica erumpentia non solūm subpal-

lidam linguae partem, sed & subalbidam pariter occupantia, ad apicem & quoad robur, & quoad dimensionem satis insignia, & exinde versus radicem procedendo ita decrescentia, ut, ubi linguae superficies in quendam veluti tumorem attollitur, nonnisi engyscopio detegantur. Horum figuram si species, conica est; si superficiem, laevis; si apicem, acutior; si situm, ad fauces inclinans, seu palatum respiciens: cum autem hujusmodi substantias & conicas, & verticem ad posteriora vergentem obtinere assero, nolim credas, formam, positumque earum Scelenum Conum aemulari, sed Conum inflexum, ut sic loquar, ita ut ipsarum superficies incisores dentes respiciens convexa, seu gibba, opposita autem concava apparet, &, ut uno verbo loquar, tam figura, quam situs hujuscē substantiae vel carminatorii pectinis dentibus, vel rustici rastri, vel aquilinis unguibus, aut felinis (si conicae esent ex toto) posset non immerito comparari. Situs autem hujusmodi in linguae praecipue apice conspicuus est, alibi enim inclinatio minus fese prodit, quo magis tendimus ad palatum. Feline autem linguae vertex nullis omnino hisce conis donatus est, sed plurimi ex ipsis emergunt area media, iique ossei ex toto cavi intus, non absque medullulis suis, nervulis, vasisque caeteris, quibus non absimiles eodem vergentes per palati concamerationem ordine non absimili distribuuntur, quod an in aliis etiam contingat animalibus affirmare non possum; cum non viderim, nisi quod in Bobus quid simile videre est, sed non osseum, nec ejus figurae. Vides interim, quam solers natura fuerit, & quam providè vel ipsis felibus consuluerit, cum enim iis pungenti- bus

bus conis ipsorum indigeret lingua, & eandem abluendis pedibus, lingendis naribus, aliisque insuper ministeriis accommodent, quibus asperitas, & incisio inepta est, in ea tantummodo parte cuspides hafce fabrefecit, quae aut nihil, aut parum sanè exeri potest. De harum particularum substantia si quaeras in bubula lingua (ne hic de humana loquar, quae ab illa qui differat inferius explicabitur) quid apertè dicam, hucusque non habeo; neque enim ossea videtur ex toto, sed ne ex toto quidem cartilaginea, cùm sit hac durior aliquanto, illa autem aliquanto tenerior, proindeque non incongruè affirmare quis posset, hujusmodi linguales conulos ex media inter os, & cartilaginem natura constare, non negans interim processu fortassè temporis in osseam faceſſere posse, ſicut & concrecente intra certos folliculos in maxillis muco dentes consurgunt, & aortae principium in os evadit, ut ipſe non ſemel in Cervis, & pariter in hominibus, niſi me fallit animus deprehendi. Hujusmodi ſubstantiae ab extima ſuperficie erumpentes infigunt altius radices suas, adeò ut cum lingua non una tunica veftiatur, ipſae ad intimorem, & muſculis uſque contiguam, protendantur, & haereant, nec ſine mediocri violentia evelli poſſint: evelluntur tamen, quo facto ſi extremitatem alteram membranis prius latentem intuearis attentius, & ſolo, liberoque obtutu non ſufficiente, perſpicillum admoveas, ſeſe in conſpectum proferet foramen quoddam interiorem conulorum longitudinem cavans, in quod lingualibus membranis ſubstratam crustam inſinuare ſeſe mox explicabitur. Eorum corporum conſtitutione ſic breviter praeter propter exposita de uſu cogitandum eſt, qui nul-
lus

Ius alius videtur esse, quām palatum, & buccas verrere, ut ita loquar, & dentiscalpii quodammodo gerere vices. Id suadere videntur & propria illa in acutum definens figuratio, qua nihil aptius ad ciborum reliquias hic illic haerentes abripiendas, & curva illa conformatio posteriora linguae respiciens, quae ei muneri accommodatissima, ne dicam necessaria est; & cohaerentia tenacior cum membranis, & profundior infixus, quae demonstrant apertissimè vim ab ipsis aliquam exerceri, & locus denique unde proveniunt, qui nullus est, nisi huc illuc agitabilis per oris universam capacitatem, & ita mobilis, ut ad fauces possit impellere. Hinc ab apice ad fraenulum nullum conum reperias, sed superficiem maximè laevem, quò magis ad posteriores linguae partes tendimus debiliores, ut dictum est, & in illa eminentiori jamjam describenda parte, & in Tonsillis nulos. Nec dicas, eadem omnino natura videtur lingualium istiusmodi conorum, ac earum, de quibus supra palatinarum asperitatum, ac proinde cum his ut immobilibus usus iste competere non possit, nec illis erit idem adscribendus. Satis enim inter hujusmodi substantias discriminis intercedit, si utraque mobilis non est, & ex iis componitur pecten veluti quidam carminatorius, cuius altera parte immobili, mobili altera, filamenta lanae retexuntur, & explicantur, ne hic submoneam tam palatinos, quām linguales conulos posse insuper conducere ad ciborum retentionem quibus in proris animalibus proclive esset effluere, nisi aliquo repagulo cohiberentur, & hinc fortasse rationem peti posse, cur nos erecti, & sublime spectantes iisdem destituamur.

Hisce

Hisce sic consideratis corporibus nos in sui contemplationem linguae superficies admittit, quae conulis evulsis sese profert apertius, & aspectu jucundissimum explicat vultum. Ecce siquidem illa non est undequaque plana, sed postquam ab apice per spatium plus minus palmare in planitatem expandit sese, assurgit sensim in convexitatem, unde tumore quodam resultante per trium, quatuorve transversorum digitorum longitudinem expeditior descensus ingestis cibis conceditur per fauces inclinatas ad faciliorem deglutitionem. Ab apice ad usque tumorem hunc quaedam observanda occurunt, quae in ipso tumore pariter invenias; in hoc peculiare quiddam aliud in linguae area nequaquam positum, in faucibus, seu lamina Tonsillarum aliud in utrisque memoratis partibus omnino desiderandum, ab apice ad fraenulum prorsus nihil, quandoquidem, ut ab extremo exordiar, hoc unum quantumvis observes in inferiori hac linguae superficie deprehendas, quod maximè videlicet laevis est, nullis conspicuis foraminibus pervia, nullis eminentiis aspera, discrepans denique à reliqua universa lingua, nisi quod habet quaedam ad latera in caetera etiam superficie deprehendenda, de quibus mox in ejusdem narratione sermonem instituimus. Superior itaque planities laevis est, sed tot, tantisque poris perforata, ut cribrum dixeris potius, quam superficiem continuatam; scilicet tot habet foramina, quot conulos; non enim aliunde isthaec proveniunt, quam ab exinde erumpentibus, & evulsis ante descriptis conis; sic quia insigniores ad apicem illos diximus, & pori quoque inibi sunt maiores, & omnes quasi conorum sint bases, circulares; mox sensim angustan-

stantur, ita ut linguae superficies, quae retis, aut cribri imaginem circa apicem referebat, ad tumorem continua appareat, ac telam aemuletur. Occurrunt deinde eminentiae quaedam nullo certo ordine dispositae, nulla determinata serie distributae, nullo statuto numero comprehensae, sed in aliquibus ad trecenas, in aliis ad quadringentas, in aliis supra quingenas numerandae hinc inde erumpentes inordinatim plures, pauciores, id unum solummodo in vitulinis linguis inalterabiliter conservantes, quod plures enascuntur ad latera in superioris, inferiorisque superficie confinio, & circa apicem; in planicie ipsa multo rares. Earum superficies convexa est in mox occisis, & in viventibus quoque; color idem, qui linguae antea descriptus. Hae, si mycroscopio observentur, nihil ostendunt aliud, praeter minimos porulos, & laevorem, in his quidem exactum, in illis vero non ita perfectum, adeo ut non videatur constans naturae institutum, & necessarium, ut ipsarum superficies sit laevis, aut aspera. Quae in mox occisis, & viventibus, ut referebam, sunt convexae superficie, eadem, si aliquo ab interitu temporis intervallo inspiciantur, concavitatem quandam in medio praeferunt, & quae prius linguae plano aliquantulum eminebant, subsidunt deinde, & sub eodem deprimuntur. Et haec quidem deprehendere est in plana linguae superficie. Sed & tumor habet peculiare suum, nullis enim sensibilibus fibris perforatur, utpotè qui nullis insignitur conis, ut dictum est, sed horum vice conos habet quosdam alterius naturae flexiles, scilicet molles, & laeves, qui in naturali situ non inclinati videntur, aut inflexi, sed perpendiculares, quibus similes

per

per oris tunicam dispersos invenias: evelli nequeunt, nec radicibus penetrant altius (ut inferiùs in membranarum explicatione constabit.) expressi nihil evomunt, processu temporis arescunt, & ita inaniuntur, ut membranae tantum invicem subsidentes supersint. His omnino conformes habeas à marinae testudinis oesophago; hic enim ejusmodi substantiis refertissimus est ventriculum versus apicem spectantibus, nisi quòd linguaes illae sunt hisce oesophageis multo minores. Habet insuper tumor papillas suas, eminentias videlicet, supradictis simillimas, videntur tamen non ita convexae, sed planae potius superficie, duriores multo, & pariter majores. Hinc descendentes ad crustam tonsillarem, est pariter, quod in ejus membranae superficie notemus, nimirum insignia quaedam oscula viscidum humorē eructantia, album modò, aliàs flavum, quandoque lividum, quo locus ille semper illinitur: licet ex iis oscillis aliquatenus introspicere citra sectionem, & cavitas sese offert infundibulum referens, & in nervum desinens immediate. Cæterum & ipsa cavitas laevis est, & insuper propter viscidī humoris affluxum lubrica, nullis donata conis, aut duris, aut mollibus, nullis insignita papillaribus protuberantiis. Nec plura obtulit mihi, quae describerem, extima linguae superficies; habet jam quid obtulerit interiùs penetranti.

Linguae summam cutim incidi, & frustra ipsius separatione tentata, aciem adegi profundiùs ad extremas usque conorum radices, & rursus ejusdem laminae separatione tentata non irritus fuit labor; statim enim obsequi caepit digitis patienter, & sensim trahentibus, unde factus audentior, quòd in minima

ejus tunicae portione feliciter evenerat, in universa membrana experiri volui; nec praeter votum administratio peracta; totum enim, quantum erat indumentum linguae superius abstuli nulla laceratione subiectarum partium, aut ipsius membranae, sed rebus omnibus perfectissimè se habentibus, & manifestius ostendentibus fese. Ut igitur membranam hanc primò contemblemur, absque eo, quod ipsam separe, constat ipsa linguam universam circumtegi, & extendi ulterius ad tonsillas, ad gargareonem, ad palatum, ad buccas, aliasque vulgatas partes, ita ut non immerito nomine Communis veniat. Connectitur autem cum substrata substantia consequenter explicanda, & admodum tenaciter cum eadem cohaeret, unionem hanc conorum radicibus promoventibus, quae etiam eadem subjectâ substantiâ conjunguntur. Non ubilibet ejusdem est crassitudinis, sed pro partium diversitate variat crassitatem, & ibi altior est, ubi majores, & crassiores coni, ibi tenuior, ubi minores, ibi tenuissima, ubi nulli: sic ad apicem in aliquibus anserinae pennae crassitatem aequat, unde discedendo versus fauces decrescit paulatim, quemadmodum coni ipsi decrescunt, ac tenuatur quoque, dum circa latera devolvitur ad inferiorem superficiem, in qua tantae evadit tenuitatis, ut vel cuticulam ipsam superet. Quin diversam hujus membranae speciem haberet, prout eandem diversimodè afficeres, ac parares: mihi, qui non nisi dupli in statu sectionem aggressus sum, in elixa videlicet, & in cruda, duplex tantummodo fese obtulit differentia, quarum alteram, & quae quidem in cruda obvenit, explicatam habes; altera autem in elixatis deprehenditur, nimirum hujusmodi

modi tunica, quae in non coctis linguis simplex videtur, elixa duplex appareat; & extima quidem in universa linguae superficie ejusdem consistentiae, ejusdem crassitie, ejusdem roboris: interior autem praeципue videtur illa, de qua usque adhuc egimus, crassior, tenuiorque secundum crassitatem, & tenuitatem conorum inhaerentium. Haec altior est (in elixatis semper intellige) haec mollis, haec laevis, haec in laminas plurimas divisibilis, haec cribri instar perforata, conis avulsis, haec in inferiori superficie ab apice ad fraenulum subtilissima, & non porosa, ut etiam talis appareat circa tumorem, ubi ita attenuatur, ut anceps adhuc haeream, ibine sistat, & aboleatur, num procedat ulterius ad usque tonsillas; & potius affirmaverim, ibi penitus deficere, cum attentiùs inspiciendi, progressus ad posteriora nunquam sese obtulerit. Si itaque albicantem huic tenuissimae membranae substratam crustam ab hac exteriori membrana diversam facias, hanc illi immediate conjungi, & adeo arcte, ut citra coctionem invicem sejungi nequeant, affirmandum erit; quibus annotatis, ut externum involucrum explicare pergam, annexitur insuper singulis supra memoratis papillaribus eminentiis, & convexam superficiem ambit; ad quam priusquam attingat, elegantissimum format sinulum mediocriter cavum, ex quo papilla ipsa videtur erumpere, adeoque arcte tunica isthaec annexitur superficiebus papillarum, ut, dum separatur, papillae satis validè interioribus linguae partibus per nervos illigatae, non solùm non lacerentur, nec ipsam membranam sequantur, sed hujus portionem suis superficiebus obductam retinent, productis tot in membrana propter laceratio-

nem foraminibus, quot exinde papillae emergebant, ejusdem magnitudinis, & figurae. Obducit pariter hujusmodi involucrum teneriores illos in linguae tumore conos, quibus videtur adhaerere tenacius, cum separari non possit; sicut pariter papillarum inibi jacentium superficies, circa quas insigniorem sinum efformat, quam circa caeteras, quae in planicie conspicuae sunt, sicuti ad has insigniorem, quam ad caeteras laterales. Tandem deflectit ad fauces, ubi insinuat sese in Tonsillaris laminae memorata foramina, seu, ut verius loquar, ipsa est, quae ad interiorem amygdalarum substantiam sese reflectens, & cum nervorum extremitatibus sese conjungens format eas cavitates inanibus conis, aut infundibulis non absimiles. Ulteriorem hujus membranae progressum videant alii: haec enim tantummodo sunt pro re nostra, nec ad alias partes libet excurrere de Lingua tractantes. Quoniam vero jam in aperto positum est, quomodo hujusmodi membrana se habeat, quale sit ejusdem munus, proximum est, ut expendatur, quod meditanti mihi difficilius videbatur propter discrimen illud, quod observatur inter crudas, & elixatas linguas, quandoquidem cum in illis simplex, in his autem duplicata membrana videatur, ignorabam, cui provinciae utramque praeficerem, cum non cognoscerem operationum diversitatem, cui hujusmodi tunicae deberentur: quod si re vera una tantummodo reputanda esset, faciliorem arbitrabar mihi patere aditum ad ipsius usum investigandum, quo factum denique est, ut in eam sententiam devenerim, membranam re vera simplicem esse, & si duplex videtur, id non esse naturae, sed coctionis opus.

Quod,

Quod, ut ita crederem, hae me impulerunt observationes. Inter crudam, elixatamque membranam nihil aliud intercedere animadvertebam, nisi quòd illa tota, quanta est, videtur simplex, ejusdemque naturae secundùm omnes dimensiones suas; haec autem non laminam homogeneam repraesentet, sed superiorem quidem, & externam crustam certi coloris, & duritiei, interiorem verò mollem magis, minusque duram, & colore peralbam. Haec autem omnia non mihi visa sunt ejus roboris, ut evincere possint externam & internam laminam natura, & munere discrepare; quòd enim exterior sit aliquantò durior, locus ipse expedit, qui extrinsecus advenientibus cibis expositus, & paratus, est ineptus tenerioribus membranis, ne aequo plus lacerentur, & absumentur in masticatione, & continuo in linguam appulsu. Interioris crustae albus ab elixatione color non diu perseverat, sed si aliquo temporis spatio aëri exponatur, facebit in pallidum, & exterioris laminac quasi conformem, ne memorem colorum differentiam non esse adeo indubitatum argumentum differentis naturae: quin imo Aprinae linguae exteriorem faciem ab apice ad fraenulum albicantem facit elixatio, & Cervinae aream universam. Quòd autem post coctionem, quae priùs una membrana videbatur, facessat in duas nescio, an falsum dicam, an non mirum. Mirum sanè non dixerim, quando ea tunicarum natura est, ut una, & eadem in plurimas dividì possit, adeò ut nihil aliud membranae videantur, quàm subtilissimae tenuissimorum staminum contexturae sibi invicem superimpositae. Falsum autem judicaverim, in duas à coctione dispesci, quoniam non in

in duas tantum, verum in penè innumerās caeterarū tunicarū instar distinguitur: quare cùm nec durities, nec color naturae diversitatē inferre possit in membranis, & multò minùs divisibilitas, satis cum ratione asserere potero, talem tunicam simplicem esse, ut praeteream, me multò verosimilius ex indivisibilitate non coctae hujus laminæ ejusdem unitatem deducere posse, cùm ignea vis dissolvat, & disterminet. Quidquid tamen sit, sive crusta linguae ex duabus, aut una, aut pluribus membranis constet, cùm videatur unius naturae, nec obveniant peculiaria munera singulis in iis membranulis adscribenda, crediderim, laminam illam universam in conorum gratiam à natura fabrefactam, aptata interim extima ipsius parte & intima pariter pluribus ministeriis aliis, tutelae scilicet linguae, integumento ejusdem, defensioni subjectarum partium, caeterisque, qui sunt membranarum omnium usus communes. In gratiam, inquam, Conorum, cùm enim superius affirmaverimus, iis veluti dentiscalpiis uti naturam, ejusmodi actionem obire non possunt, nisi certo quodam modo contineantur, ut vim suam exercere possint; ut autem id praestent, apponit natura fulcimenti vice crassiorem illam membranam, quod observasse quoque memini in interiori histricinae pellis superficie, in qua elegantissimam hexagonorum contexturam deprehendi in erectionis tantummodo, non in fabulosaejaculationis gratiam ad calamorum radices instratum; sic pariter ablatis squamis in piscibus sese offert contextus quidam, nerveusne, an carneus, nescio: reti propior, quo squamæ singulae aut colligantur solum, aut aliquatenus eriguntur. Id suadet etiam ejusdem

mem-

membranae distributio , quam superius explicavimus , quid enim illa crassities , ac tenuitas crassitiei , ac tenuitati conorum proportionalis , & defectus , ubi idem deficiunt ? Sanè nihil aliud exinde deducitur , quām quod majus fulcimentum , ut sic loquar , fabrefactum est , ubi conorum radix productior , & potentia validior illud expetebat ; minūs autem , ubi brevior , quod non solum ex supradictis perspicue patet , sed & evidenter ostendunt plurimum animalium linguae conis iis destitutae , quae ipsorum vice pilis quibusdam pubescentes lanugini proprioribus tenuissimam habent ejusmodi membranam . Nec obstat , quòd ab apice ad fraenulum lamina isthaec repertiatur , & circa tumorem pariter , unde tamen nullus omnino conus erumpit ; in his enim linguae partibus caetera ex assignatis muniis obiit aliarum membranarum instar , nec exinde quis unquam inferre possit , hanc tunicam praecipue ad conorum stabilimentum fabrefactam non esse , cùm nihil aliud necessario illi muneri destinatum in lingua observetur . Sed hujusmodi crustā tandem sic explicatā proxima fere offert papillarum consideratio , quarum superficiem ab usque summa lingua conspicuam supra jam exposuimus .

Haec igitur corpora tenaciter adeò cum lingua connectuntur , ut , quamvis conjungantur , ut dictum est , cum descripta tunica , tamen ad hujus ablacionem non auferantur simul , sed subjectae alteri lamine remaneant implantatae perèleganter . Harum figuram nescio , an comparem clavis plaustrorum rotis infixis aptius , an dicam potius non absimiles

fungis. Utrumque rem praeter propter animo re-
praesentare videtur, tamen exactius exprimi habi-
tudo fungorum, quam clavorum, cum ejusmodi pa-
pillas non copula solùm imitentur, sed & pedun-
culo, & radicibus etiam; cum hi è contra sint ut
plurimum pyramidales, & semper in acutum desi-
nant mucronem. Habent itaque linguaes fungi pe-
dunculum suum in memorata membrana latentem,
nec nisi eadem separatâ conspicuum; colore satis in
mox occisis dilutum sensim pallescentem, quo asser-
vantur magis ab obitu: figura cylindricum, & ex-
actè laevem, longitudine secundum linguae partes,
è quibus erumpit differentem, ibi nimirum longio-
rem, ubi exposita membrana altior est, ibi brevio-
rem, ubi eadem humilior; crassitie pariter non eum-
dem, hic siquidem tenuiores fides, ibi crassiuscu-
las aemulatur. Definit in superimpositam membra-
neam lamellam, cuius extimam, & convexam su-
perficiem habes explicatam superiùs, nec in conca-
va ulteriùs immorabor, cum nihil occurrat praeci-
puum. Externa sunt haec omnia, & detractâ illâ
tunicâ, sponte in observatoris oculos incurrentia;
quantò autem meliora latent interius ad radices, &
pedunculi longitudinem? Quae putas hujus, & ea-
rum natura est? Nulla alia ipsius cavitatem implet
substantia, quam nervea, nihil aliud sunt radices,
quam nerveae productiones. Habet itaque lingua,
ut cuique notum, nervorum insignes trunco: hi per
ejus substantiam repentes dividuntur in plurimos ra-
mos crassiores, qui iterum iterumque partiti emit-
tunt tandem tenuissimos surculos, tendunt horum
ple-

plerique ad linguae extima, & ad musculosae, & membraneae substantiae confinia traducti inseruntur in statim describenda contigua fibris tunica, & ultius pergentes insinuant se in ante memoratum pedunculum, seu potius in eundem facessunt; siquidem nihil hic aliud videtur, praeterquam nervorum fasciculus tenui, & rotunda superiori membrana circumdatus, & membrana exili laminulae sua extremitate adhaerens, quae in convexum conformata ab extima usque superficie circa sectionem deprehenditur. Sunt itaque lingualium fungorum radices internae pedunculi substantiae continuatae ejusdem prorsus cum ipsa naturae, in eoque tantummodo differunt, quod in pedunculo nervi, qui hinc inde germinantes conformabant fungi radices, in fasciculum coëant sursum ad exteriora recta vergentes. Si horum corporum convexitatem, seu cupulam non spectes, dixeris iis siphunculis propiora, quos ad fontanas aquas ex inopinato emitendas dolosè distribuimus inter herbas, lapillosve artificiosè coagmentatos; quemadmodum illi latent ex toto praeter exteriorius hians oscillum, ita isthaec pariter ne quicquam rursus attingam de figura, connexione, & caeteris, inter involucra delitescunt, & extimam linguae superficiem attingunt singuli nervi extremitatibus suis, vel, si licet ita loqui, oscillis suis è linguae plano perpendiculariter aslurgentes. Hanc autem nervorum distributionem si spectare velis, quamlibet ex papillis diligenter exploraveris, observabis, quod dictum est; si promptius, & expeditius, apicem linguae consule, quem nervis refertissimum invenies in

papillas abeuntibus : si expeditissimè rem velis absolvare , rimare paucas illas ; ac insignes quidem papillulas , quae in linguae tumore utrinque sex , septem , plures , pauciores habentur , in his enim plurimae nervorum propagines inseruntur , & pedunculus brevissimus immo ferè nullus est , quae nervorum multitudo faciet , ut citius , & clarius negotium totum percipias à papillis aliis difficilius addiscendum , cùm non tot habeant nerveos surculos , faciliusque lacraviles. Tandem superest annexa tenaciter tunica muscularis linguae fibris (usus enim talium particularum sequenti capite enodatur) quam cursim sic expositam accipe.

Extimam superficiem , cui fungorum implantantur pedunculi , inaequalem habet , & non immerito comparari posset cum superficie glandulosae ejus laminae , quae ad oesophagi , ventriculique confinium in brutis plurimis reperitur papillaribus multis erinnentiis donata , & ex illa etiam videntur papillulae quaedam assurgere , modicè supra ejusdem planum fere attollentes sub rotundi corporis specie in obtusiorrem apicem desinentis : revera tamen papillae non sunt , nec quiddam ab ipsa crusta distinctum , sed videntur productiones ejusdem , quae cum antedictis lingualium conorum cavitatibus inserantur , & leviter annectantur , fit , ut iis avulsis conis , separari à continuata tunica non possint , & eminentias illas producant. Majores sunt hujusmodi processus ad linguae tumorem , ubi molles , & majores illi coni , quos diximus ; horum enim interiorem molem & substantiam ipsi complent , quae supra memorata exter-

terna tunica amicitur. Tam eminentiarum, quām reliquae membranae unus est color, idemque à muscularum colore parum diversus: membranae crassities modica, & per universam linguam aequalis fere: connexio valida cum subjectis fibris, & unio (ut non uni anatomicorum visum est) inseparabilis; re vera tamen separabilis quidem, sed non nisi laboriosius. Suscipi nervorum propagines propè dixerim innumeratas, quae prius in lingualium fungorum radices conformatae abeunt demum in pedunculos. Substantia non videtur ex toto membranea, nec pariter glandulosa, sed naturam quandam participare, consistentem magis, & ad nerveum corpus accedentem. Nec plura de propria, ut circumfertur, linguae tunica, quam nulli alii muneri praefecerim, quām quod id praestet in lingualibus, & durioribus conis, quod in ossibus medulla praestat, moliores verò conos producat, quoniam isti quidem nihil sunt aliud, ut dictum est, quām hujus tunicae processus involucro communi linguae circumdati; in durioribus autem, & consulto producta cavitas, & in eam se insinuans hujusmodi corpus, & peculiaris ejusdem substantia id suadere probabiliter videntur. Inservit insuper muniis, quae membranis caeteris convenient, & insuper fibrarum insertioni, quod hujus tunicae separationem aggredienti plusquam satis innotescet. Et jam habes absolutam membranarum, & quae inter ipsas advertimus, linguae bubulae descriptionem, in qua sectionem eo consilio institui, ut facilius ob partium magnitudinem in sensus incurreret, quod eisdem subterfugisset forsitan, si à

minorum animalium linguis auspicatus fuisse; absit autem, ut credas, linguas bubulas à caeteris discrepare; una enim est omnium compages (earum quas vidi intellige) & deme avium linguas, & piscium, si quas habent, una in omnibus membranarum series, numerus, & usus idem, fungi similes. Et quia de brutis animalibus nihil refert, simus aequè solliciti, id tantum de ipsis innuere sufficiat, linguas ipsorum caetera convenientes hoc uno differre, quod aliae pungentibus illis conis superficiem exasperant, aliae autem holoserici instar laevem offerunt ex universa planicie villis laevoris maximi germinantibus. Sed quid putas, de Homine dicendum est? Idem omnino, quod de caeteris. Habet itaque (ut humanam hanc particulam cum Bovina brevissime conferam) tunicas suas, communem alteram, alteram propriam; ex illius superficie nulli coni erumpunt, sed ipsorum vice tenues, & flexiles pili: quod si apertiùs observare velis, adhibe microscopium: habet tumorem suum caeterae linguae moli proportione respondentem: hiant inter paristhmia in glandulosa crusta oscula plurima satis exigua humorem viscidum erucentia: extant papillae plures, & penè dixerim, innumerae, quarum adeò jucundus conspectus est, adeò elegans distributio, ut rapiat oculos, animosque observatoris, & diu, multumque non sine oblectatione detineat. Copiosiores ad apicem deprehendas (quamvis hoc perpetuum non sit, & inalterabile, tamen plerumque accidit, & ferè semper) & ad latera; exinde verò proportionaliter rariores, quo magis versus fauces declines; in area

area modò plures, modò pauciores inordinatim spar-sas. Quae omnia, difficile dictu est, quàm refici-ant curiosos animos, si engyscopiis accuratiùs obser-ventur; & si quis ex me similitudinem quaerat, ne-scio, an papillarum illam congeriem uvarum race-mo potius, an baccarum Lauri, an fungis pluri-mis teneriores inter herbulas juxta se invicem pullu-lantibus comparem; Si enim figuram, & positionem spectes uvarum, aut baccarum, ejusmodi congeriem aemulantur; at ostendunt conspicilla inter utramque papillulam erumpentes pilos, quos diximus her-bularum tenuissimis frondibus inter utrumque bole-tum non rarò germinantibus proportionales. Hic verò praetermittendum non est (ut aliquando descrip-tionem hanc aequo fortasse prolixiorem concludam) videri lingualium fungorum superficiem foraminulis plurimis, iisque angustissimis pertusam, quae non nisi crystallinis, iisque perfectioribus lentibus depre-hendi patiuntur: idque faciliùs obtineri posse in vi-ventibus adhuc iisque sanis animalibus, vel ab obitu statim, quàm in olim demortuis: nam flaccescunt, & collabascunt, & distingui minimae illae porosita-tes non possunt. Caeterum in hominibus etiam ta-les papillulae nerveae sunt: pedunculos & radices, & connexiones habent easdem ad amussim, quas in bove recensuimus, &, ut uno verbo rem perstrin-gam, nihil inter se discrepant linguae, praeterquam crassitie, aut tenuitate partium, & conorum, aut pilorum defectu. Quae omnia, cùm inobservata us-que adhuc, aut praetermissa sint ab Anatomicis, con-tingeretque mihi, in naturae hoc opificium incide-

re ejusque constitutionem cognoscere, de humanae
fabricae, & veritatis amatoribus fortè non malè meri-
tus appellabor, si ipsorum genio potius gratificaturus,
observationem totam, quamvis ita rudi minerva, pro-
posituero. Denique cùm partium, quas descripsimus,
nulla supersit, cui proprium munus demandatum non
sit, praeter papillares eminentias, vel si mavis, lin-
guales fungos, oportet jam, ut & ipsos suae pro-
vinciae praeficiamus: quod cùm longiusculam expetat
orationem, agè, concludat hoc

C A P. XIV.

*Instrumentum Gustus esse in descriptis
papillis.*

C U M circa linguae inspectionem versarer, aderat
semel iterumque, sed nunquam satis laudatus
praeceptor meus Borelli, & cùm ejusmodi lingua-
les fungi ex inopinato occurrisserent, in diversa trahe-
bamur, adhuc siquidem latebat nos eorum proces-
sus, nec connexionem, nec substantiam compertam
habebamus: quapropter modò lymphae ductuum o-
scula, modò canarium salivalium extremitates, mo-
dò glandulas esse dubitabamus, nescii, ubi quiesce-
ret animus, & num inter omnes illas opiniones ve-
ritatis quicquam haberetur. Tandem verò postquam
diligentiori indagine nerveam papillarum naturam,
structuramque jam recensitam adeò perspectam habui-
mus, ut nihil jam superesse videretur, quod ea de-

re

re in controversiam meritò revocari posset, convenimus, ejusmodi fungos esse Gustatricis facultatis instrumentum. Id autem, ut quomodounque confirmarem, aequum primò sum arbitratus, omnes, quotquot adhuc existant de Gustus organo, sententias expendere, & confutare, omnesque pariter linguae particulas meditari, ut discerem; aliæ linguae portio huic muneri accommodatior sese offerret, quae me de opinione dimoveret. Hoc totum jam superius praestitum: sed quoniam aliarum sententiarum eversione propria non stabilitur ex toto, nisi aliis, propriisque fundamentis suffulciatur, en quae me ad ita sentiendum coegerint. Papillarum distributionem mecum ipse pensitabam, & cum hic frequentiores, rariores alibi, hic juxta se invicem enascentes, inibi magis inter se dissitas, alibi demum nullas observarem, arguebam, si ipsis quidem gustandi vis insideret, de saporibus à nobis judicandum, ubi ipsarum copia major, citius, exactiusque; tardius, & obscurius, ubi minor: ubi autem nullae, nullo modo; unde inferebam, si igitur iis linguae partibus sapida admovebuntur, unde ejusmodi fungi enascuntur, saporem experiemur; si autem eadem aliis applicentur, nullam, praeter tangibiles qualitates deprehendemus. Hoc autem ratiocinium, ut ipsis sensibus confirmatum haberem, num veritati responderet, Ammoniaci salis frustulum mihi comparavi, eoque plurium amicorum linguis admoto, mirum, quam secundum praecognitam opinionem res feliciter evenerit; siquidem quantumvis sal ipse madesceret, quantumvis detereretur in pulverem,

quantumvis denique liquaretur, nullo modo Gustatum excitabat appositus illi superficie linguae, quae inter fraenulum, apicemque intercipitur, ubi nullae fungorum cupulae eminent. Idem exinde translatus ad linguae verticem, ubi confertissima papillarum multitudo, insignem imprimebat speciem saporis sui: quod pariter praestabat traductus ad latera, & ad universam aream quoque, si iis tamen superimponebatur papillulis, quae ex ipsa sparsim erumpunt. Haec autem omnia postquam ita se habere ab amicis capitibus accepi, & ipse testis adesse volui sententiae meae, & ad speculum linguam salivâ benè madentem exerens, observavi papillarum locum, & superinducto sapido corpore, conveni cum aliis, scilicet saporis sensum in iis fungulis excitari, & reliquam linguae superficiem non solum, quae ad fraenulum ab apice exporrigitur ejusce sensus participatione destitui, sed & superiorem pariter, quae inter utramque papillam est, nihil praeter tangibilia, distinguere; ex quibus observationibus ejusmodi papillulas esse instrumentum Gustatricis potentiae tantum non concluseram, cum ecce tibi suboritur scrupulus, si tale gustus organum habendum est, qui fiat, ut sapores ad Tonsillas etiam sentiamus, & in superiori palati parte citra uvulam? Utrumque autem id indubium esse facillimè deprehendas, & illud quidem, si in memoriam revoces, in vomitionibus ad Amygdalarum crustam, non solum saporem vomitus discerni, sed & diutius haerere, & difficilius amoveri: alterum autem si saporem applices inter uvulae, palatique confinium, ubi saporis sen-

sensem habebis satis exactum. Utrumque tamen submovit inspectio diligentior, in tonsillari enim lamina negotium hoc absolvi posse sum arbitratus à nervis illis superiùs descriptis ad cavitates, infundibulo similes, hiantibus; in palato autem papillulas lingualibus undequaque respondentes animadverti, nec in homine solum; sed & in Apro; quare tandem statutum per me est extra omnem dubitationem, & audacter affirmari posse, tales fungulos esse Gustus instrumentum. Hujusmodi autem positione certissimis hisce experimentis satis superque confirmata, meditabar, quomodo hac supposita, & celerrima illa saporum perceptio, & eorum aliquot mora longior in organo explicari posset, & quid ita fiat, ut si à salis vellicatione hic habetur sensus cuius plurium superficierum, & angulorum est unaquaeque species, semper tamen ab iisdem eundem saporem patiamur, & denique, si, ut superiùs monstratum est, externa gustatorii instrumenti titillatio gustui excitando non sufficit, in qua tandem ejusdem organi parte passionem hanc imprimant sales, ex qua sapores ingestorum deducimus. Haec autem omnia, ut faciliùs perciperem, & aliqua verisimilitudine praetegerem, statim ad caeterorum sensuum constitutionem confugi, ut eadem observata, & inter ipsam, memoratasque papillulas, facta comparatione, quiddam ducerem ad rem meam. Cognovi igitur omnibus iis partibus, quibus aliquid distinguendi vis est, ultra tangibles qualitates, (& sensus externi dicuntur) nervos esse quidem intertos, sed tali determinato modo constitutos, ut ob-

jectorum species, ut appellant, vel invitae medullarem tantummodo ipsorum substantiam afficere possint in exteriorem, & membraneam, aut nulla, aut minima impressione facta. Res ex se ipsa patet satis; cui enim incomptum est, Opticorum illam esse posituram, ut meditullio tantum irrumpente lucem excipere possint, membranis autem non possint, & ex hac affectione in cerebrali Optici parte producta sensionem resultare, quam Visionem appellamus? Cui pariter non exploratum in auribus quoque observari non absimilem structuram; ita ut videlicet auditorius nervus, per illos enim verò mirabiles anfractus repens, undantis aëris motionibus offerat non extimam superficiem suam, sed internam, & medullarem, ex cuius impulsu vario soni diversitatem inferimus? Cui denique non constat in odoratus instrumento quid sensoriis hisce proportione respondens deprehendi, & processus illos, quos Mammillares appellant, communiter utrinque ad Galli cristam adstantes Cerebri naturam redolere, & odoras evaporationes per cribrosi ossis foramina ascendentis in eosdem irrumpere; & odorum sensum procreare? Quis proinde non admittat, si naturae insistere non recuset, etiam in Gustu non aliunde saporum perceptionem provenire, quam ex determinata constitutione nervorum ab illa caeterorum sensuum non admodum abludente, quorum medullam ita vellicent, lacerentque salium aciculae, ut exinde id oriatur, quod à nobis dicitur Gustus? Hoc purum putum ratiocinium existima, & meram conjecturam; quid autem, si idem gustatorii instrumenti consti-

tutioni optimè respondeat , & quod suadere videtur animus , res ipsa demonstret ? sed negotium hujusmodi jam superiori capite satis superque enodavimus , adeò ut hic idem repetere nihil aliud esset , quam actum agere ; sufficiat proinde à nobis ibi declaratum , nervorum plurimos surculos è linguae substantia assurgere , & siphunculorum instar ad extimam superficiem desinere , non stratos , aut repentes , & (ita enim dicam , quando ut me exactius explicem , non invenio) linguae plano parallelos , sed eidem implantatos , & erectos apice suo , & osculis occurrere salibus , eosdemque in medullam admittere . Frustrà autem hic statim insurgas , ita quidem se habere isthaec omnia de nervorum distributione , sed esse pariter indubitatum , ejusmodi nervorum apices obduci membrana praetenui papillarum cupulas efformante , & consequenter , quamvis hunc nervorum situm habeamus , tamen non dari salibus penetrationem , tunica aditum obstruente ; frustrà , inquam , isthaec oggeras ; idem enim est , ac si diceres , auditionem ab auditoriis nervis non absolvi , eò quòd illuc pertingere sonus non potest , id membrana tympani prohibente ; seu potius (esse enim , quòd ad haec responderes) non perfici visionem in retina , quia & plures tunicae , & humores itidem plures ipsi praeponuntur . Quid ? sunt , inquis , isthaec pervia & tenuissimis luminis advenientis particulis commensurata ? Optimè quidem ; sed cur eodem modo affirmare mihi non liceat , illam membranam nervorum apici superextensam perviam esse , & tenuissimis salium particulis permittere aditum ad

medullam suppositam ? quid autem ulterius haereo ratiociniis , si jam superius expositum est , membranulam illam fungorum cupulas constituentem , poris plurimis , usque angustissimis perforatam engy- scopio insipientibus apparere , unde ulterius sese insinuare possunt subtilissimae salium moleculae ? Et ne ab hujus membranulae tractatione , quando jam in eandem incidimus , discedamus ; Vides quam facile per ipsam ea difficultas è medio tollatur , quae primo aspectu aliquod negotium facessere videbatur , cur nempe idem sal plures sapores non pariat , si plures habet facies , acies & angulos plures , nam cùm ipsi per ejus tunicae foramina penetrandum sit , si propria figura iisdem porulis non commensuretur , talis penetratio prohibebitur , nec ullus excitabitur saporis sensus : talis autem & foraminum , & salinarum partium commensuratio esse non potest , nisi respectu unius tantummodo partis ejusdem salis , ac proinde cùm una solum ejusdem salis facies cum angulis suis configurata sit foraminibus ejus tunicae , necessarium erit , ut ex hac semper se- se intrudat in nerveos siphunculos , & ipsorum me- dullarem substantiam , adeoque semper eadem sui parte nervum efficiat , unde eadem semper passio , idem sapor exorietur . Quae autem sit illa vis , quae sapida corpora nervis ipsis impingit , non ita faci- lè dictu est , quandoquidem ipsorum gravitatem aut nullius , aut parvi momenti faciendam puto , cùm in proris animalibus eadem exerceri non possit su- pra Linguae planum , & in hominibus Gustus habeat- tur etiam ad palatum , ut dictum superius , quam in

in partem tantum abest, ut sal vi gravitatis penetrare possit, ut potius levitas necessaria videatur, cum ad superiora tendere debeat: quapropter cum nulla alia facultas occurrat, quae in memoratos nerveos siphunculos salina corpora possit adigere, concludendum crediderim & motus linguae varios undeque salium praegnantem salivam impellentes, & aëris vim utramque, tam scilicet eam, quam juxta perpendicularem exercet, quam alteram, quam secundum latera, & elastica communiter nuncupatur, ad eam penetrationem conducere. His verò suppositis non ita difficile perceptu est, cur tam celeriter ab imposito linguae sapido corpore Gustus ejusdem exoriatur: siquidem jam plusquam satis compertum, ad extimam usque superficiem linguae nerves ad Gustum propagines excurrere; vis insuper assignata per quam salis particulae, quamvis graves, in earum porulos adigantur, adeoque cum & illarum extremitates semper hient, & excipere possint salinas moleculas, & adsint pariter semper, & agitatio linguae (quam tamen non magnificiendam duxerim hoc in negotio, cum & in eadem immota sapores experiamur; potest tamen ipsius motus ad sapores in palatum intrudendos aliquatenus facere) & aëris conatus, poterunt sapori imprimendo destinata corpora statim ac papillarum cupulis occurrunt, in ipsarum sibi commensurata foramina penetrare, exteriori adacta facultate: quod autem exinde statim consequatur Gustatio, non mirabitur; arbitror, quicumque eam esse nervorum naturam perspectum habebit, ut exquisitissimè sentiant: & ab appellentibus

bus determinato quodam modo corporibus maximè alterentur. Res enimverò admiratione dignissima, cum punctiunculis, & levibus quidem, perforatus nervus adeò cruciatur, in tam lacinantes dolores incidit, ut lethalis illa passio, quam Σπασμὸν appellant Graeci, consequatur, quā miserrimus aeger correptus brevi contabescit: mirum igitur videri non debebit si cuspidulis illis suis, tenuissimisque asperitatibus occurrentes medullari nervorum substantiae salitae particulae exactissimam imprimunt saporis speciem, quando illius natura est plusquam dici possit exactè sentiens. Facilè tandem ex dictis colligitur quomodo quidam sapores diutiùs Gustatūs organo inhaereant, & difficulter amoveantur; quoniam videlicet ipsis aliquantum in nerveos fungulos penetrandum est, si adigantur primo violentiùs, ita ut passionem producant aequo plus vehementiorem, seu vulnusculum infligant consuetam, naturalemque punctionem excedens, poterit absque eo, quòd sapidum ipsum corpus intùs inhaereat, ea saporis species immorari longiùs, cum plaga illa non tam subito coalescere possit. Poterit insuper idem contingere, si fal ipse re vera infixus papillulis maneat, sive quòd acutiùs, & ad penetrandum aptiùs intrusit sete profundiùs laxatis aliquando ipsis tunicae fortasse poris, nec ita facilè ab affluente saliva abripi possit; sive quòd ipsa papillularum substantia & membrana ad talem vellicationem constringit porulos suos, talemque salis impetum excludere tentans constricta remoratur, exitum intercludit; sive quòd saliva non ita liberalis copia tanti non sit, ut imbibat omnes salium

lum moleculas, sive denique quod determinati salis illa figura sit, & conceptus, aut intestinus motus, ut ingredi quidem non ita difficili negotio possit in fungulos, egredi autem difficili, aut quod sistatur impetus, aut quod porulus egressuro patens non ita exacte commensuretur, unde necessarium sit, ut sal intus cohibitus repeatat, seu potius à passione sua nunquam desistat, & semper eundem representet saporem; undè rursus oportet, ut ciborum omnium eadem videatur sapida species, quando ab ipsis adveniens sal altius tantummodo infigit infixum prius Gustatus instrumento corpus, cui quid proportionale accidere videmus, praecipue in oculis aliquo colore, praeter naturam, infectis, quibus objecta representantur indiscriminatim omnia eodem modo colorata, quamvis re ipsa diversissimo sint. Ex quibus omnibus deducant alii alia, quaecumque possunt, mihi videlicet isthaec attigisse pauca satis est; non quia omnia, quae hinc concludi possunt, per me adducta reputem, sed qui isthaec tantummodo meditationibus non ita affluens animus suppeditavit, quorum conditionem; cum ipse judicare non possim, (quis enim

Strabonem
Non dicit paetum pater, & pullum male parvus
Si cui filius est?)

Tamen ut mala sint, ut pauca, hoc unum habent non poenitendum, quod cum ipso naturae opificio conveniunt: quid autem multa loquar, si is ipse est,

qui prohibet, genius meus? quare, cùm tales me natura compegerit, nec repugno, nec doleo, quoniam, si quicquid per ipsam factum est, est factum pariter consultissimè,

*Dī bene fecerunt, in opis me quodque pusilli,
Finixeruet animi raro, & per pauca loquentis.*

F I N I S.



VIRO

V I R O C L A R I S S I M O ,
 D O C T I S S I M O Q U E
 D O M I N O
MARCELLO MALPIGHIO
 M E S S A N E N S I S A C A D E M I A E
 P R I M A R I O
LAURENTIUS BELLINI
 B E N E A G E R E .



IRABERIS fortasse, Vir Clarissime, cùm à quo, licet per internuncios amicissimo nunquam privatas habuisti, publicas has epistolas acceperis. Mirari tamen desines statim, ac animadvertes, nunquam occurrisse, quod privatim significarem, cùm è contra jam res expetat, ut animum tibi meum aperiam, & coram litteratis omnibus tibi obstrictissimum fatear. Publicum est quidquid ex hac mea observatione laudis assequor: & quoniam ad eandem ipse me feriantem excitasti, publicum ejus rei monumentum ponere, ne ingratus audirem, consentaneum existimavi. Primum illud tuum in Lingua inventum Viro laudatissimo Borello nostro per literas aperuisti, cuius & ipse ab eodem certior factus Linguam examinabam, cùm ecce tibi pulcherrima ejus facies sese obtulit in epistolis tuis non explicata hujus observatio-

nis meae rude principium: excolui consequenter accuratiū observationem, & eō tandem deveni, ut verum Gustatūs instrumentum in hominibus etiam me assēcutum omnino non desperem. Vides proinde, quām aequum fuerit tractatulo meo has grati animi ergo epistolas attexere, cūm per te factum sit, ut Linguae animum, manumque admoveam, quod nunquam accidisset, nisi quae nunciaveras, inveniendo curiositas impulisset. Interim & ipse eandem partem diligentius rimabar, & de me inscius Papillas comprehendisti, sicut ipsas etiam Vir Clarissimus, nostrūm que amantissimus, Carolus Fracassati, benigna sorte ex se ipso deprehendit; quare de non absimili observatione tibi maximè gratulor (quando eruditissimo Fracassati gratulari coram datum est) & quòd accuratior inspectio me adeo spectatis Viris adjunxerit, mihi gaudeo: id unum tantummodo dolens (si tamen dolor iste meus sanctas amicitiae leges non violat) tractatum hunc de Gustus organo prae tantorum Virorum circa linguam meditationibus tam in litteratorum orbe emblematurum, quām in hac Universitate spectabili, ad adventum Solis stellae minores. Gaudeo tamen, tum quia alienam mihi sapientiam obfuturam non judico, tum quia observationi non easdem fortè meditationes aptamus, sed quisque suas pro genio, tum quia, cum res inter amicos peracta sit, communia quaeque dicenda potiūs, quām propria hac in re videntur, tum denique quòd si de hoc communi invento dolerem aut invidus, aut arrogans audirem, quorum utrumque cane pejus, & angue semper odi, utpote quae & à societatibus expellunt, & humanitare spoliant,

&

& nos ridiculos, quibus quid homini accidere injundius potest, quid miserabilius? Nosti tu ipse optimè, quām vera proferam, qui quotidie experimento discis in hominibus istis tuis livore quidem tabidis, & corrosis sed arrogantia sua tumidis, & inaniter exultantibus, quanti fiant ab eruditis, ingenuis, & aequis rei litterariae judicibus, quām à bonorum collegiis arceantur, quot irrisioibus succumbant, quot animi, corporisque molestiis assidue crucientur; quod etsi nos etiam nostris hisce in regionibus abunde novimus, nostrorum tamen hominum invidiam, & insolentiam distare multum arbitror ab ea, quā isthic plerique miserè conficiuntur; quis enim, Deus immortalis! exaequet unquam impudentissimam illam audaciam, & inflatissimum animum sibi maximum tribuentem, quo Antagonista ille tuus in publicum prodire non est veritus, triumphatoris instar spolium praeferens eruditissimas medicas conclusiones, quas & ipse, & de re medica meritissimus Dominus Catalano, unicum, ut accipio, istius Academiae decus, & columen propugnāstis; cùm tamen non modò in triumphum agere easdem non potuerit, sed ne levissimum quidem vulnusculum influxerit. Vidi ego insolentis, & invidi hominis scriptiunculam, & cùm, qui pro corona assidebant Viri sapientes, in risum effusissimum solverentur, non solùm à risu temperavi, verùm haesi stupidus, & flecti me ad commiserationem sensi ejus miserrimi capit, quòd è genere quantumvis rationalium, ratione destituitur, vel eandem opprimunt superbi spiritus neminem se ipsis majorem ferentes. Ita quicumque à veritate discedimus, &

facilitatem , & morum candorem avertimus , in iudicium , & fabulam cedimus liventis titulo , vel superbè aspernantis , quam ego indignissimam notam ne subirem , has publicas epistolas tuo nomini inscriptas voleui , & cum Viro amicissimo amicè agerem , ne ansam arriperet lector dubitandi , me unum haberi velle Linguae observatorem , tibique gloriam , qualemcumque ex simili inventione attendas , surripere , & ut denique , doctissime Malpighi , grates tibi rependerem praecoxa , quam meae huic lucubrationi occasionem praebuisti . Vale , Vir optime , & Medicum aliquod opus communi bono depromito .

F I N I S.



Fig. 1.



Fig. 2.




Fig. 5.



Fig. 6.




Fig. 3.



Fig. 4.



Fig. 7.






Fig. 8.




Fig. 9.




Fig. 10.





Fig. 11.






Fig. 12.




Fig. 13.

Fig. 15.




Fig. 14.






Fig. 16.

